

मुल चेलागदेला गे

चु किताबला बारेरी पाङ्तो:मा

भ्रिबा म्हि: येशूला मुल चेला पावलला हो लूकासे भ्रिबा मुबा (२ तिमोथी ४:११)। थे अर्गु यहुलला म्हि हिन्ना। थे डाक्टर मुबा (कलस्सी ४:१४)। थेसे थार्बा पिन्बा समाचारएनोन गिक भ्रिबा मुबा।

भ्रिबा ग्ला: रोम शहररी भ्रिबा मुबा।

भ्रिबा साल: ओस्पन ईश्वी संवत् ६०-७० (विक्रम संवत् ११७-१२७) सालला गुडरी भ्रिबा मुबा। लूकासे थार्बा पिन्बा समाचार भ्रिमाहेन्से चु किताब भ्रिबा मुबा। चु किताब न्ही चा भो गिकदेन भो न्ही हङ्बा मुबा।

खाल्दा भ्रिबा: येशूला मुल चेलागदेसे लबा गेगदे घोना लबाला लागिरी थियोफिलस भिबा म्हिदा भ्रिबा हिन्ना।

चु किताब लूकासे हाडसे भ्रिबा “थार्बा पिन्बा समाचार” भ्रिसी जिन्माहेन्से भ्रिबा मुबा। चु किताबदा नेपाली बाइबलरी “प्रेरित” भिसी भ्रिबा मुला। चु किताबरी पाङ्बा मुल ताम चा प्रभु येशूला जम्मान भन्दा डाच्छाला चेलागदेसे खाहङ् लसी परमेश्वरला आत्माला शक्ति याङ्सी थार्बा पिन्बा समाचार यरूशलेमहेन्से जम्बुलिङला कानाकुनी जम्मान ग्लारी धोना लजी भिसी पाङ्बा हिन्ना (मुल चेला १:८)। चु ताम यहूदीगदेग्याम शुरु तसी लिच्छा जम्बुलिङला जम्मान म्हिगदेला लागिरीनोन येशूदा तेन्बा ग्याम दोबा हिन्ना। चु किताबरी ख्रीष्टियानगदे रोमी सरकारदा बिरोध लबागदे आहिन, तर ख्रीष्टियानगदेसे लबा विश्वासग्याम यहूदी धर्मला गे पूरा तबा हिन्ना भिबा ताम पढब लबागदेसे घोगै भिसी भ्रिबा मुला।

चु किताबरी मुल चेलागदेला गे भो सोमरी भिबा मुल।

(क) येशू स्वर्गरी फेप्माहेन्से यरूशलेम शहररी थाबा पिन्बा समाचार थे:ना लबा।

(ख) प्यालेस्टाइन भिबा यहुल्साला ग्ला ग्लारीनोन थाबा पिन्बा समाचार थे:ना लजी।

(ग) अर्गु यहुल्साला जम्मान म्हिगदेला गुडरी थाबा पिन्बा समाचार थे:ना लजी। थेहङ् लसीन यूरोपदेन अफ्रिकाला गुडरी मुबा घेन समुन्द्रला कानाकुनी परब तबा यहुल्सागदेदेन रोम यहुल्साधोनान थाबा पिन्बा समाचार थे:जी।

चु किताबला मुल ताम चा परमेश्वरला आत्मासे लबा गेला बारेरी हिन्ना। परमेश्वरला आत्मा पेन्तिकोसला धिनकुनु यरूशलेम शहररी मुबा विश्वासीगदेला गुडरी शक्तिरी फेप्खजी। थेहङ् लसीन चु किताबरी मुबा तामगदेग्याम मण्डलीदेन मण्डलीदा च्याबा म्हिगदेदा हो लबा ताम ओच्छे थेनीगदेदा विश्वासरी कोङ्ना लबा तामगदे उन्बा मुला। चु किताबरी भिबा तामगदेसे विश्वासीगदे खाहङ् लसी भ्रतो:ला भिबादेन संगतीरी थे थाबा पिन्बा समाचारला शक्ति खाहङ्बा मुबा भिसी उन्बा मुला।

मुल तामगदे

- येशू स्वर्गरी फेप्बा धुइला ताम ओच्छे येशूसे कुल्बादेन कबुल लबा ताम १:१-१४
- यहूदाला साटोरी स्थान्दोदा मुल चेला स्होबारी धम्बा १:१५-२६
- यरूशलेम शहररी थाबा पिन्बा समाचार थे:ना लबा २:१-८:३
- यहूदियादेन सामरिया अञ्चलरी थाबा पिन्बा समाचार थे:ना लबा ८:४-१२:२५
- डाच्छा रेम पावल थाबा पिन्बा समाचार थे:ना लबारी निबा १३:१-१४:२८
- यरूशलेम शहररी चिबा सभा १५:१-३५
- न्ही रेमला पालरी पावल थाबा पिन्बा समाचार थे:ना लबारी निबा १५:३६-१८:२२
- सोम रेमला पालरी पावल थाबा पिन्बा समाचार थे:ना लबारी निबा १८:२३-२१:१६
- यरूशलेमदेन कैसरिया ओच्छे रोम शहररी पावलदा भ्याल्खानरी भाङ्बा २१:१७-२८:३१

मुल चेलागदेला गे

परमेश्वरसे हाडला आत्मा पिन्ना
भिसी लबा कबुल

१-२ लास्सो, थियोफिलस,
फ्याफुल्ला, डाइ हाडदा येशूसे
गे शुरु लबाहेन्से स्वर्गरी आभोर्तेधोना
थेसे लबादेन लोप्बा जम्मान तामला
बारेरी डाच्छान भिसी जिन्बा
मुला।[†] चु तबा भन्दा डाच्छा येशूसे
परमेश्वरला आत्माग्याम हाडसे धम्बा
मुल चेलागदेसे तिग गे लतोःला भिसी
सुड्बा मुबा।^{*} ३येशू सिसी जिन्माहेन्से
हाडदा सिबाग्याम सोना लबा मुला
भिबा ताम ल्हानान ग्यामसे उन्बाला
लागिरी बोगल न्ही धिनधोना हाडला
चेलागदे मुबा ग्लारी फेप्वजी। ओच्छे
थेनीगदेदा परमेश्वरला यहुल्साला
बारेरी सुड्जी।

४तिरेकुनु थेनीगदेदेन छ्याम
धन्छ्यासी सोल छ्योइबा धुइरी
येशूसे थेनीगदेदा चुहड् भिसी कुल्जी,

“एनीगदे यरूशलेम शहर रुलासी
खानडएनोन थानिड। परमेश्वर
आबासे हाडला आत्मा पिन्ना भिसी
लबा कबुल आयाड्तेधोना भ्रान्सी
चिड। थे कबुलला बारेरी डाइ
एनीगदेदा डाच्छान पाड्सी जिन्बा
मुला।^{*} ५तिग्दा भिसम यूहन्नासे
क्युड्ग्याम बप्तिस्मा पिन्जी, तर
दाहेन्से तिगै धिन लिच्छा एनीगदेला
बप्तिस्मा परमेश्वरला आत्माग्याम[†]
तला।”^{*}

येशू स्वर्गरी फेप्बा

६थेतबासेलमा थेनीगदे पोप तसी
चिबा धुइरी चेलागदेसे येशूदा “प्रभु,
दान्दे हाडसे इस्राएल यहुल्सादा दोःसी
छार स्होबारी छ्याइबा हिन्ना?” भिसी
ड्योइजी।

७येशूसे थेनीगदेदा चुहड् भिसी
सुड्जी, “चु ताम परमेश्वर आबासे
तोगब लबा धिनदेन धुइगदेरी

१:१-२ थियोफिलसदा डाच्छा भिसी पुड्बा किताब चा लूकाला किताब हिन्ना (लूका १:३)।

१:५ परमेश्वरला आत्मा बप्तिस्माला बारेरी मुल चेला २:१-१३ स्हीगो।

१:१-४ लूका १:१-४ १:४ लूका २४:४६; यूह १४:२६

१:५ मत्ती ३:११; मर्क १:८; लूका ३:१६; यूह १:२३

तनोन तला। तर थे तामगदे घोबारी म्हाइबा एनीगदेला गे आहिन।
८तर परमेश्वरला आत्मा एनीगदेथोरी फेप्खमाहेन्से एनीगदेसे शक्ति याड्ला। जमाहेन्से एनीगदे यरूशलेमहेन्से यहूदियादेन सामरिया अञ्चलरी, ओच्छे जम्बुलिडला कनाकुनीधोना डाला साक्षी दोला।”*

९येशूसे चुहड् सुड्माहेन्से थेनीगदेसे च्याना च्यानान येशूदा स्वर्गरी भोजी। ओच्छे येशूदा खसुसे घप्जी। जमाहेन्से थेनीगदेसे येशूदा आम्राड्नी।*

१०थेनीगदे एकोहोरो तसी मुपट्टि च्यासी चिबा धुइरी तिक्खुरीन तार क्वान क्वान्बा म्हि न्ही।^१ थेनीगदेला डामरी राप्जी।^{११} ओच्छे थे म्हि न्हीसे थेनीगदेदा “गालीलला म्हिगदे, तिग्दा एनीगदे मुपट्टि च्यासी राप्सी चिबा? एनीगदे मुबाग्याम स्वर्गरी फेप्बा चुनोन येशू दान्दे एनीगदेसे खाहड् लसी स्वर्गरी फेप्बान लबा म्हाइबा मुला। थेहड् लसीन थे दोःसी फेप्खला” भिसी भिजी।

यहूदाला ग्लारी मतियासदा थान्बा

१२जमाहेन्से थेनीगदे जैतून भिबा गड्ग्याम यरूशलेमपट्टि दोःजी। थेग्याम यरूशलेम शहररी धोबारी ओस्पन किलोमिटर गिक ते भ्रदोमुबा।

१३शहररी धोमाहेन्से थेनीगदे ह्वाड चिबा दिमला तलाथोला कोठारी वाड्जी। थेनीगदे पत्रुस, यूहन्ना, याकूब, अन्द्रियास, फिलिप, थोमा, बारथोलोमाइ, मत्ती, अल्फयसला भा याकूब, ह्वाडला यहूल्सादा माया लबा म्हि भिबा सिमोन ओच्छे याकूबला भा यहूदा मुबा।*^{१४} कोइ कोइ मिडम्हेमेगदेदेन येशूला आमा मरियम ओच्छे येशूला आलेगदेएनोन थेनीगदेदेन छ्याम सेम गिक लसी प्रार्थना लबाला लबान मुबा।

१५तिरेकुनु थेरी प्रभु येशूदा विश्वास लबा म्हिगदे ओस्पन ग्यार्जा गिकसे बोगल गिक हुप तबा मुबा। थे धुइरी पत्रुस थेनीगदेला डाच्छापट्टि राप्सी चुहड् भिबारी छ्याइजी,^{१६} “ज्योज्यो आले नाना आडागदे, परमेश्वरला बचनरी येशूदा चुड्बा म्हिगदेला नेता यहूदाला बारेरी दाऊद ग्लेसे डाच्छान परमेश्वरला आत्माग्याम पाड्बा मुबा। थे बचनरी मुबा ताम पूरा तनोन तोःबा मुबा।^{१७} यहूदाएनोन डनीगदे न्हडला गिक मुबा। डन्से हड्णोन प्रभुला गे लबाला लागिरी थेदाएनोन धम्बा मुबा।”

१८ओच्छे यहूदासे आज्यबा गे लसी स्होबा टाडगासे बु गिक ग्लुजी। थे बुरी ह्वाडनोन सिसी सरी हिल्मा थेला

१:१० “तार क्वान क्वान्बा म्हि न्ही” चा स्वर्गदूतगदे हिन्ना।

१:८ मत्ती २८:१६; मर्कू १६:१५; लूका २४:४७-४८ १:६ मर्कू १६:१६; लूका २४:५०-५१

१:१३ मत्ती १०:२-४; मर्कू ३:१६-१६; लूका ६:१४-१६

फो थिसी गुड फो थोन्जी। १६थे ताम यरूशलेमला जम्मान म्हिगदेसे था याङ्जी, ओच्छे थेनीगदेसे थे बुला मिन हाडलान ग्योइरी “आखेल्दामा” भिसी थान्जी। थेला अर्थ चा काला बु भिबा हिन्ना।*

२० पत्रुससे दोःसी चुहङ् भिसी भिजी,

“थेला दिम थान्थान तगै, थेरी खालै थाचिगै।’

ओच्छे

‘थेसे याङ्बा अधिकार

स्थान्दोसेन जिम्मा किनौ’

भिसी व्हाइला किताबरी† भिबा मुला।*

२१ “थेतबासेलमा यहूदाला ग्लारी य्हाडदेन छ्याम मुबा म्हिगदे न्हडला गिक धम्तोःबा मुला। थे म्हि चा य्हाड प्रभु येशूदेन छ्याम मुबा धुइरी सदन य्हाडदेन छ्यामनोन भ्रबा म्हि ततोःला। २२थे म्हि यहून्नासे बप्तिस्मा पिन्बा धुइहेन्से प्रभु येशू य्हाड मुबाग्याम स्वर्गरी भोर्बा धुइधोना य्हाडदेन छ्यामनोन मुबा म्हि ततोःला। ओच्छे थे म्हि य्हाडदेन छ्याम तसी प्रभु येशू सिबाग्याम सोजी भिबा तामला साक्षी ततोःला।”*

२३ जमाहेन्से थेरी मुबा म्हिगदेसे म्हि न्हीला मिन पिन्जी। थे न्हीला मिन युस्तस भिबा योसेफ बारसाबासदेन मतियास मुबा। २४ थेनीगदेसे चुहङ् भिसी प्रार्थना लजी, “प्रभु, हाडदा जम्मान म्हिला सेमला ताम था मुला। थेतबासेलमा चु न्ही न्हडरी हाडसे खाल्दा धम्बा, डन्दा उन्सी पिन्गो। २५ ओच्छे थे म्हिसे चा यहूदासे लबा मुल चेलाला गे लखम्मै। तिग्दा भिसम यहूदा चा थे गे रूलासी थे जुन ग्लारी नितोःमुबा थेनोन ग्लारी निसी सिजी।”† २६ जमाहेन्से थेनीगदेसे थे म्हि न्हीला मिनरी चिट्ठा युजी, थे चिट्ठा मतियासला मिनरी परब तजी। जमाकुनुहेन्से थेदा च्युक गिक मुल चेलागदेदेन छ्याम भयाजी।

परमेश्वरला आत्मा फेप्खबा

२ पेन्तिकोसला धिनकुनु प्रभु येशूदा विश्वास लबा म्हिगदे जम्मान ग्ला गिकरीन पोप तबा मुबा।* २थे धुइरी तिरुखुरी स्वर्गग्याम लाबा खबा हङ्बा घेन काइ खजी। थे काइसे थेनीगदे चिबा दिम प्लिङ्जी। ३ ओच्छे मेला ल्हाम हङ्बा स्हेगदे थेनीगदे हाड हाडथोरी

१:२० व्हाइला किताब भिबा चा भजनसंग्रह हिन्ना। “थेसे याङ्बा अधिकार स्थान्दोसेन जिम्मा किनौ” भिबा चा यहूदासे लबा ख्रीष्टला गे स्थान्दो म्हिसे लगै भिबा हिन्ना।

१:२५ “यहूदा हाडलान ग्लारी निसी सिजी” भिबा चा थे नर्गरी निजी भिबा हिन्ना।

१:१८-१९ मत्ती २७:३-८ १:२० भजन ६६:२५; १०६:८

१:२२ मत्ती ३:१६; मर्कू १:६; १६:१६; लूका ३:२१; २४:५१

२:१ लेवी २३:१५-२१; व्यव १६:६-११

भो भो तसी चिबा म्राङ्जी। थे मेला
ल्हाम चा ले हङ्बान म्राङ्मुबा।
४जमाहेन्से थेनीगदे जम्मान
परमेश्वरला आत्मासे प्लिङ्जी।[†]
ओच्छे परमेश्वरला आत्माग्याम
पाङ्खम्बा शक्ति याङ्सी थेनीगदेसे
पाङ्आसेबा अर्गु ग्योङ्गदेरी ताम
पाङ्बारी छ्याङ्जी

५थे धुइरी परमेश्वरदा तेन्बा
यहूदीगदे जम्बुलिङला जम्मान
यहुल्साग्याम यरूशलेमरी खसी चिबा
मुबा। ६चुहङ्बा काइ थे:माहेन्से थेरी
म्हिगदे पोप तजी। ओच्छे प्रभु येशूदा
विश्वास लबा म्हिगदेसे हाङ हाङला
ग्योइरी ताम पाङ्बा म्राङ्सी थेनीगदे
उदेक म्हन्जी।

७जमाहेन्से थेनीगदे उदेक तसी
चुहङ् भिबारी छ्याङ्जी, “तिग चु
ताम पाङ्बा जम्मान म्हिगदे गालीलला
आहिन? ८तर चुगदेसे खाहङ् लसी
य्हाङ हाङ हाङला ग्योइ पाङ्खम्जी!
९य्हाङ चुरी पार्थीला म्हिगदे,
मादीला म्हिगदे, एलामला म्हिगदे,
मेसोपोटामीयाला म्हिगदे, यहूदियाला
म्हिगदे, कापाडोकियाला म्हिगदे,
पोन्टसदेन एशियारी चिबा म्हिगदे
हिन्ना। १०ओच्छे फ्रिगियाला म्हिगदे,
पामफिलियाला म्हिगदे, मिश्रदेन
कुरेनीरी परब तबा लिबियाला डाम
डामला ग्लागदेदेन रोमग्याम खबा


११यहूदीदेन यहूदी धर्म तेन्बा अर्गु
यहुलला म्हिगदे मुला। ओच्छे क्रेट
यहुल्सारी चिबा म्हिगदेदेन अरबीला
म्हिगदेएनोन मुला, थेनीगदेसे मी
य्हाङला हाङ हाङलान ग्योइरी
परमेश्वरसे लबा घेन गेला बारेरी
पाङ्बान चीम।

१२चुहङ्बा म्राङ्सी थेनीगदे जम्मान
उदेक तसी अलमल तसी गिकसे
गिकदा “चु तिग तबा?” भिसी
ङ्योइबा छार्बा लबारी छ्याङ्जी।
१३तर स्थहान्दोगदेसे थेनीगदेदा “चुगदे
मी कलिलो निङ्गुसे ङ्ग्रहोइजीम”
भिसी खिसी लजी।

पत्रुससे म्हिला हुलदा घोना लबा

१४जमाहेन्से पत्रुस च्युक गिक
चेलागदेदेन छ्याम राप्सी जजाकी
डाच्छा निसी घेन काइरी चुहङ्
भिसी भिजी, “यहूदिया अञ्चलग्याम
ज्योङ्खबा यहूदी ह्ोगदेदेन
यरूशलेमरी स्थूबा जम्मान म्हिगदे चु
तिग तबा हिन्ना डाङ हाङनीदा घोना
लला। हाङनीसे डाला ताम ज्यना
लसी ङ्यान्गो। १५हाङनीसे म्हन्बा हङ्
चुगदे ङ्ग्रहोइबा आरे। दान्दे स्थोला
नौ बजब जे तबा मुला, चु धुइरी
खालैसेन निङ्गु आथुङ्। १६तर चु
ताम तला भिसी योएल अगमवक्तासे
पाङ्बा मुबा।

२:४ “परमेश्वरला आत्मासे प्लिङ्जी” भिबा चा म्हिदा परमेश्वरला आत्माला शक्तिसे पूरान
चलब लबा हिन्ना।



(मुल चेला २:६-११)

पेन्तिकोस

१७ परमेश्वरसे सुड्बा मुला,
 लिच्छाला धिनरी डाइ जम्मान
 म्हिगदेशोरी डाला आत्मा
 पुइखला,
 जमाहेन्से एनीगदेला भा
 भामेगदेसे अगमवाणी पाड्ला,
 ओच्छे एनीगदेला ठिटा
 कोलागदेसे परमेश्वरसे
 उन्बा ताम म्राड्ला,
 ओच्छे एनीगदेला आखे मम
 म्हेमेगदेसे म्हाड म्राड्ला।
 १८ थे धिनकुनु नोकरगदेशोरीनोन डाइ
 डाला आत्मा पुइखला,
 ओच्छे थेनीगदेसे लिच्छा तसेला
 ताम डाच्छान पाड्ला।
 १९ डाइ तोर मुरी उदेकला गेगदेदेन
 मार जम्बुलिडरी उदेकला
 चिनुगदे उन्ना।
 चु चिनुगदे चा का, मेदेन म्युगुला
 मुस्लो हिन्ना।
 २० परमप्रभु फेप्खबा घेन य्हाल
 य्हाल्बा धिन भन्दा डाच्छा
 धिनी धोपधोप तला
 ओच्छे लनी का हड्बान वाला
 तला।
 २१ ओच्छे जुन म्हिसे परमप्रभुदा डादा
 ह्यो लउ भिसी भिला, थे म्हिसे
 थार्बा याड्ला।*
 २२ “इस्माएलला म्हिगदे डाला
 ताम ड्यान्गो, परमेश्वरसे येशूग्याम

ह्वाडनीला गुडरी शक्तिशाली गेगदे
 लबान उदेकला चिनुगदे उन्बा ताम
 ह्वाडनीदा थानोन मुला। थे चिनुगदे-
 ग्याम परमेश्वरसे नासरतला येशूदा
 डाइनोन पुइखबा हिन्ना भिसी उन्बा
 मुबा। २३ परमेश्वरसे डाच्छान म्हन्बा
 अन्छार येशूदा ह्वाडनीसे चुड्जी।
 ओच्छे येशूदा ह्वाडनीसे पापी म्हिगदेला
 यारी जिम्मा पिन्सी कुसरी टांगब लसी
 साइपुड्जी।* २४ तर येशूदा सिबाला
 शक्तिसे साइबाला साइबान लबारी
 आखम्नी। तिगदा भिसम परमेश्वरसे
 येशूदा सिबाला दुखग्याम फेसी सोना
 लजी।* २५ तिगदा भिसम दाऊद ग्लेसे
 येशूला बारेरी चुहड् भिबा मुला,
 ‘डाइ प्रभुदा सदन डाला
 डाच्छापट्टि म्राड्मुला।
 थे डादेन छ्यामनोन मुला।
 थेतबासेलमा डाइ तिगे तामरी
 धन्दा सुर्दा लआतोः।*
 २६ थेतबासेलमा डा सेमहेन्सेन ताड्बा
 मुला,
 ओच्छे ताड्बान डाइ सेमहेन्सेन
 डाला सुड्ग्याम प्रभुला
 जयजयकार लबा मुला।
 ओच्छे डाला ल्हुइ सिसी निसैनोन
 डा दोःसी सोला भिसी डाइ
 प्रभुथोरी आश लबा मुला।
 २७ तिगदा भिसम ह्वाडसे डाला प्राणदा
 सिबागदे निबा ग्लारी आरुला।

२:१७-२१ योए २:२८-३२ २:२३ मत्ती २७:३५; मर्कू १५:२४; लूका २३:३३; यूह १६:१८
 २:२४ मत्ती २८:५-६; मर्कू १६:६; लूका २४:५ २:२५-२८ भजन १६:८-११

ओच्छे हाडदा जे तेन्बा म्हिला
 ल्हुइदा हाडसे नइना आल।
 २८ हाडसे डादा डा दोःसी सोला
 भिबा ताम उन्बा मुला,
 ओच्छे हाड डादेन छ्याम तसी
 डादा ल्हानान ताङ्ना लला।
 २९ “ज्योज्यो आले नाना आडागदे,
 डाइ यहाडला म्हेमे दाऊद ग्लेला
 बारेरी ढुक्क तसी पाङ्गला। थे सिसी
 ल्हुजी, ओच्छे दान्देधोना थेला धुर्सा
 मुनोन मुला। ३० दाऊद ग्ले अगमवक्ता
 तबासे लमा थेला ग्लारी हाडलान
 सन्तानना गिकदा परमेश्वरसे ग्ले
 स्होला भिसी परमेश्वरसे कबुल लबा
 ताम थेदा था मुबा।* ३१ परमेश्वरसे
 लिच्छा तिग लला भिसी दाऊदसे
 डाच्छान प्राङ्मुबा। थेतबासेलमा थेसे
 थार्बा पिन्बा ख्रीष्ट सिबाग्याम सोला
 भिसी चुहङ् भिमुबा, ‘थेदा सिबागदे
 निबा ग्लारी आरुल्लानी ओच्छे थेला
 सिबा ल्हुइ नइना आलनी।’

३२ “ओच्छे चुनोन येशूदा परमेश्वर-
 से सिबाग्याम सोना लजी। चु तामला
 डनी जम्मान साक्षी मुला। ३३ परमेश्वर
 आबासे येशूदा घेन मान पिन्सी हाडला
 दाहिने छ्यापट्टि थान्जी, ओच्छे
 कबुल लबा अन्छार परमेश्वरसे
 येशूदा हाडला आत्मा पिन्जी। दान्दे
 हाडनीसे प्राङ्बा चु तामदेन थेःबा
 तामगदे थेनोन परमेश्वरला आत्मा
 प्रभु येशूसे डन्दा पिन्बा हिन्ना।

३४-३५ दाऊद हाडनोन स्वर्गरी आनिनी,
 तर थेसे चुहङ् भिसी भिबा मुला,
 ‘परमप्रभुसे डाला प्रभुदा चुहङ्
 भिसी सुङ्बा मुला,
 डाइ एला शत्रुगदेदा भ्रेना
 आलतेधोना

ए डाला दाहिने यापट्टि चिउ’*
 ३६ “थेतबासेलमा इसाएलला जम्मान

म्हिगदेसे चु ताम पक्का हिन्ना भिसी
 था याङ्गै, जुन येशूदा हाडनीसे कुसरी
 टाँगब लसी साइबा मुबा, थेनोन येशूदा
 परमेश्वरसे प्रभुदेन थार्बा पिन्बा ख्रीष्ट
 स्होबा मुला।”

३७ जमाहेन्से पत्रुसला ताम थेःसी
 थेनीगदेला सेमरी ल्हानान दुख
 तजी, ओच्छे पत्रुसदेन स्थान्दो
 मुल चेलागदेदा “दाहेन्से डन्से तिग
 लतोःला ज्योज्यो आले?” भिसी
 ड्योइमा,

३८ पत्रुससे थेनीगदेदा चुहङ् भिसी
 जोहाब पिन्जी, “दाहेन्से एनीगदेसे
 हाड हाडला पाप रूलासी परमेश्वर-
 पट्टि दोःगो। ओच्छे पाप माफ
 याङ्बाला लागिरी एनीगदेसे येशू
 ख्रीष्टला मिनरी बप्तिस्मा किन्गो।
 जमाहेन्से एनीगदेसे परमेश्वरला
 आत्मा मोलम याङ्गला। ३९ तिगदा
 भिसम परमेश्वरसे लबा चु कबुल
 एनीगदेदेन छ्याम एनीगदेला
 कोलागदेला लागिरी हिन्ना, ओच्छे
 यहाडला प्रभु परमेश्वरसे ड्योइबा

थारेड थारेड चिबा जम्मान म्हिगदेला^१
लागिरीनोन हिन्ना।”

^{४०}ओच्छे पत्रुससे ल्हानान
तामग्याम होशियार तना लजी। ओच्छे
थेनीगदेदा अर्ती पिन्बान, “दान्देला
नइबा म्हिगदेशोरी खबारी छ्याइबा
सजायग्याम एनीगदे हाडनोन जोगब
तसी चिउ” भिसी भिजी।

^{४१}जमाहेन्से ल्हानान म्हिगदेसे
पत्रुससे पाड्बा तामरी विश्वास लसी
बन्तिस्मा किन्जी। थेनोन धिनकुनु
थेनीगदेला गुडरी विश्वास लबा
म्हिगदे ओस्पन हजार सोम ते बढब
तजी।

विश्वासीगदेला संगती

^{४२}जमाहेन्से थेनीगदेसे मुल
चेलागदेसे लोप्बा ताम ड्यान्मुबा,
संगती लमुबा, प्रभु भोज चमुबा,
ओच्छे सेम गिक तसी सदन प्रार्थना
लमुबा। ^{४३}मुल चेलागदेसे ल्हानान
उदेकला गेगदेदेन उदेकला चिनुगदे
उन्जी। थेतबासेलमा जम्मान म्हिगदेसे
परमेश्वरदा ल्हानान मान लजी।
^{४४}प्रभुदा विश्वास लबा जम्मान
म्हिगदे ग्ला गिकरीन हुप तमुबा,
ओच्छे थेनीगदेदेन छ्याम मुबा
स्हेगदे जम्मालान हिन्ना भिसी चलब
लमुबा। * ^{४५}ओच्छे थेनीगदेसे हाडनेन

छ्याम मुबा सम्पत्तिदेन मालसामान
चूड्सी जुन जुन म्हिदा जुन जुन स्हे
खांचो तबा मुला थे स्हे जम्मादान
भो लसी पिन्मुबा। ^{४६}ओच्छे थेनीगदे
धिन धिननोन जम्मान सेम गिक तसी
परमेश्वरला मन्दिररी हुप तमुबा।
ओच्छे थेनीगदे दिम दिमरी निसी प्रभु
भोज चबादेन ज्यबा सेम थोसी ताड्सी
चबा थुड्बा लमुबा। ^{४७}ओच्छे सदन
परमेश्वरला जयजयकार लमुबा।
स्थान्दो म्हिगदेसे थेनीगदेदा ज्यबा
म्हि भिसी भिमुबा। ओच्छे थार्बा
याड्बा म्हिगदे धिन धिननोन प्रभुसे
थेनीगदेला गुडरी बढब लसी पिन्जी।

कुज्या म्हि गिकदा खम्ना लबा

३ तिरेकुनु पत्रुसदेन यूहन्ना
धिनना तीन बजेरी परमेश्वरला
मन्दिररी निबान मुबा। थे धुइ चा
प्रार्थना लबा धुइ मुबा। ^२परमेश्वरला
मन्दिर न्हडरी वाड्बा म्हिगदेदेन
छ्याम टाडगा ह्रीगै भिसी न्हमाहेन्सेन
कुज्या मुबा म्हि गिकदा म्हिगदेसे
सदन परमेश्वरला मन्दिररी वाड्बा
प्रापरी भसी थान्मुबा। थे प्रापदा जेबा
प्राप भिसी भिमुबा। ^३थे कुज्या म्हिसे
पत्रुसदेन यूहन्ना परमेश्वरला मन्दिर
न्हडरी वाड्बारी छ्याइबा प्राड्सी
टाडगा ह्रीजी। ^४जमाहेन्से पत्रुसदेन

२:३६ “थारेड थारेड चिबा जम्मान म्हिगदे” भिबा चा लिच्छा लिच्छाला म्हिगदे अथवा
थारेड थारेडला ग्ला हिन्ना।

२:४४ मुल ४:३२-३५

यूहन्नासे थे म्हिदा ज्यना लसी च्याजी, ओच्छे पत्रुससे थेदा “डन्दा च्यागो” भिसी भिजी। ५थेतबासेलमा थेनीगदेसे तिगै पिन्ना वा भिसी थे कुज्या म्हिसे थेनीगदेदा सेम लसी च्याजी।

६जमाहेन्से पत्रुससे “डादेन छ्याम म्हरदेन म्हुइ आरे। तर डादेन छ्याम तिग मुला थे डाइ एदा पिन्ना। नासरतला येशू ख्रीष्टला मिनरी ए रे:सी भ्रउ!” भिसी भिजी। ७ओच्छे थेसे थे कुज्या म्हिला दाहिने यारी चुड्सी थीजी, थीमैछ्याम थे कुज्या म्हिला काडदेन काडला जी जीरी भड वाड्जी। ८जमाहेन्से थे कुज्या म्हि डोड रे:सी क्यारमार भ्रबारी छ्याइजी। ओच्छे भ्रबान छ्योड्सी परमेश्वरला जयजयकार लबान थेनीगदेदेन छ्याम परमेश्वरला मन्दिररी वाड्जी। ९ओच्छे जम्मान म्हिगदेसे थेदा भ्रबान लबादेन परमेश्वरला जयजयकार लबा म्हाड्जी। १०थेनीगदेसे थे म्हिदा परमेश्वरला मन्दिरला जेबा भिबा म्पारी हीसी चिबा चुनोन हिन्ना भिसी डोसेजी। ओच्छे थे खम्बा म्हाड्सी थेनीगदे ल्हानान उदेक तजी।

पत्रुससे परमेश्वरला मन्दिररी लोण्बा

११थे म्हिसे पत्रुसदेन यूहन्नादा चुड्सी भ्रबा म्हाड्सी म्हिगदे ल्हानान

उदेक तसी सोलोमन भिबा दलानरी यार्बान थेनीगदे मुबा ग्लारी खजी। १२चु म्हाड्सी पत्रुससे म्हिगदेदा चुहड् भिसी भिजी, “इसाएलला म्हिगदे, हाडनी तिगदा चु तामरी उदेक म्हन्बा? तिग डन्से हाडलान शक्तिदेन परमेश्वरदा तेन्बासे लमा चु म्हिदा भ्रना लखम्बा हड् छोर्सी ट्वल्ल तसी डन्दा च्याबा? १३ह्हाडला आखे म्हेमे अब्राहाम, इसहाकदेन याकूबला परमेश्वरसे हाडला गे लबा येशूदा घेन मान लजी। तर हाडनीसे चा चुड्सी म्हिला यारी जिम्मा पिन्जी, ओच्छे पिलातससे येशूदा पुइबारी छ्याइमा हाडनीसे थेदा पुइबारी आत भिसी पिलातसला डाच्छापट्टि भिमुबा।* १४तर हाडनीसे तिगै दोष आरेबादेन परमेश्वरसे म्हन्बा अन्छार भ्रबा म्हिदा चा पुइबारी आत, बरु म्हि साइबा म्हिदा चा पुइगो भिसी पाड्जी।* १५ओच्छे हाडनीसे जुनी पिन्बादा साइजी। तर थेनोन येशूदा परमेश्वरसे सिबाग्याम सोना लजी, चु ताम म्हाड्बा चा डनीन हिन्ना। १६येशूलान मिनना शक्तिग्याम चु म्हिसे भड याड्जी। हाडनीसे म्हाड्बादेन डोसेबा चु म्हिसे येशूदा विश्वास लबासे लमा हाडनी जम्मालान डाच्छापट्टि चुदा खम्ना लबा मुला।

१७“च्यागो ज्योज्यो आलेगदे, हाडनीसे लबा चु जम्मान गे आसेनान

लबा हिन्ना भिसी डादा था मुला।
 ओच्छे हाडनीला नेतागदेसेनोन
 थेहङ्गनोन लजी।^{१८}तर थाबा पिन्बा
 ख्रीष्टसे दुख नातोःला भिसी परमेश्वर-
 से डाच्छान जम्मान अगमवक्तागदे-
 ग्याम सुङ्बा अन्छार परमेश्वरसे चु गे
 पूरा लजी।^{१९}थेतबासेलमा परमेश्वरसे
 हाडनीला पाप माफ लबाला
 लागिरी हाड हाडला पाप ख्लासी
 परमेश्वरपट्टि दोःगो।^{२०}जमाहेन्से
 परमेश्वरग्याम हाडनीसे सुखला धिन
 याङ्गला, थेहङ्ग लसीन परमेश्वरसे
 हाडनीला लागिरी डाच्छान धम्बा
 थाबा पिन्बा ख्रीष्ट येशूदा पुङ्खला।
^{२१}ओन्माहेन्सेन परमेश्वरसे हाडला
 अगमवक्तागदेग्याम सुङ्बा जम्मान
 स्हे दोःसी स्होबा धुङ् आततेधोना येशू
 ख्रीष्ट स्वर्गरी धन्छ्यातोःबा मुला।
^{२२}मोशासे चुहङ् भिसी पाङ्बा मुला,
 ‘एनीगदेला परमप्रभु परमेश्वरसे
 डादा पुङ्खबा हङ् लसी
 एनीगदेला ज्योज्यो आलेगदे
 न्हङ्ग्यामसेन एनीगदेला
 लागिरी अगमवक्ता गिक
 पुङ्खला।
 थेसे पाङ्बा जम्मान ताम एनीगदेसे
 ड्यान्तोःबा मुला।*
^{२३}थे अगमवक्ताला ताम आङ्ग्यान्बा
 खजिबै म्हिदा चा

परमेश्वरला म्हिगदेग्याम फेसी
 नाश लला।’*

^{२४}“शमूएल अगमवक्ताहेन्से लिच्छा
 खबा जम्मान अगमवक्तागदेसे चुनोन
 धिनगदेला[†] बारेरी पाङ्जी।^{२५}हाडनी
 थेनोन अगमवक्तागदेदेन परमेश्वरसे
 लबा थेनोन कबुलला सन्तान हिन्ना।
 थे कबुल हाडनीला म्हेमे अब्राहामदेन
 छ्याम परमेश्वरसे चुहङ् भिसी
 लमुबा, ‘एला सन्तानग्यामनोन
 जम्बुलिङला जम्मान म्हिगदेसे मोलम
 याङ्गला।’*^{२६}हाडनीदा नङ्बा गेग्याम
 फेसी मोलम पिन्बाला लागिरी
 परमेश्वरसे हाडला भा येशूदा डाच्छा
 हाडनी मुबा ग्लारी पुङ्खबा हिन्ना।”

**पत्रुसदेन यूहन्नादा यहूदी धर्मला
 अदालतरी भोर्बा**

✕ पत्रुसदेन यूहन्ना म्हिगदेदेन
 छ्याम ताम लबान लमा
 परमेश्वरला मन्दिररी पूजा लबा
 म्हिगदेदेन मन्दिर च्याबा सिपाही-
 गदेला कप्तान ओच्छे सद्दुकीगदे
 थेनीगदे मुबा ग्लारी खजी।^२थेनीगदेदा
 बोमो खजी, तिगदा भिसम पत्रुसदेन
 यूहन्नासे येशू सिबाग्याम सोबा
 मुला, थेहङ् लसीन स्थान्दो सिबा
 म्हिगदेएनोन थेग्याम सोला भिसी म्हि-
 गदेदा लोप्बान मुबा।^३थेतबासेलमा

३:२४ “चुनोन धिनगदे” भिबा चा येशू ख्रीष्ट डाच्छा फेप्खबा धिनहेन्से दोःसी फेप्खबा
 धिनधोनाला ताम तखम्ला।

३:२२ व्यव १८:१५, १८ ३:२३ व्यव १८:१६ ३:२५ उत्प २२:१८

थेनीगदेसे पत्रुसदेन यूहन्नादा चुङ्जी, ओच्छे थे धुङ्गी ड्यसे तसी जिन्बासे लमा न्हङगरदडधोना भ्याल्खानरी थान्जी। ४ तर पत्रुसदेन यूहन्नासे पाङ्बा समाचार ड्यान्बा म्हिगदे न्हङरी ल्हानान म्हिगदेसे विश्वास लजी। विश्वास लबा म्हिगदे न्हङरी ओस्पन हजार डा ते हेम्कोलागदे मुबा।

५ ओच्छे न्हङगरदड यहूदी नेतागदे, यहूदी धर्मगुरुगदेदेन यहूदी गन्बागदे यरूशलेमरी पोप तजी। ६ थेरी परमेश्वरला मन्दिररी पूजा लबा मुल म्हि हन्नासदेन छ्याम कैयाफा, यूहन्ना,† अलेक्जेन्डर ओच्छे मुल म्हिला स्थान्दो हाडला म्हिगदेएनोन मुबा। ७ जमाहेन्से थेनीगदेसे पत्रुसदेन यूहन्नादा हाडला गुडरी भसी, “एनीगदेसे चु गे खाहङ्बा शक्तिदेन खाल्ला मिनग्याम लबा हिन्ना?” भिसी ड्योङ्जी।

८ जमाहेन्से परमेश्वरला आत्मासे प्लिङ्सी पत्रुससे चुहङ् भिसी भिजी, “यहूदी नेतागदेदेन यहूदी गन्बागदे, ९ चुदे हाङनीसे चु कुज्या म्हिला लागिरी तिनी डन्से ज्यबा गे लबासे लमा चु म्हिदा खाहङ् लसी खम्ना लजी भिसी ड्योङ्बा छार्बा लबा हिन्सम, १० चु ताम हाङनीदेन इस्राएलला जम्मान म्हिगदेदा था

तगै, हाङनीसे कुसरी टाँगब लसी साङ्बादेन परमेश्वरसे सिबाग्याम सोना लबा नासरतला येशू ख्रीष्टला मिनरी चु म्हि हाङनीला ओन्छाङरी खम्सी राप्बा मुला। ११ चुनोन येशूला बारेरी बचनरी चुहङ् भिसी भिबा मुला,

‘हाङनी डकर्मिगदेसे गे आखेल भिसी भ्याङ्बा युडबा चुनोन हिन्ना,

तर दान्दे चुनोन युडबा सुर युडबा दोबा मुला।’*

१२ ओच्छे थेसे बाहेक स्थान्दो खालै-से यहाङदा थार्बा पिन्बारी आखम, तिगदा भिसम जम्बुलिङला म्हिगदेला गुडरी यहाङदा सोना लबारी स्थान्दो खालैला मिन ओरे।”

१३ ओच्छे ल्हाना पढब आलबादेन तिगै तालिम आकिन्बा सोजो म्हि पत्रुसदेन यूहन्नासे म्हिगदेदा लोप्बा आँट लबा म्राङ्सी यहूदी नेतागदे, यहूदी धर्मगुरुगदेदेन यहूदी गन्बागदे उदेक म्हन्जी। जमाहेन्से थेनीगदेसे पत्रुसदेन यूहन्ना येशूदेन छ्याम चिबा चीम भिसी था याङ्जी। १४ थे कुज्या म्हि खम्सी पत्रुस, यूहन्नादेन छ्याम राप्सी चिबा म्राङ्बासे लमा थेनीगदेसे तिगै पाङ्बारी आखम्नी। १५ थेतबासेलमा थेनीगदेसे पत्रुसदेन यूहन्नादा अदालतग्याम मङ्ग्यार निउ

४:६ चु यूहन्ना चा येशूला चेला यूहन्ना आहिन।

४:११ भजन ११८:२२

भिसी कुल्जी। ओच्छे थेनीगदे ह्राड ह्राड न्हडरी चुहङ् भिसी सल्लाह लबारी छ्याइजी, ^{१६}“दाहेन्से य्हाडसे चु न्हीदा तिग लबा? तिग्दा भिसम चु न्हीसे लबा उदेकला गे यरूशलेमरी चिबा जम्मान म्हिगदेसे था याङ्सी जिन्बा मुला। ओच्छे चु ताम य्हाडसेनोन आहिन भिबारी आखम। ^{१७}तर चु ताम स्थान्दो म्हिगदेसे थाआयाङ्गै भिसी ‘दाहेन्से एनीगदेसे चु येशूला बारेरी खालै म्हिदा तिगै थापाङ्गो’ भिसी य्हाडसे चु न्हीदा पाङ्तो:ला।”

^{१८}जमाहेन्से थेनीगदेसे पत्रुसदेन यूहन्नादा ड्योइसी, “च्यागो, दाहेन्से एनीगदेसे येशूला बारेरी खालैदा तिगै थापाङ्गो ओच्छे तिगै ताम थालोप्गो” भिसी कुल्जी। ^{१९}तर पत्रुसदेन यूहन्नासे थेनीगदेदा “परमेश्वरला ताम आङ्यान्ना ह्राडनीला ताम ड्यान्बारी परमेश्वरला डाच्छा ठीक हिन्ना कि आहिन ह्राडनीसेन म्हन्गो। ^{२०}तिग्दा भिसम डन्से म्हाङ्बादेन थे:बा ताम आपाङ्ना डनी चिनोन आखम” भिसी जोहाब पिन्जी।

^{२१}थेनीगदेसे पत्रुसदेन यूहन्नादा सजाय पिन्बारी तिगै ग्याम आम्राङ्माहेन्से पत्रुसदेन यूहन्नादा ल्हानान बङ्सी पुइजी। तिग्दा भिसम थेरी तबा उदेकला गेला लागिरी जम्मान म्हिगदेसे परमेश्वरला जयजयकार

लबान मुबा। ^{२२}तिग्दा भिसम थे उदेकला गेग्याम खम्बा म्हि बोगल न्ही दिङ भन्दा ल्हाना तबा मुबा।*

येशूदा विश्वास लबा म्हिगदेला प्रार्थना

^{२३}थेग्याम पुइमाहेन्से पत्रुसदेन यूहन्ना ह्राडला ह्योगदे मुबा ग्लारी खजी। ओच्छे परमेश्वरला मन्दिररी पूजा लबा मुल म्हिगदेदेन यहूदी गन्बागदेसे पाङ्बा जम्मान ताम ह्योगदेदा पाङ्सी पिन्जी। ^{२४}थेनीगदेसे चु ताम थे:माहेन्से सेम गिक लसी परमेश्वरदेन छ्याम प्रार्थना लबारी छ्याइजी, “प्रभु, मु जम्बुलिङ्देन समुन्द्र ओच्छे थेरी मुबा जम्मान स्हे ह्राडसेन स्होबा हिन्ना।* ^{२५}ओच्छे ह्राडला गे लबा डन्ना आखे म्हेमे दाऊदला सुङ्ग्याम ह्राडला आत्मासे चुहङ् सुङ्बा मुबा,

‘अर्गु य्हुलला म्हिगदे तिग्दा बोमो खबा,

ओच्छे म्हिगदेसे तिग्दा गे

आखेल्ला तामगदे म्हन्बा?

^{२६}जम्बुलिङ्गला ग्लेगदेदेन शासन लबागदे

परमप्रभुदेन थेसे धम्बा थाबा

पिन्बा स्त्रीष्टला बिरोधरी

लडाइ लबाला लागिरी तयार

तजी।’*

२७ “चु सत्य ताम हिन्ना, तिग्दा भिसम हाडसे धम्बा तिगै दोष आरेबा हाडला गे लबा येशूला बिरोधरी हेरोददेन पन्तियस पिलातस ओच्छे अर्गु यहूलला म्हिगदे, इस्राएलीगदेदेन छ्याम चुनोन शहररी हुप तबा मुबा।* २८ डाच्छान हाडला सेमसे म्हन्बादेन हाडला शक्तिसे तिग लबारी म्हाइमुबा थे पूरा तबा मुला। २९ दाहेन्से प्रभु, थेनीगदेसे डन्दा लोड्ना लबा ताम हाडसे ढन्गो, ओच्छे हाडला गे लबा म्हि डन्दा हाडला बचन म्हिगदेदा थे:ना लबारी भड पिन्गो। ३० ओच्छे हाडला शक्तिग्याम आखम्बा म्हिगदेदा खम्ना लमा हाडला गे लबा तिगै दोष आरेबा येशूला मिनग्याम उदेकला चिनुदेन गे तगै।”

३१ चुहड् लसी प्रार्थना लसी जिन्माहेन्से थेनीगदे पोप तबा ग्ला लिगलिग तजी, ओच्छे थेनीगदे जम्मान परमेश्वरला आत्मासे प्लिङ्जी। जमाहेन्से थेनीगदे आलोड्ना परमेश्वरला बचन थे:ना लबारी छ्याइजी।

विश्वासीगदेला साभा सम्पत्ति

३२ चु धुइरी चा प्रभु येशूदा विश्वास लबा म्हिगदे न्हडला खालैसेनोन हाडला धन सम्पत्ति चु डाला हिन्ना भिसी आभिमुबा। थेनीगदे जम्मालान

सेम गिकनोन तबासे लमा थेनीगदेदेन छ्याम मुबा जम्मान धन सम्पत्ति य्हाडला भिसी भिमुबा।* ३३ थे मुल चेलागदेसे परमेश्वरला घेन शक्ति याड्सी प्रभु येशू सिबाग्याम सोबा हिन्ना भिबा तामला साक्षी दोसी पाड्मुबा, ओच्छे परमेश्वरसे थेनीगदे जम्मादान ल्हानान मोलम पिन्जी। ३४ थेनीगदेला न्हडरी खालैदान तिगै स्हेला खाँचो आतमुबा, तिग्दा भिसम वारी बु मुबादेन दिम मुबागदेसे थे चूड्सी खबा टाडगा भसी, ३५ मुल चेलागदेदा पिन्मुबा। ओच्छे जुन जुन म्हिदा खाँचो तमुबा थेनीगदेदा भो लसी पिन्मुबा। ३६ ओच्छे साइप्रस यहुल्साला लेवी वंशला योसेफ भिबा म्हिदा मुल चेलागदेसे बारनाबास भिसी मिन थान्मुबा (बारनाबास भिबा चा आँट पिन्बाला भा हिन्ना), ३७ थेसे हाडला वारी बु चूड्जी, ओच्छे टाडगा भसी मुल चेलागदेदा पिन्जी।

हननियादेन सफीरा

५ तर थेरी हननिया भिबा म्हि गिक मुबा, थेदेन थेला मिड सफीरासे हाडदेन छ्याम मुबा टोगल गिक वारी चूड्जी। २ थेन्नी ढिक्सी वारी चूड्सी खबा टाडगाग्याम तिगै टाडगा चा हाडदेन छ्याम थान्जी। ओच्छे बाँकी टाडगा चा हननियासे मुल चेलागदे

मुबा ग्लारी भसी जम्मान टाङ्गा चुदेन हिन्ना भिसी पाङ्जी।

३ जमाहेन्से पत्रुससे थेदा चुहङ् भिसी भिजी, “हननिया ए शैतानना तहरी चिसी तिग्दा परमेश्वरला आत्मादेन छ्याम लुसीला ताम पाङ्बा? ओच्छे हाङला वारी चूङ्सी खबा टाङ्गा तिग्दा छुम्सी थान्बा? ४ तिग थे वारी आचूङ्तेधोना एलान आहिन? ओच्छे चूङ्सी खबा टाङ्गाएनोन एलान मुबा, चु टाङ्गा एसे जे लइ म्हन्बा थेनोन लबारी खम्सेला मुबा। तर एदा चुहङ्बा गे लबा सेम खाहङ् लसी खजी? च्यागो, एसे म्हिगदेदा आहिन, तर परमेश्वरदा लुसीला ताम पाङ्बा मुला। ५ चुहङ्बा ताम थे:मैछ्याम हननिया सरी पाप्सी सिजी। जमाहेन्से चु ताम थे:बा म्हिगदे जम्मादान ल्हानान लोङ्बा खजी। ६ जमाहेन्से थेरी मुबा भ्योन म्हिगदे रे:सी थेला लास क्वानसे रिल्जी ओच्छे धुर्सारी भोर्सी ल्हुजी।

७ ओस्पन घण्टा सोम लिच्छा चु ताम था आयाङ्गनान हननियाला मिड न्हङरी खजी। ८ जमाहेन्से पत्रुससे थेदा “एनीगदेसे वारी ओतेरीन चूङ्बा हिन्ना? डादा पाङ्गो” भिसी भिमा, थेसे “लास्सो, ओतेरीन हिन्ना” भिसी भिजी।

९ जमाहेन्से पत्रुससे थेदा “एनीगदे ढिक्सी तिग्दा प्रभुला आत्मासे तिग लबा चीम भिसी च्याबारी म्हाङ्बा? च्यागो, एला हेम्बोदा धुर्सारी ल्हुबागदे प्रापरीन मुला, एदाएनोन थेनीगदेसे मङ्ग्यार भोर्ला” भिसी भिजी। १० थेहङ् भिमैछ्याम थे पत्रुसला काङ डामरी पाप्सी सिजी। जमाहेन्से थेला हेम्बोदा ल्हुसी खबा भ्योनगदे न्हङरी खमा थे सिसी जिन्मुबा, ओच्छे थेनीगदेसे थेदाएनोन भोर्सी थेला हेम्बोला डामरी ल्हुजी। ११ जमाहेन्से जम्मान मण्डलीदेन^१ चु ताम थे:बा जम्मान म्हिगदेदा ल्हानान लोङ्बा खजी।

मुल चेलागदेग्याम तबा उदेकला गे

१२ जमाहेन्से मुल चेलागदेग्याम म्हिगदेला गुडरी उदेकला गेगदे तबारी छ्याइजी, ओच्छे थेनीगदे जम्मान सोलोमनना दलानरी^१ सेम गिकनोन तसी हुप तमुबा। १३ तर प्रभु येशूदा विश्वास आलबा स्थान्दो म्हिगदे न्हङला खालैसेनोन प्रभु येशूदा विश्वास लबा म्हिगदेदेन छ्याम ढिक्सी चिबारी भङ आलनी, तसैनोन थेनीगदेसे प्रभु येशूदा विश्वास लबा म्हिगदेला बारेरी ज्यबान ताम लमुबा। १४ जमाहेन्से प्रभुदा विश्वास लबा

५:११ चु पदरी “मण्डली” भिबा चा प्रभु येशू ख्रीष्टदा विश्वास लबा यरूशलेमला म्हिगदे हिन्ना।

५:१२ “सोलोमनना दलान” भिबा चा सोलोमन ग्लेसे स्होबा दलान मुबा, चु दलान यरूशलेमला मन्दिररी मुबा।

हेम्फेबेदेन म्रिडम्हेमेगदेला हुल भन बढब तबान निजी। ^{१५}मुल चेलागदेसे लबा उदेकला गेला बारेरी थे:सी म्हिगदेसे आखम्बा म्हिगदेशोरी पत्रुस खमा थेला क्रिपसे जे भिसै स्याप्नै भिसी आखम्बा म्हिगदेदा थेनीगदेला तीबा नान्बादेन छ्यामनोन भसी ग्याम ग्यामरी थान्मुबा। ^{१६}ओच्छे यरूशलेमला क्यारक्युरला शहरग्यामसेनोन ल्हानान म्हिगदेसे आखम्बा म्हिगदेदेन म्हडसे स्याप्बा म्हिगदेदाएनोन थेरी भसी खमुबा। ओच्छे थे म्हिगदे जम्मान खम्मुबा।

मुल चेलागदेदा दुख पिन्बा

^{१७}परमेश्वरला मन्दिररी पूजा लबा मुल म्हि ओच्छे थेदेन छ्याम मुबा जम्मान सदुकीगदेसे मुल चेलागदेदा डाह लजी। ^{१८}ओच्छे मुल चेलागदेदा चुड्सी भ्याल्खानरी भाङ्जी। ^{१९}तर म्हुनड प्रभुला दूत गिक खसी भ्याल्खानना प्राप ठोङ्सी थेनीगदेदा मङ्ग्यार भसी चुहङ् भिसी भिजी, ^{२०}“एनीगदे निउ ओच्छे परमेश्वरला मन्दिररी राप्सी चु छार जुनीला बारेरी जम्मान ताम म्हिगदेदा थे:ना लउ।”

^{२१}स्वर्गदूतसे चुहङ् भिमाहेन्से थेनीगदे स्थोरीन परमेश्वरला मन्दिररी वाङ्सी म्हिगदेदा लोप्बारी छ्याङ्जी।

थेनोन धुइरी परमेश्वरला मन्दिररी पूजा लबा मुल म्हि, थेदेन छ्याम मुबा म्हिगदे खजी, ओच्छे इसाएली नेतागदे जम्मादान सभारी ड्योङ्जी। जमाहेन्से

मुल चेलागदेदा भ्याल्खानग्याम भबारी म्हिगदे पुङ्जी। ^{२२}तर परमेश्वरला मन्दिरला सिपाहीगदे भ्याल्खानरी धोखसी च्यामा थेनीगदेसे थेरी खालैदा आम्राङ्नी। थेतबासेलमा थेनीगदे दो:सी निसी चु ताम पाङ्जी। ^{२३}“डन्से भ्याल्खानरी ताल्चा लसी थान्बादेन पालेगदे प्रापरी राप्सी चिबा म्राङ्जी, तर डन्से प्राप ठोङ्सी च्यामा न्हङ्गी खालैदा आस्याप्नी।” ^{२४}परमेश्वरला मन्दिरला कप्तानदेन परमेश्वरला मन्दिररी पूजा लबा मुल म्हिगदेसे चु ताम थे:माहेन्से दाहेन्से तिग तला भिसी थेनीगदे अलमल तजी।

^{२५}थेनोन धुइरी थेरी खालै म्हि गिक खसी, “च्यागो, हाङ्नीसे भ्याल्खानरी भाङ्सी थान्बा म्हिगदे मी परमेश्वरला मन्दिररी राप्सी म्हिगदेदा लोप्बान मुला” भिसी भिजी। ^{२६}जमाहेन्से सिपाहीगदेदेन छ्याम परमेश्वरला मन्दिरला कप्तान निसी थेनीगदेदा कर आलना भजी। तिगदा भिसम म्हिगदेसे थेनीगदेदा युडबासे तोला भिसी थेनीगदे लोङ्मुबा।

^{२७}थेनीगदेसे थे मुल चेलागदेदा सभारी भसी डाच्छापट्टि राप्पुङ्जी। ओच्छे परमेश्वरला मन्दिररी पूजा लबा मुल म्हिसे मुल चेलागदेदा चुहङ् भिसी ड्योङ्जी, ^{२८}“एनीगदेदा डन्से येशूला मिन लसी खालैदा तिगै ताम थालोप्नो भिसी कुल्मुबा। तर च्यागो, एनीगदेसे लोप्बा चु ताम यरूशलेम नाङ्नोन थे:ना लसी जिन्जीम, ओच्छे

येशूदा साइबाला दोष एनीगदेसे डन्दा लबारी म्हाइबा मुला।”*

२६तर पत्रुसदेन स्थान्दो मुल चेलागदेसे चुहङ् भिसी भिजी, “डन्से म्हिगदेसे कुल्बा ताम आहिन, बरु परमेश्वरसे कुल्बा ताम चा ड्यान्नोन तो:मुला। ३०हाडनीसे येशूदा कुसरी टाँगब लसी साइबा मुबा, तर य्हाडला आखे म्हेमेला परमेश्वरसे येशूदा सिबाग्याम सोना लजी। ३१परमेश्वरसे इस्राएलीगदेसे हाडला पाप रुलासी परमेश्वरपट्टि दो:गै भिसी ओच्छे थेनीगदेला पापला दोष मेटब लबारी येशूदा शासन लबा म्हिदेन थार्बा पिन्बा म्हि स्होसी हाडला दाहिने छ्यापट्टि थान्जी। ३२चु जम्मान तामला साक्षी डनी मुला, थेहङ् नोन लसी परमेश्वरसे कुल्बा ताम ड्यान्बा म्हिगदेदा पिन्बा परमेश्वरला आत्माएनोन साक्षी मुला।”

३३चु ताम थे:माहेन्से थेनीगदेदा ल्हानान बोमो रे:जी, ओच्छे मुल चेलागदेदा साइबारी सल्लाह लबान मुबा। ३४तर यहूदी धर्मगुरुदेन छ्याम जम्मासेन मान लबा गमलिएल भिबा फरिसीसे सभाला डाच्छा रे:सी थेनीगदेदा छिन्नड मङ्ग्यार निउ भिसी भिजी। ३५ओच्छे थेसे सभाला म्हिगदेदा चुहङ् भिसी भिजी, “इस्राएलीगदे हाडनीसे चु म्हिगदेदा जे लबारी छ्याइबा मुला,

थेरी होशियार तउ। ३६तिगदा भिसम चु भन्दा डाच्छाएनोन थूदास भिबा म्हिसे डा घेन म्हि हिन्ना भिसी भिमुबा। ओच्छे थेदेन छ्याम ओस्पन ग्यार्जा ब्लि म्हिगदे भ्रमुबा, ओच्छे थेदा साइजी। जमाहेन्से थेदेन छ्याम भ्रबा जम्मान म्हिगदे ससा बडबड तजी, ओच्छे जम्मान गे आखेलबा तजी। ३७चु म्हि भन्दा लिच्छाएनोन य्हुल्साला म्हि भयाबा धुइरी गालीलग्याम यहूदा भिबा म्हि थोन्जी, ओच्छे ल्हानान म्हिगदे थेला लिच्छा भ्रजी, थेदाएनोन साइजी। जमाहेन्से थेदेन छ्याम भ्रबा म्हिगदे ससा बडबड तजी। ३८दान्देला चु तामला बारेरीनोन डाइ हाडनीदा पाङ्ला, चु म्हिगदेदा हाडनीसे तिगै आलना रुलागो। तिगदा भिसम चुगदेसे लबा चु गेदेन ताम म्हिगदेग्याम हिन्सम थे हङ् नोन म्हासी निला। ३९तर चु गे परमेश्वरग्याम तबा हिन्सम हाडनीसे रोकब लबारी आखम। रोकब लबारी म्हाइजी भिसम हाडनी परमेश्वरला बिरोधरी रे:जीम भिबा ताम था तला।”

जमाहेन्से थेनीगदेसे थेला ताम ड्यान्जी। ४०ओच्छे थेनीगदेसे मुल चेलागदेदा न्हडरी ड्योइसी तोबा ग्याङ्बा लजी। ओच्छे “दो:सी खाइमै येशूला मिन किन्सी तिगै ताम थापाङ्गो” भिसी थेनीगदेदा पुइजी।

४१ जमाहेन्से येशूला मिनरी बेइज्जत नाबाधोनाला तजी भिबा तामरी ताङ्सी ताङ्सी मुल चेलागदे थे सभाग्याम थोन्सी निजी। ४२ ओच्छे थेनीगदे धिन धिननोन परमेश्वरला मन्दिरदेन दिम दिमरी निसी येशून थाबां पिन्बा ख्रीष्ट हिन्ना भिसी थाबां पिन्बा समाचार थे:ना लबारी आख्लानी।

चबा थुङ्बा भो लसी पिन्बाला लागिरी धम्बा गोर निस म्हि

६ थे धुइरी येशूदा विश्वास लबा म्हिगदे बढब तबान निमुबा। जमाहेन्से हिबू ग्योइ पाङ्बा यहूदीगदेला^१ बिरोधरी ग्रीक ग्योइ पाङ्बा यहूदीगदेसे तामगन लबारी छ्याइजी। तिगदा भिसम ग्रीक ग्योइ पाङ्बा यहूदीगदेला हेम्बो सिबा म्रिडम्हेमेगदेसे धिनना धिन तो:तेधोना चबा थुङ्बा आयाङ्मुबा। २ जमाहेन्से च्युक न्ही चेलागदेसे येशूदा विश्वास लबागदेदा ड्योइसी चुहङ् भिसी भिजी, “परमेश्वरला बचन थे:ना लबा गे ख्लासी चबा थुङ्बा पिन्बा गे लबारी डन्दा ठीक आत। ३ थेतबासेलमा आलेगदे, एनीगदे न्हङला परमेश्वरला आत्मादेन बुद्धिसे प्लिङ्बा, ओच्छे जम्मासेन मान लबा गोर निस म्हिदा धम्गो, डन्से चु गे थेनीगदेदा जिम्मा पिन्ना। ४ तर डन्से चा प्रार्थना लबादेन

परमेश्वरला बचन थे:ना लबा गे लला।”

५ चु ताम येशूदा विश्वास लबा जम्मान म्हिगदेदा सेम निजी। ओच्छे थेरी मुबा जम्मादान थे ताम ज्यबा छोर्सी थेनीगदेसे पूरा विश्वास मुबादेन परमेश्वरला आत्मासे प्लिङ्बा स्तिफनस, फिलिप, प्रखरस, निकनोर, तीमोन, पर्मिनासदेन एन्टिओखिया भिबा शहरला यहूदी धर्म तेन्बा निकोलाउसदा धम्जी। ६ ओच्छे थे म्हिगदेदा मुल चेलागदे मुबा ग्लारी भजी। जमाहेन्से मुल चेलागदेसे थे म्हिगदेथोरी ह्वाङला या थान्सी प्रार्थना लजी।

७ परमेश्वरला बचन ल्हानान ग्लारी थे:बान निजी, ओच्छे यरूशलेमरी प्रभु येशूदा विश्वास लबा म्हिगदे बढब तबान निजी। परमेश्वरला मन्दिररी पूजा लबा म्हिगदे न्हङला ल्हानान म्हिगदेसेनोन प्रभु येशूदा विश्वास लजी।

स्तिफनसदा चुङ्सी यहूदीगदे हुप तबा दिमरी भोर्बा

८ जमाहेन्से स्तिफनस परमेश्वरला दयामायादेन शक्तिसे प्लिङ्सी म्हिगदेला गुडरी घेन घेन गेगदे लसी उदेकला चिनुगदे उन्बान मुबा। ९ तर दान्दे नोकर आहिन्बा म्हिगदे भिबा

६:१ हिबू ग्योइ पाङ्बा यहूदीगदे चा इस्राएलीगदे हिन्ना। ओच्छे ग्रीक ग्योइ पाङ्बा यहूदीगदे चा अर्गु यहूलला म्हिगदे हिन्ना।

हुप तबा दिमग्याम कोइ कोइ म्हिगदे स्तिफनस मुबा ग्लारी खसी आतो:बा आतो:बा ताम लबारी छ्याइजी। थे म्हिगदे चा अलेक्जेन्ड्रिया, कुरेनी, किलिकिया ओच्छे एशियाला म्हिगदे मुबा। १० स्तिफनससे परमेश्वरला आत्मादेन बुद्धिग्याम पाङ्बा तामला जोहाब थेनीगदे खालैसेन पिन्आखम्मी।

११ जमाहेन्से थेनीगदेसे न्हड न्हडरी म्हिगदेदा थीसी घुस पिन्बान चुहङ् भिसी पाङ्पुङ्जी, “चुसे परमेश्वरदेन मोशाला बिरोध^१ लसी ताम पाङ्बा डन्से थे:जी।” १२ चुहङ्बा ताम लसी थेनीगदेसे म्हिगदे, यहूदी गन्बागदेदेन यहूदी धर्मगुरुगदेदा थीजी। ओच्छे थेनीगदेसे स्तिफनसदा चुङ्सी यहूदी धर्मला अदालतरी भोजी।

१३ जमाहेन्से थेनीगदेसे स्तिफनसला बिरोध लसी लुसीला ताम पाङ्बा म्हिगदेदा भजी। थे म्हिगदेसे चुहङ् भिसी पाङ्जी, “चु म्हिसे परमेश्वरला मन्दिरदेन मोशाला ठिमला बिरोध लसी ताम पाङ्बारी आख्लानी। १४ तिगदा भिसम चुसे मी ‘नासरतला येशूसे परमेश्वरला चु मन्दिरदा फुप्ला ओच्छे मोशासे यहाडदा पिन्बा रिमठिमएनोन पोसी पिन्ना’ भिबा डन्से थे:जी।”

१५ जमाहेन्से यहूदी धर्मला अदालतरी चिबा जम्मान म्हिगदेसे थेदा ज्यना

लसी च्याजी। ओच्छे थेला ली स्वर्गदूतला ली हङ्बान यहाल यहाल्बा म्हाङ्जी।

स्तिफनससे म्हिगदेदा पाङ्बा

७ जमाहेन्से परमेश्वरला मन्दिररी पूजा लबा मुल म्हिसे, “चु ताम सत्य हिन्ना?” भिसी ड्योइमा, २ स्तिफनससे चुहङ् भिसी भिजी, “आबागदेदेन ज्योज्यो आलेगदे चु ताम ड्यान्गो। जम्मान भन्दा घेन शक्ति मुबा परमेश्वरसे यहाडला आखे म्हेमे अब्राहाम हारान भिबा नाम्सारी फेप्ला भन्दा डाच्छा मेसोपोटामिया भिबा ग्लारी स्थूबा धुङ्री थेसे परमेश्वरदा हाडला डाच्छापट्टि म्हाङ्जी।* ३ परमेश्वरसे थेदा ‘ए हाडला यहुल्सादेन हाडला म्हिगदे ख्लासी डाइ उन्बा यहुल्सारी निउ’ भिसी सुङ्बा मुबा।*

४ “जमाहेन्से थे कल्दीगदेला यहुल्साग्याम थोन्सी हारान भिबा नाम्सारी खसी चिजी। ओच्छे थेला आबा सिमाहेन्से परमेश्वरसे थेदा थे ग्लाग्याम दान्दे हाडनी स्थूबान लबा चु शहररी भजी।* ५ परमेश्वरसे थेदा थे ग्लारी निसी सम्पत्ति मी आहिन काड थान्बा ग्ला सुतै आपिन्नी। तर सन्तान आरेसैनोन परमेश्वरसे थे ग्ला थेदेन

६:११ चुरी “मोशाला बिरोध लसी” भिबा चा परमेश्वरसे मोशादा पिन्बा ठिमला बिरोधरी भिबा हिन्ना।

७:२-३ उत्प १२:१ ७:३ उत्प १२:१ ७:४ उत्प ११:३१; १२:४

थेला सन्तानदा पिन्ना भिसी कबुल लबा मुबा।* ६ओच्छे परमेश्वरसे थेदा “एला सन्तान अर्गु यहुल्सारी निसी चितो:बा मुला, थे ग्लाला म्हिगदेसे थेनीगदेदा घ्यबा स्होसी ग्यार्जा ब्लि दिडधोना थेनीगदेसे नाआखम्बा दुख पिन्ना’ भिसी सुङ्जी।* ७दो:सी परमेश्वरसे चुहङ् भिसी सुङ्जी, ‘थेनीगदे जुन यहुलला म्हिगदेला घ्यबा दो:सी चिला डाइ थे यहुलला म्हिगदेदा सजाय पिन्ना। जमाहेन्से थेनीगदे थे ग्लाग्याम थोन्सी चुनोन ग्लारी खसी डादा तेन्ना।’

८“परमेश्वरसे अब्राहामदेन छ्याम खतनाला कबुल लजी। हाडला भा इसहाक न्हसी भ्रे:रे तमाकुनु अब्राहामसे थेला खतना लजी। इसहाकसेनोन हाडला भा याकूबला खतना लजी, थेहङ् लसीन याकूबसेनोन हाडला च्युक न्ही कोलागदेला खतना लजी। ओच्छे थेला च्युक न्ही कोलागदे यहाड जम्मालान आखे म्हेमे दोजी।*

९“थे आखे म्हेमेगदे न्हडरी योसेफ भिबादा थेला ज्योज्योगदेसे डाह लसी मिश्र यहुल्सारी चूङ्सी पिन्जी। तसैनोन थेदेन छ्याम परमेश्वर मुबा।* १०योसेफदा परमेश्वरसे जम्मान दुखग्याम फेजी। ओच्छे

परमेश्वरसे थेदा ज्यबा बुद्धि पिन्बासे लमा मिश्र यहुल्साला ग्ले फारोसे थेदा सेम निसी मान लजी। जमाहेन्से थेदा मिश्र यहुल्सादेन ग्लेखाडला हाकिम स्होजी।*

११“लिच्छा मिश्र यहुल्सादेन कनान यहुल्सा नाडनोन अनिकाल तसी घेन दुख तजी, थेतबासेलमा यहाडला आखे म्हेमेसे चबा स्हे तिगैनोन आयाङ्नी।* १२तर याकूबसे मिश्र यहुल्सारी चबा स्हे मुला भिबा ताम थे:माहेन्से थेला भागदे यहाडला आखे म्हेमेदा थेरी पुङ्जी। थेनीगदे मिश्र यहुल्सारी निबा चु डाच्छारेम मुबा। १३ओच्छे दो:सी हुप तमा योसेफसे हाडला ज्योज्यो आलेगदेदा हाड खाल हिन्ना भिसी डोसेना लजी। जमाहेन्से योसेफला जम्मान म्हेमेला बारेरी फारो ग्लेसे था याङ्जी।* १४जमाहेन्से योसेफसे हाडला आबा याकूबदेन हाडला म्हिगदेदा चुरी भसी खउ भिसी पुङ्जी। याकूबला हाडला म्हेमेदेन हाडला म्हिगदे लसी बोगल सोमसे च्युक डा म्हि मुबा।* १५जमाहेन्से याकूब हाडला जम्मान म्हिगदेदा भोर्सी मिश्र यहुल्सारी निजी, ओच्छे थे थेरीन सिजी। थेहङ् लसीन थेला भागदे यहाडला आखे म्हेमेगदेनोन थेरीन

७:५ उत्प १२:७; १३:१५; १५:१८; १७:८ ७:६-७ उत्प १५:१३-१४; प्रस्था ३:१२

७:८ उत्प १७:१०-१४; २१:२-४; २५:२६; २६:३०-३५ ७:६ उत्प ३७:११, २८; ३६:२, २१

७:१० उत्प ४१:३६-४१ ७:११ उत्प ४२:१-२ ७:१३ उत्प ४५:१, १६

७:१४ उत्प ४५:६-१०, १७-१८; ४६:२७

सिजी।* १६लिच्छा मिश्र यहुल्साग्याम थेनीगदेला सिबा लहुइदा शकेम भिबा ग्लारी भोर्सी धुर्सारी थान्जी। थे धुर्सा अब्राहामसे हमोर भिबा म्हिला भागदेदा टाङ्गा फासी ग्लुबा मुबा।*

स्तिफनससे मोशाला बारेरी पाङ्बा

१७“परमेश्वरसे अब्राहामदेन छ्याम लबा कबुल पूरा तबारी छ्याइबा धुइ तसी जिन्बा मुबा, थे धुइरी मिश्र यहुल्सारी यहाडला आखे म्हेमेला सन्तानगदे ल्हानान बढब तबान निजी। १८जमाहेन्से मिश्र यहुल्सारी योसेफदा डोआसेबा स्थान्दो ग्लेसे शासन लबारी छ्याइजी।* १९थे ग्लेसे यहाडला यहुलला म्हिगदेदा धोका पिन्सी ल्हानान दुख पिन्जी। ओच्छे थेनीगदेसे यहाडला आखे म्हेमेला भर्खर न्हबा कोलागदेदा मङ्ग्यार थान्पुङ्जी। चुहङ् लसी भर्खर न्हबा जम्मान कोलागदेदा सिना लजी।*

२०“थेनोन धुइरी मोशा न्हजी। थे परमेश्वरला डाच्छापट्टि जेबा म्हि मुबा। थेदा ला सोमधोना हाडलान आबाला दिमरी सयार लसी थान्जी।* २१थेदा मङ्ग्यार भोर्सी थान्माहेन्से फारोला भामेसे थेदा भोर्जी, ओच्छे हाडलान भा स्होसी सयार लसी न्हजी।* २२जमाहेन्से मोशादा

मिश्रीगदेला बुद्धि लोप्जी, ओच्छे मोशासे पाङ्बा तामदेन गे शक्तिशाली मुबा।

२३“बोगल न्ही दिड तमाहेन्से मोशासे हाडला इस्राएली ज्योज्यो आलेदेन छ्याम हुप तबा सेम लजी।*

२४मिश्री गिकसे हाडला इस्राएली ज्योज्यो आले न्हडला गिकदा अन्याय लबा म्राङ्सी मोशासे थेदा जोगब लसी थे मिश्रीदा साइसी हाडला आलेथोरी लबा अत्याचारला बदला किन्जी।

२५ङाग्यामसेन परमेश्वरसे थेनीगदेदा चु दुखग्याम फेला भिबा ताम डाला ज्योज्यो आलेसे घोला भिसी मोशासे म्हन्बा मुबा। तर थेनीगदेसे थे ताम आघोनी। २६न्हडगरदड इस्राएली न्ही हाड हाड न्हडरी छेबा बङ्बा लसी चिबा धुइरी मोशा खजी, ओच्छे थेनीगदेदा ढिक्का लबारी म्हाइसी ‘होगदे, एनीगदे मी ज्योज्यो आले हिन्ना, तिग्दा हाड हाड न्हडरी छेबा?’

२७“तर हाडला खिम्जेमदा अन्याय लबा म्हिसे थेदा धुर आङ्सी चुहङ् भिजी, ‘एदा डन्दा शासन लबा म्हिदेन न्यायाधीश दोबारी खाल्से धम्जी? २८तिग तिल्मा एसे थे मिश्रीदा साइबा हङ्नोन डादाएनोन साइबारी म्हाइबा?’ २९चुहङ्बा ताम थे:सी

७:१५ उत्प ४६:१-७; ४६:३३ ७:१६ उत्प २३:३-१६; ३३:१६; ५०:७-१३; यहो २४:३२

७:१७-१८ प्रस्था १:७-८ ७:१९ प्रस्था १:११-१३, २२ ७:२० प्रस्था २:२

७:२१ प्रस्था २:३-१० ७:२३-२६ प्रस्था २:११-१५; १८:३-४

मोशा मिद्यान भिबा यहुल्सारी यासीं विदेशी दोसी चिजी। थेरी थेला भा न्ही न्हजी।

३० “मिद्यान यहुल्सारी चिबा बोगल न्ही दिड तमा मोशासे सीनै भिबा गडला डामरी तोडतोडबा ग्लारी लुङ्बा भाडरी मे ल्हामरी स्वर्गदूत गिक म्राङ्जी।” * ३१ चु म्राङ्सी मोशा उदेक तजी, ओच्छे जजाकी डामरी निसी च्यामा परमेश्वरसे चुहङ् भिसी सुङ्बा थे:जी। ३२ ‘डा एला आखे म्हेमे अब्राहाम, इसहाकदेन याकूबला परमेश्वर हिन्ना।’ चु थे:सी मोशा लोङ्सी फितफित धर्सी थेपट्टि च्याबारीन आख्मनी।

३३ “जमाहेन्से परमेश्वरसे मोशादा चुहङ् भिसी सुङ्जी, ‘एला लखम स्युगो। तिगदा भिसम ए राप्बा ग्ला चोखो ग्ला हिन्ना। ३४ डाइ मिश्र यहुल्सारी मुबा डाला म्हिगदेदा लबा अन्याय म्राङ्सी जिन्बा मुला, ओच्छे थेनीगदेला दुखला तामएनोन थे:सी जिन्बा मुला। थेतबासेलमा थेनीगदेदा थे अन्यायदेन दुखग्याम फेबाला लागिरी डा मार फाप्बा हिन्ना। दाहेन्से डाइ एदा मिश्र यहुल्सारी पुइला।’

३५ “चुनोन मोशादा थेनीगदेसे ‘एदा खाल्से डन्दा शासन लबा म्हिदेन न्यायाधीश स्होजी’ भिसी पत्याब

आतमुबा, थेनोन मोशादा परमेश्वरसे लुङ्बा भाडला मे ल्हामरी म्राङ्बा स्वर्गदूतग्याम शासन लबा म्हिदेन इस्राएलीगदेदा दुखग्याम फेबा म्हि स्होसी पुइजी।” * ३६ चुनोन मोशासे मिश्र यहुल्सारी, वाला भिबा समुन्द्रदेन बोगल न्ही दिडधोना तोडतोडबा ग्लारी उदेकला गेगदेदेन चिनुगदे उन्बान इस्राएलीगदेदा मिश्र यहुल्साग्याम फेसी भबा मुबा।”


३७ “चुनोन मोशासे इस्राएलीगदेदा ‘परमेश्वरसे डादा पुइखबा हङ् लसी एनीगदे न्हङ्ग्यामसेन एनीगदेला लागिरी अगमवक्ता गिक पुइखला’ भिसी पाङ्मुबा।” * ३८ चुनोन मोशा तोडतोडबा ग्लारी म्हिगदेदेन छ्याम मुबा धुइरी स्वर्गदूतदेन छ्याम मुबा, थेनोन स्वर्गदूतसे सीनै भिबा गडरी यहाडला आखे म्हेमेदेन छ्याम ताम पाङ्मुबा, थेसेन यहाडदा पिन्बाला लागिरी छोन्बो बचन याङ्बा मुबा।” *

३९ “थेसे कुल्बा ताम आङ्यान्ना यहाडला आखे म्हेमेसे थेदा रूलासी मिश्र यहुल्सारीन दो:सी निबा सेम लजी। ४० जमाहेन्से थेनीगदेसे हारूनदा ‘यहाडला डाच्छा डाच्छा भ्रबा तिगै लगदे स्होसी पिन्गो। तिगदा भिसम डन्दा मिश्र यहुल्साग्याम फेसी भबा चु मोशादा तिग तगेम

७:३०-३४ प्रस्था ३:१-१० ७:३५ प्रस्था २:१४

७:३६ प्रस्था ७:५; १४:२१; गन्ती १४:३३ ७:३७ व्यव १८:१५, १८

७:३८ प्रस्था १६:१-२०:१७; व्यव ५:१-३३



परमेश्वर धन्छ्याबा पाल (७:४४-४७)

य्हाडदा था आरे' भिसी भिजी।*
 ४१ जमाहेन्से थेनीगदेसे म्हे बहरला
 मूर्ति गिक स्होसी थेरी बलि पिन्जी,
 ओच्छे हाडसे लबा गेरी थेनीगदे
 ल्हानान ताड्जी।* ४२ थेतबासेलमा
 परमेश्वरसे थेनीगदेदा रूलाजी,
 ओच्छे थेनीगदेसे म्हन्बा हड्णोन
 मुरी मुबा सारगदेदा तेन्बारी रूलासी
 पिन्जी। चु ताम अगमवक्तागदेसे
 डाच्छान परमेश्वरला बचनरी भिबा
 मुबा,

‘इसाएलीगदे तिग एनीगदे बोगल
 न्ही दिडधोना तोडतोडबा
 ग्लारी मुबा धुइरी
 एनीगदेसे डादा जन्तुला बलिदेन
 भेटीगदे पिन्जी? आपिन्नी।*

४३ तर एनीगदेसे मोलोख भिबा
 लला पालदेन रेफन भिबा
 लला सार,
 ओच्छे एनीगदेसे तेन्बा लला
 मूर्तिगदे थीसी भोर्जी।
 थेतबासेलमा दाहेन्से डाइ
 एनीगदेदा सजाय पिन्बाला
 लागिरी
 बेबिलोन भिबा ग्लाग्याम
 क्याम्सडपट्टि पुइला।’

स्तिफनससे परमेश्वर धन्छ्याबा
 पालला बारेरी पाड्बा

४४ “य्हाडला आखे म्हेमे तोडतोडबा
 ग्लारी मुबा धुइरी थेनीगदेदेन छ्याम
 परमेश्वर धन्छ्याबा पाल मुबा। थे

पाल मोशासे म्राड्बादेन परमेश्वरसे
कुल्बा अन्छार स्होबा मुबा।*

४५ परमेश्वरसे अर्गु यहुलला म्हिगदेदा
तेःसी थेनीगदेला यहुल्सा यहाडला
आखे म्हेमेदा शासन लपुङ्जी। थे
पाल यहोशूसे थेनीगदेला यहुल्सा
ढासी किन्बा धुइरी थेनीगदेदेन
छ्यामनोन भजी। थेहङ् लसीन दाऊद
ग्लेला धुइधोनान थे पाल थेनीगदेदेन
छ्यामनोन मुबा।* ४६ दाऊद ग्लेसे
परमेश्वरला दयामाया याङ्सी थेसे
याकूबला परमेश्वरला लागिरी दिम
स्होम्याङ्गै भिसी परमेश्वरदेन छ्याम
बिन्ती लजी।* ४७ तर परमेश्वरला
लागिरी दिम चा सोलोमन ग्लेसें
स्होजी।*

४८ “तर म्हिसे स्होबा दिमरी जम्मान
भन्दा घेन परमेश्वर धन्आछ्या,
ओच्छे अगमवक्तागदेसेनोन चुहङ्
पाङ्बा मुला। ४९ परमेश्वरसे चुहङ्
भिसी सुङ्बा मुला,

‘डाला ठि स्वर्ग हिन्ना,

ओच्छे जम्बुलिङ डाला काङ

थान्बा ग्ला हिन्ना।

एनीगदेसे डाला लागिरी खाहङ्बा
दिम स्होजी?

ओच्छे डाइ ब्लप्बा न्हबा ग्ला

खानङ मुला?

५० तिग चु जम्मान स्हे डालान यासे
स्होबा आहिन?’ ”*

५१ दोःसी स्तिफनससे चुहङ् भिसी
भिजी, “युङ्बा हङ्बा सेम थोबा
म्हिगदे, एनीगदेसे हाडला सेमरी
परमेश्वरदा खाइमै आथान्नी। ओच्छे
एनीगदेला आखे म्हेमेगदेसे लबा
हङ्नोन एनीगदेसेनोन परमेश्वरला
आत्मासे पाङ्बादा सदन बिरोध
लजी।* ५२ एनीगदेला आखे म्हेमेगदेसे
अगमवक्तागदे न्हडला खजिबा
अगमवक्तादा चा दुख आपिन्नी तला?
थेनीगदेसे परमेश्वरसे म्हन्बा अन्छार
भ्रबा म्हिं फेप्खबान मुला भिसी थेःना
लबागदे जम्मादान साइजी। दान्दे
हाङ्नी चा परमेश्वरसे धम्बा म्हिदा
धोका पिन्बादेन साइबा म्हि दोजी।
५३ हाङ्नीसे स्वर्गदूतगदेला याग्याम
पिन्बा मोशाला ठिम मी याङ्जी। तर
हाङ्नीसे थे ठिम आङ्यान्नी।”

स्तिफनस सिबा

५४ स्तिफनसला चुहङ्बा ताम
थेःसी थेनीगदे बोमोसे म्लाङ म्लाङ
तसी स्वा क्रेबारी छ्याइजी। ५५ तर
स्तिफनस चा परमेश्वरला आत्मासे
प्लिङ्सी एकोहोरो स्वर्गपट्टि च्याजी।
ओच्छे थेसे परमेश्वरला घेन य्हालरी

७:४७ “सोलोमन ग्ले” चा दाऊद ग्लेला भा हिन्ना।

७:५२ “परमेश्वरसे म्हन्बा अन्छार भ्रबा म्हि” चा येशू ख्रीष्ट हिन्ना।

७:४४ प्रस्था २५:६, ४० ७:४५ यहो ३:१४-१७ ७:४६ २ शमू ७:१-१६; १ इति १७:१-१४

७:४७ १ राजा ६:१-३८; २ इति ३:१-१७ ७:४६-५० यशै ६६:१-२ ७:५१ यशै ६३:१०

येशूदा परमेश्वरला दाहिनेपट्टि राप्सी धन्छ्याबा म्राङ्जी। ^{५६}ओच्छे थेसे “च्यागो, डाइ स्वर्ग ठोङ्बादेन परमेश्वरसे पुइखबा म्हि येशूदा परमेश्वरला दाहिनेपट्टि राप्सी धन्छ्याबा म्राङ्बा मुला” भिसी भिजी।

^{५७}तर थेनीगदेसे नाब्यड ख्यासी घेन काइ लसी क्रिङ्सी तिक्खुरीन स्तिफनसदा व्हाजी। ^{५८}जमाहेन्से थेनीगदेसे युडबासे तोसी साइबाला लागिरी स्तिफनसदा शहरग्याम तेःसी भोर्जी। चुहङ् लबा म्राङ्बा म्हिगदेसे हाड हाडला क्वान स्युसी शाऊल भिबा भ्योन म्हिदा जिम्मा लसी स्तिफनसदा युडबासे तोजी।

^{५९}थेनीगदेसे चुहङ् लसी युडबासे तोबा धुइरी स्तिफनससे “प्रभु, येशू डाला आत्मा हाडसे किन्गो” भिसी प्रार्थना लजी। ^{६०}जमाहेन्से थेसे पुइ जूसी घेन काइ लसी, “प्रभु, चु पापला दोष थेनीगदेदा थाखगै” भिमैछ्याम थेला सा निजी।

शाऊलसे येशूदा विश्वास लबा म्हिगदेदा दुख पिन्बा

स्तिफनसदा साइबारी शाऊलएनोन ढिक्का मुबा। थेनोन धिनकुनुहेन्से यरूशलेमरी मुबा मण्डलीला बिरोधरी ल्हानान दुख तबारी छ्याइजी, ओच्छे मुल

चेलागदे बाहेक थेनीगदे जम्मान ससा बडबड तसी यहूदियादेन सामरियाला ग्लारीक्वार यार्जी। ^२जमाहेन्से परमेश्वरदा तेन्बा म्हिगदेसे स्तिफनसला लासदा भोर्सी ल्हुजी, थे सिबासे लमा थेनीगदे ल्हानान क्राबा क्रिङ्बा लजी। ^३तर शाऊलसे चा येशूदा विश्वास लबा म्हिगदेदा नाश लबारी छ्याइजी। ओच्छे दिम दिमरी वाङ्सी हेम्फेबे, म्रिडम्हेमे जम्मादान छेङ्बान भोर्सी भ्याल्खानरी भाङ्जी। *

फिलिपसे सामरियारी थाबा पिन्बा समाचार थेःना लबा

^४जमाहेन्से थे ससा बडबड तसी थाबा म्हिगदेसे हाड धोतेबा ग्लारी थाबा पिन्बा समाचार थेःना लजी। ^५फिलिप चा सामरियाला शहर गिकरी निसी थाबा पिन्बा ख्रीष्टला बारेरी पाङ्जी। ^६फिलिपसे पाङ्बादेन थेसे लबा उदेकला चिनु म्राङ्सी थेरी मुबा म्हिगदेसे थेला तामदा सेम लसी ड्यान्जी। ^७तिगदा भिसम थेरी मुबा ल्हानान म्हिदा ल्हुङ्ग्याम घेन काइ लसी क्रिङ्बान म्हड थोन्सी निबारी छ्याइजी। ओच्छे थेरी मुबा काड या चलब आतबादेन कुज्या म्हिगदेदाएनोन खम्ना लबा मुबा। ^८थेतबासेलमा थे शहरला म्हिगदे ल्हानान ताङ्जी।

जादु उन्बा सिमोन

९थे शहररी सिमोन भिबा म्हि गिक मुबा। थेसे डाच्छाहेन्सेन थे शहररी जादु लसी सामरियाला म्हिगदेदा उदेक तना लबा मुबा। ओच्छे थेसे ह्वाडसे ह्वाडदान डा ह्वाडबा खालै आरे भिसी म्हन्मुबा। १०थेदा यहुल्साला जजाबा म्हिहेन्से घेनधोनाला जम्मान म्हिगदेसे “चु परमेश्वरला शक्ति हिन्ना” भिसी तेन्मुबा, “चुदा जम्मान भन्दा घेन शक्ति भिमुला।” ११थे ग्लाला म्हिगदेसे सिमोनसे भिबा ताम ड्यान्सी थेदेन छ्याम भ्रमुबा। तिग्दा भिसम थेसे ल्हानान धुइहेन्से जादु लसी म्हिगदेदा उदेक तना लबा मुबा। १२तर थेनीगदेसे परमेश्वरला यहुल्सादेन येशू ख्रीष्टला मिनना समाचार थे:ना लबा फिलिपला तामरी विश्वास लजी। जमाहेन्से हेम्फेबेदेन म्रिडम्हेमे जम्मासेन बप्तिस्मा किन्जी। १३सिमोनसेनोन विश्वास लसी बप्तिस्मा किन्जी, ओच्छे थे फिलिपदेन छ्याम भ्रबारी छ्याइजी। ओच्छे फिलिपसे लबा घेन घेन उदेकला गेदेन चिनुगदे म्हाइसी सिमोन उदेक तजी।

१४सामरियाला म्हिगदेसे परमेश्वरला बचनरी विश्वास लजी भिबा थे:सी यरूशलेमरी मुबा मुल चेलागदेसे पत्रुसदेन यूहन्नादा थेनीगदे मुबा ग्लारी पुइजी। १५थेनीगदे सामरियारी धोखसी थेरी मुबा विश्वासीगदेसे परमेश्वरला आत्मा

याड्गै भिसी पत्रुसदेन यूहन्नासे प्रार्थना लजी। १६तिग्दा भिसम थे धुइधोना थेनीगदे न्हडला खालैथोरीनोन परमेश्वरला आत्मा फेप्खबा आरेमुबा। थेनीगदेला बप्तिस्मा प्रभु येशूला मिनरी जे तबा मुबा। १७पत्रुसदेन यूहन्नासे थेनीगदेथोरी या थान्सी प्रार्थना लमाहेन्से थेनीगदेसे परमेश्वरला आत्मा याड्जी।

१८मुल चेलागदेसे या थान्मा परमेश्वरला आत्मा याड्बा म्हाइमाहेन्से सिमोनसे थेनीगदेदा टाडगा पिन्बारी छ्याइबान, १९“डादाएनोन चु शक्ति पिन्गो, ओच्छे डाइ जुन म्हिथोरी या थान्ना थे म्हिसे परमेश्वरला आत्मा याड्गै” भिसी भिजी। २०तर पत्रुससे सिमोनदा चुहड् भिसी भिजी, “एला टाडगा एदेन छ्यामनोन नाश तगै। तिग्दा भिसम परमेश्वरला मोलम टाडगासे ग्लुखम्ला भिसी एसे म्हन्जी। २१परमेश्वरला डाच्छा एला सेमसे म्हन्बा ताम ठीक आरेबासे लमा चु गेरी एला तिगै भोदेन अधिकार आरे। २२थेतबासेलमा एसे म्हन्बा चु आज्यबा नइबा तामदा ख्लासी परमेश्वरपट्टि दो:सी परमेश्वरदेन छ्याम प्रार्थना लसम एला सेमरी म्हन्बा चुहड्बा तामदा परमेश्वरसे माफ पिन्ना तला। २३तिग्दा भिसम एला सेम डाहसे प्लिड्बादेन पापला तहरी मुला भिबा ताम डादा था मुला।”

२४जमाहेन्से सिमोनसे “ह्वाडनीसे सुड्बा ताम डाथोरी थाखगै भिसी

हाडनीसेन परमेश्वरदेन छ्याम डाला
लागिरी प्रार्थना लसी पिन्गो” भिसी
भिजी।

२५ ओच्छे पत्रुसदेन यूहन्नासे
येशूसे लबा हाडसेन प्राड्बा गेदेन
प्रभुला बचनग्याम घोना लमाहेन्से
सामरीगदेला ल्हानान नाम्सागदेरी
थार्बा पिन्बा समाचार थे:ना लबान
थेनीगदे यरूशलेमरी धोजी।

फिलिपसे इथियोपिया भिबा सरकाररी म्हिदा स्याप्बा

२६ जमाहेन्से प्रभुला दूत गिकसे
फिलिपदा “ए रे:सी ल्होपट्टि
यरूशलेमग्याम गाजापट्टि निउ। थे
ग्याम तोडतोडबा मुला” भिसी भिजी।
२७ थेतबासेलमा फिलिप रे:सी निजी,
थेसे नपुंसक गिकदा स्याप्जी थे
नपुंसक इथियोपिया भिबा यहुलसाला
कन्दाकी भिबा ग्लेस्याला टाडगाला
गे लबा मुल म्हि मुबा। थे नपुंसक
परमेश्वरदा तेन्बारी यरूशलेमरी निबा
मुबा। २८ थे नपुंसक हाडला दिमपट्टि
दो:सी खबान मुबा, ओच्छे थे हाडला
रथरी चिसी यशैया भिबा अगमवक्तासे
भिबा किताब पढब लबान मुबा।
२९ जमाहेन्से परमेश्वरला आत्मासे
फिलिपदा “ए थे रथला डामरी निसी
थेदेन छ्याम छ्यामनोन निउ” भिसी
सुडुजी।

३० फिलिप थे मुबा ग्लारी यासी निमा

थेसे यशैया भिबा अगमवक्तासे भिबा
किताब पढब लबान लबा थे:जी।
जमाहेन्से फिलिपसे थेदा “हाडसे
पढब लबान लबा चु ताम घोमुला?”
भिसी ड्योडमा,

३१ थेसे “खालैसे घोना आलतेधोना
डाइ खाहड् लसी घोसे?” भिसी
भिजी। जमाहेन्से थेसे फिलिपदा रथरी
डादेन छ्यामनोन चिउ भिसी पाड्जी।
३२ थेसे पढब लबा परमेश्वरला
बचनरी चुहड् भिसी भिबा मुबा,

थे साइबारी भोर्बा ग्यु हड्बान मुबा,

ओच्छे ग्यु बोगो हाडला क्रा

थामा कुटिसी चिमुला,

थेहड् लसीन थेसेनोन तिगै

आसुड्ना कुटिसी चिजी।*

३३ थेदा अत्याचार तबा धुइरी थेसे

ठीक निसाफ आयाड्नी।

दाहेन्से थेला वंशला बारेरी

खाल्से पाड्ला?

तिगदा भिसम थेला जुनी

जम्बुलिङ्ग्याम भोर्जी।

३४ जमाहेन्से थे नपुंसकसे फिलिपदा
“चु अगमवक्तासे खाल्ला बारेरी
पाड्बा हिन्ना? थेसे हाडलान
बारेरी पाड्बा हिन्ना कि स्थहान्दो
खालै म्हिला बारेरी पाड्बा हिन्ना?
डादा पाड्सी पिन्गो” भिसी भिजी।
३५ जमाहेन्से फिलिपसे परमेश्वरला
थेनोन बचनग्याम थेदा येशूला बारेरी
थार्बा पिन्बा समाचार पाड्जी।

३६ओच्छे थेनीगदे निबान लबा धुइरी क्युइ मुबा ग्लारी धोजी। जमाहेन्से थे नपुंसकसे फिलिपदा “च्यागो, चुरी क्युइ मुबा चीम, दाहेन्से डादा बप्तिस्मा किन्बारी तिगसे रोकब लख्मला?” भिसी भिजी। ३७फिलिपसे थे नपुंसकदा “हाडसे सेमहेन्सेन विश्वास लसम हाडसे किन्ख्मला” भिसी भिमा थे नपुंसकसे, “येशू ख्रीष्टनोन परमेश्वरला भा हिन्ना भिसी डाइ विश्वास लबा मुला” भिसी जोहाब पिन्जी।† ३८जमाहेन्से थे नपुंसकसे रथ रोकब लपुङ्जी ओच्छे फिलिपदेन थे क्युइरी वाङ्जी, जमाहेन्से फिलिपसे थेदा बप्तिस्मा पिन्जी।

३९थेन्नीन क्युइग्याम पाखारी थोन्मैछ्याम प्रभुला आत्मासे फिलिपदा भोजी, जमाहेन्से नपुंसकसे फिलिपदा दोःसी आम्राङ्नी, ओच्छे थे ताङ्बान दिमरी निजी। ४०तर फिलिपसे हाड अशदोद भिबा ग्लारी धोजीम भिबा था याङ्जी। ओच्छे कैसरिया भिबा ग्लारी आदोतेधोना जम्मान शहरगदेरी थाबा पिन्बा समाचार थेःना लबान निजी।

शाऊलसे येशूदा विश्वास लबा

६ थेनोन धुइरी शाऊलसे अभ धाग उन्बान प्रभुला चेलागदेदा साइबारी परमेश्वरला मन्दिररी पूजा लबा मुल म्हि मुबा ग्लारी निसी,

२प्रभुदा विश्वास लबा हेम्फेबेदेन म्रिडम्हेमे न्हडला जो स्याप्सै खीसी यरूशलेमरी भम्याङ्गै भिसी दमस्कस भिबा ग्लाला यहूदीगदे हुप तबा दिमला नेतागदेला लागिरी चिठी भिसी पिन्गो भिसी चिठी हीजी। ३जमाहेन्से शाऊल निबान लमा थे दमस्कस भिबा ग्लाला डामरी धोजी। थेरी धोमा स्वर्गग्याम तिकखुरीन थेला क्युर्नोन य्हाल तजी। ४थे सरी हिल्जी ओच्छे थेसे “शाऊल, शाऊल, एसे डादा तिगदा ल्हानान दुख पिन्बा?” भिबा काइ थेःजी।

५ओच्छे थेसे “प्रभु हाड खाल हिन्ना?” भिसी भिमा चुहङ् भिबा काइ थेःजी, “डा एसे ल्हानान दुख पिन्बा येशू हिन्ना। ६दाहेन्से ए रेःसी शहररी निउ, ओच्छे एसे तिग लतोःबा थे ताम एदा उन्ना।”

७थेदेन छ्याम निबा म्हिगदेसे थे काइ चा थेःजी, तर क्यारमार च्यामा खालैदा आम्राङ्बासे लमा थेनीगदे थोम तसी चिजी। ८जमाहेन्से शाऊल रेःसी मी ठोङ्सी च्यामा थेसे तिगै आम्राङ्नी, ओच्छे थेदेन छ्याम मुबागदेसे थेला यारी चुङ्सी दमस्कस भिबा ग्लारी भोजी। ९थेसे सोमरेधोना तिगै आम्राङ्नी, ओच्छे चबा थुङ्बाएनोन आलनी।

१०दमस्कस भिबा ग्लारी हननिया भिबा प्रभुला चेला गिक मुबा। थेदा म्हाडरी प्रभुसे “हननिया” भिसी

डुयोइमा, थेसे “लास्सो प्रभु” भिसी भिजी।

११ जमाहेन्से प्रभुसे थेदा चुहङ् भिसी सुङ्जी, “ए ‘सोजो’ भिबा ग्यामपट्टि निउ, थेरी यहूदाला दिमरी शाऊल भिबा टार्सस शहररी चिबा म्हिदा म्हाइगो, च्यागो, थेसे दान्दे प्रार्थना लबान मुला। १२ थेसे म्हाडरी हननिया भिबा म्हि गिक खसी म्हाङ्खम्नौ भिसी हाडथोरी हननियासे या थान्बा म्हाङ्बा मुला।”

१३ तर हननियासे चुहङ् भिसी भिजी, “प्रभु, चु म्हिसे मी यरूशलेमरी मुबा हाडला म्हिगदेदा गाते नइबा गे लसी दुख पिन्जी भिबा ताम डाइ ल्हानान म्हिगदेग्याम थे:बा मुला। १४ चुरीनोन हाडला मिन किन्बागदेदा खीबारी परमेश्वरला मन्दिररी पूजा लबा मुल म्हिगदेग्याम अधिकार याङ्बा मुला।”

१५ तर प्रभुसे थेदा चुहङ् भिसी सुङ्जी, “ए निउ, तिग्दा भिसम डाइ थेदा डादा तेन्बारी धम्बा मुला। थेसे अर्गु य्हुलला म्हिगदे, ग्लेगदेदेन इस्राएलीगदेदा डाला मिन थे:ना लला। १६ दाहेन्से थेसे डाला लागिरी गाते दुख नातो:ला भिबा ताम डाइ थेदा उन्ना।”


१७ जमाहेन्से हननिया निसी थे दिमरी वाङ्जी। ओच्छे शाऊलथोरी हाडला या न्हीनोन थान्सी चुहङ् भिसी भिजी, “शाऊल आले, ए ग्यामरी खबान लबा धुइरी ए मुबा ग्लारी फेप्खबा प्रभु येशूसेन डादा पुइखबा हिन्ना। एसे म्हाङ्बारी खम्नौ ओच्छे परमेश्वरला

आत्मासे प्लिङ्गै भिसी ए मुबा ग्लारी पुइखबा हिन्ना।” १८ हननियासे थेहङ् भिमैछ्याम थेला मीग्याम जजाबा पाप्रा हङ्बा ताइजी ओच्छे थेला मीसे म्हाङ्खम्जी। जमाहेन्से रे:सी थेसे बप्तिस्मा किन्जी। १९ ओच्छे थेसे चबा स्हे चसी भङ याङ्जी।

शाऊलसे दमस्कसदेन यरूशलेमरी परमेश्वरला य्हुल्साला समाचार थे:ना लबा

शाऊल तिगै रेधोना येशूदा विश्वास लबागदेदेन छ्याम दमस्कसरी चिजी। २० ओच्छे तुरुन्तन शाऊल यहूदीगदे हुप तबा दिमरी निसी, “येशू परमेश्वरला भा हिन्ना” भिसी पाङ्बारी छ्याइजी। २१ चुहङ् भिबा थे:बा म्हिगदे जम्मान उदेक म्हन्सी चुहङ् भिजी, “येशूला मिन किन्बा यरूशलेमरी मुबा म्हिगदेदा नाश लबादेन चुरीनोन येशूला मिन किन्बा म्हिगदेदा खीसी परमेश्वरला मन्दिररी पूजा लबा मुल म्हिगदे मुबा ग्लारी भोर्बा सेमसे खबा चुनोन म्हि आहिन?” २२ तर शाऊलसे थे:ना लबा ताम भन भन शक्तिशाली तबान निजी ओच्छे येशून थार्बा पिन्बा स्त्रीष्ट हिन्ना भिसी दमस्कसरी मुबा यहूदीगदेदा अलमल तना लजी।

२३ ल्हानान रे निमाहेन्से शाऊलदा साइबारी यहूदीगदे ढिक्सी सल्लाह लजी। २४ तर थेनीगदेसे हाडदा साइबारी म्हाइबा ताम शाऊलसे था



शाऊलदा छाडरी युसी शहरला पर्खालग्याम मार पुइबा (६:२५)

याड्जी। शाऊलदा साइबारी थेनीगदेसे दमस्कस शहरला माप मापरी धिन म्हुननोन खुड्सी चिमुबा। २५तर शाऊलदा स्थान्दो विश्वासीगदेसे म्हुनडनोन छाडरी युसी थे शहरला पर्खालग्याम मार पुइजी।*

शाऊल यरूशलेम शहररी

२६शाऊल यरूशलेमरी खमाहेन्से थेरी मुबा येशूला चेलागदेदेन छ्याम ढिक्बारी म्हाइजी। तर थेनीगदेसे थे येशूला चेला हिन्ना भिसी विश्वास

आतबासे लमा शाऊल म्राड्सी जम्मान लोड्जी। २७तर बारनाबाससे मुल चेलागदे मुबा ग्लारी शाऊलदा हाडदेन छ्यामनोन भोजी। ओच्छे शाऊलसे प्रभुदा ग्यामरी म्राड्बादेन प्रभुसे सुड्बा तामला बारेरी पाड्जी। थेहड् लसीन दमस्कसरी आलोङ्गान येशूला बारेरी थे:ना लजी भिबा ताम बारनाबाससे थेनीगदेदा पाड्सी पिन्जी। २८जमाहेन्से शाऊल यरूशलेमला जम्मान ग्लारी थेनीगदेदेन छ्याम छ्याम भ्रजी, ओच्छे शाऊल आलोङ्गान प्रभुला

बारैरी थे:ना लबान भ्रजी। ^{२६}ओच्छे शाऊलदेन ग्रीक ग्योइ पाङ्बा यहूदीगदे ह्राड ह्राड न्हडरी आढिक्बा ताम लमुबा, तर थे ग्रीक ग्योइ पाङ्बा यहूदीगदेसे चा शाऊलदा साइबारी म्हाइबान मुबा। ^{३०}चु ताम था याङ्सी प्रभुदा विश्वास लबागदेसे शाऊलदा कैसरिया भिबा शहररी भोर्जी, ओच्छे थेग्याम टार्सस भिबा शहरपट्टि पुइजी।

^{३१}जमाहेन्से यहूदियादेन गालील ओच्छे सामरिया भिबा ग्लारी मुबा जम्मान मण्डलीदा शान्ति तजी। ओच्छे प्रभुला चेलागदेसे परमेश्वरला आत्माग्याम आँट याङ्जी ओच्छे मण्डलीएनोन बढब तजी। चेलागदे परमेश्वरसे कुल्बा अन्छार भ्रमुबा ओच्छे प्रभुदा विश्वास लबा म्हिगदेएनोन ल्हानान तबान निजी।

एनियासदेन डोरकास भिबा म्हि खम्बा

^{३२}पत्रुस क्यारमारला नाम्सागदेरी कोर्बान निबा धुइरी लुङ्गु भिबा ग्लारी मुबा परमेश्वरला म्हिगदे मुबा ग्लारी धोखजी। ^{३३}पत्रुससे थेरी एनियास भिबा कुज्या म्हि गिक म्हेर्सी चिबा स्याप्जी, थे म्हि कुज्या तबा भ्रे: दिड तबा मुबा। ^{३४}जमाहेन्से पत्रुससे थे कुज्या म्हिदा “एनियास, एदा येशू ख्रीष्टसे खम्ना लला। थेतबासेलमा

ए रे:सी ह्राडला तीबा नान्बा दुइगो” भिसी भिमैछ्याम थे कुज्या म्हि डोड रे:जी। ^{३५}थे कुज्या म्हि खम्बा म्राङ्सी लुङ्गुदेन शारोन भिबा ग्लारी चिबा जम्मान म्हिगदेसे प्रभुदा विश्वास लजी।

पत्रुससे प्रार्थना लमाहेन्से डोरकास दो:सी सोबा

^{३६}योप्पा भिबा शहररी तबीता भिबा चेला गिक मुबा, थेदा ग्रीक ग्योइरी डोरकास भिमुबा।[†] थेसे सदन प्राडबोगदेदा ह्यो लबादेन ज्यबा गे लमुबा। ^{३७}पत्रुस लुङ्गु भिबा ग्लारी मुबा धुइरी थे तबीता आखम्ना सिजी, ओच्छे म्हिगदेसे थेला लास खुसी तलाथोला कोठा गिकरी भोर्सी थान्जी। ^{३८}लुङ्गु भिबा ग्ला योप्पा शहरला डामरीन तबासे लमा चेलागदेसे पत्रुस थेरी मुला भिबा ताम थे:सी, “डनी मुबा ग्लारी योना फेप्खउ भिउ” भिसी म्हि न्हीदा थे मुबा ग्लारी पुइजी।

^{३९}जमाहेन्से पत्रुस थेनीगदेदेन छ्याम निजी। थेरी धोखमाहेन्से थेनीगदेसे पत्रुसदा तलाथोला कोठारी भोर्जी। जमाहेन्से थेरी मुबा हेम्बो सिबा म्रिडम्हेमेगदे पत्रुसला डामरी राप्सी क्राबान मुबा, ओच्छे डोरकास भिबा तबीतासे थेनीगदेदेन छ्याम मुबा धुइरी राबा क्वान उन्जी।

६:३६ हिब्रू ग्योइरी “तबीता” ओच्छे ग्रीक ग्योइरी “डोरकास” भिबा मुला। चुला अर्थ चा “तङ्गी” हिन्ना।

४० जमाहेन्से पत्रुससे थेनीगदे जम्मादान मङ्ग्यार पुइसी पुइ जूसी प्रार्थना लजी, ओच्छे थे लासपट्टि च्यासी, “तबीता रे:गो” भिसी भिमा, तबीतासे मी ठोइजी ओच्छे थेसे पत्रुसदा म्राइसी रे:सी चिजी। ४१ पत्रुससे तबीताला यारी चुइसी थीजी ओच्छे परमेश्वरला म्हिगदेदेन हेम्बो सिबा म्रिडम्हेमेगदेदा इयोइसी तबीता सोजी भिसी उन्जी।

४२ जमाहेन्से चु ताम योप्पा शहर नाडनोन थे:जी, ओच्छे ल्हानान म्हिगदेसे प्रभुदा विश्वास लजी। ४३ ओच्छे पत्रुस ल्हानान धिनधोना ढिला गे लबा सिमोन भिबा म्हिदेन छ्याम योप्पा शहररीन चिजी।

पत्रुसदेन कर्नेलियस

१० कैसरिया भिबा ग्लारी कर्नेलियस भिबा म्हि गिक मुबा, थे म्हि रोमी यहुलला इटालिया भिबा सिपाहीला कप्तान मुबा। २ थेसे परमेश्वरदा तेन्मुबा, ओच्छे थेदेन थेला दिमला जम्मान म्हिगदेसे परमेश्वरसे कुल्बा ताम इयान्मुबा। थेसे आरेबागदेदा ज्यबा सेमसे पिन्मुबा। ओच्छे परमेश्वरदेन छ्याम सदन प्रार्थना लमुबा। ३ तिरेकुनु थेसे धिनना तीन बजेरीक्यार प्रार्थना लबा धुइरी परमेश्वरला स्वर्गदूत गिक हाड मुबा ग्लारी खबा म्राइजी। ओच्छे स्वर्गदूतसे थेदा “कर्नेलियस!” भिसी इयोइबा थे:जी।

४ जमाहेन्से कर्नेलियस लोइसी स्वर्गदूतदा ज्यना लसी च्यासी, “प्रभु, सुइगो” भिसी भिमा,

स्वर्गदूतसे थेदा चुहइ भिसी भिजी, “एसे लबा प्रार्थनादेन एसे प्राडबोगदेदा दया लसी चबा थुइबारी पिन्बा जम्मान गे परमेश्वरदा फुल्बा भेटी हइबान दोबा मुला। ५ दाहेन्से एसे योप्पा भिबा शहररी म्हिगदे पुइसी पत्रुस भिबा सिमोनदा इयोइगो। ६ थे ढिला गे लबा सिमोन भिबा म्हिदेन छ्याम चिबा मुला, थे सिमोनना दिम समुन्द्रला कुनीरी मुला।”

७ ओते पाइमाहेन्से स्वर्गदूत कर्नेलियस मुबाग्याम फेसी निजी। जमाहेन्से कर्नेलियससे हाडला नोकरगदे न्हडला नोकर न्हीदेन सदन हाडदा क्योइबा ओच्छे परमेश्वरदा तेन्बा सिपाही गिकदा इयोइजी। ८ ओच्छे थेनीगदेदा चु जम्मान ताम पाइसी योप्पा भिबा शहररी पुइजी।

पत्रुससे म्राइबा ताम

६ न्हडगरदड थेनीगदे निबान लबा धुइरी धिनना बाह बजेरीक्यार योप्पा शहरला डामरी धोखमा पत्रुस चा प्रार्थना लबारी दिमला कौसीरी निजी। १० थे धुइरी पत्रुसदा फोखेन्जी, ओच्छे थेसे चबा स्हे चबारी म्हाइजी। तर स्थान्दोगदेसे चबा स्हे स्होबान मुबा, थेनोन धुइरी थे एकोहोरो तजी। ११ जमाहेन्से थेसे स्वर्ग ठोइबा म्राइजी ओच्छे कुनी ब्लिरीन खीबा तन्ना

हड्बा स्वर्गग्याम जम्बुलिङपट्टि मार खबान लबा म्राङ्जी। १२थे तन्नारी जम्बुलिङला काड ब्लि मुबा ल्हानान थरीला जन्तुदेन सरी भ्रबा जन्तु ओच्छे चरागदे मुबा। १३जमाहेन्से पत्रुससे चुहङ् भिबा काइ थे:जी, “पत्रुस, ए रे:सी चुदा साइसी चउ।”

१४तर पत्रुससे “आहिन प्रभु, डाइ चुहङ्बा चबारी आतबा नइबा स्हेँ खाइमै चबा आरे” भिसी भिजी।

१५दो:सीनोन पत्रुससे “परमेश्वरसे चोखो स्होसी जिन्बा स्हेदा एसे नइबा स्हे थाम्हन्नो” भिबा काइ थे:जी। १६सोमरेमधोना चुहङ्बा काइ थे:जी, ओच्छे थे तन्ना तुरुन्तन स्वर्गपट्टि भोजी।

१७हाडसे म्राङ्बा तामला अर्थ तिग मुला तला भिसी पत्रुस अलमल तसी चिमुबा। थेनोन धुइरी कर्नेलियससे पुइबा म्हिगदे सिमोनना दिम म्हाइबान निमा दिम स्याप्सी म्रापरी राप्जी। १८ओच्छे घेन काइ लसी, “पत्रुस भिबा सिमोन चुरी धन्छ्यामुला?” भिसी इयोइजी।

१९थे धुइरी पत्रुस हाडसे म्राङ्बा तामला बारेरी म्हन्सी चिबा मुबा। थेनोन धुइरी परमेश्वरला आत्मासे पत्रुसदा चुहङ् भिसी सुङ्जी, “च्यागो, एदा म्हि सोमसे म्हाइबान मुला। २०थेतबासेलमा ए रे:सी धिरी निउ, ओच्छे शङ्का आलना थेनीगदेदेन

छ्याम निउ, तिगदा भिसम थेनीगदेदा डाइनोन पुइखबा हिन्ना।”

२१जमाहेन्से पत्रुस थेनीगदे मुबा ग्लारी निसी, “च्यागो, एनीगदेसे म्हाइबा म्हि डानोन हिन्ना। एनीगदे चुरी तिगदा खबा?” भिसी इयोइमा, २२थेनीगदेसे पत्रुसदा “कर्नेलियस भिबा कप्तानसे डन्दा पुइखबा हिन्ना। थे ज्यबा म्हिदेन परमेश्वरदा तेन्बा म्हि हिन्ना, ओच्छे यहूदीगदे जम्मासेन थेदा मान लमुला। थेला दिमरी हाडदा इयोइसी हाडसे सुङ्बा ताम इयान्नो भिसी परमेश्वरला स्वर्गदूतगदे गिकसे कुल्बा मुला” भिसी भिजी।

२३थेतबासेलमा थेनीगदेदा न्हडरी इयोइसी पत्रुससे थेनीगदेदा क्योङ्जी।

पत्रुस कर्नेलियसला दिमरी निबा

न्हडगरदड पत्रुस थेनीगदेदेन छ्याम निजी, ओच्छे येशूदा विश्वास लबा योप्पा शहररी मुबा कोइ कोइ म्हिगदेएनोन थेदेन छ्याम निजी। २४रेनीदड थेनीगदे कैसरिया भिबा ग्लारी धोजी। कर्नेलियससे चा हाडला म्हिगदेदेन हाडदेन छ्याम ढिक्बा ह्योगदेदा इयोइसी थेनीगदेला ग्याम च्यासी चिबा मुबा। २५पत्रुस न्हडरी खमाहेन्से कर्नेलियस थेदेन छ्याम हुप तजी, ओच्छे थेदा फ्या लजी। २६तर पत्रुससे थेदा थीसी, “रे:गो, डाएनोन म्हि जे हिन्ना” भिसी भिजी।

१०:१४ परमेश्वरसे मोशादा पिन्बा ठिम अन्छार कोइ कोइ जन्तुगदेला स्या चबारी आतमुबा।

२७ ओच्छे थेदेन छ्याम ताम पाङ्बान दिम न्हडरी वाङ्जी, थेरी पत्रुससे ल्हानान म्हिगदे हुप तसी चिबा म्राङ्जी। २८ पत्रुससे थेनीगदेदा चुहङ् भिसी भिजी, “डनी यहूदीगदेला ठिमसे अर्गु यहूलला म्हिगदेदेन छ्याम हुप तबारी आपिन्मुला।[†] भिबा ताम हाङनीदा थानोन मुला, तर परमेश्वरसे डादा खजिबै म्हिदा नइबादेन गे आखेलबा थाम्हनगो भिसी उन्बा मुला। २९ थेतबासेलमा हाङनीसे ड्योइमैछ्याम तिगै आम्हन्ना डा हाङनी मुबा ग्लारी खबा हिन्ना। हाङनीसे डादा चुरी तिगदा ड्योइबा हिन्ना डादा सुङ्गो।”

३० जमाहेन्से कर्नेलियससे चुहङ् भिसी भिजी, “ब्लिरे डाच्छा ओस्पन चुनोन धुइरी डा दिमरी तीन बजेला प्रार्थना लबान मुबा थे धुइरी य्हाल य्हाल्बा क्वान क्वान्बा म्हि गिक डाला डाच्छापट्टि राप्जी। ३१ ओच्छे थे म्हिसे चुहङ् भिसी भिजी, ‘कर्नेलियस, एसे लबा प्रार्थना परमेश्वरसे थे:बा मुला, थेहङ् लसीन प्राडबोगदेदा दया लसी चबा थुङ्बा पिन्बा गे परमेश्वरसे ढन्बा मुला। ३२ थेतबासेलमा एसे योप्पा शहररी म्हि पुइसी पत्रुस भिबा सिमोनदा ड्योइगो। थे समुन्द्रला कुनीरी ढिला गे लबा सिमोनना दिमरी

चिमुला।’ ३३ थेतबासेलमा डाइतुरुन्तन हाङ मुबा ग्लारी म्हि पुइखबा हिन्ना, दान्दे हाङ डन्ना लागिरी ल्हानान दुख लसी चुरी फेप्खजी। दाहेन्से प्रभुसे हाङदा कुल्बा जम्मान ताम हाङग्याम ड्यान्बारी डनी जम्मान परमेश्वरला डाच्छापट्टि हुप तबा मुला।”

पत्रुससे थाबा पिन्बा समाचार थे:ना लबा

३४ जमाहेन्से पत्रुससे चुहङ् भिसी पाङ्बारी छ्याङ्जी, “चु ताम सत्य हिन्ना, परमेश्वरसे खालैला ली आच्याना जम्मादान गिकनोन व्यवहार लमुला भिबा ताम डाइ म्राङ्बा मुला।^{*} ३५ तर यहूल यहूलला म्हिगदे न्हडला जुन म्हिसे परमेश्वरदा मान लसी थेसे म्हन्बा अन्छारला गे लला थे म्हि परमेश्वरदा सेम निबा म्हि तला। ३६ ओच्छे येशू ख्रीष्टग्याम इस्राएलीगदेला गुडरी परमेश्वरसे पुइखबा शान्तिला समाचार हाङनीदा थानोन मुला। थेनोन येशू जम्मालान प्रभु हिन्ना। ३७ यूहन्नासे बप्तिस्माला बारेरी थे:ना लमाहेन्से गालीलहेन्से यहूदियाला जम्मान ग्लारी तबा ताम हाङनीदा थानोन मुला। ३८ खाहङ् लसी परमेश्वरसे नासरतला येशूथोरी हाङला आत्मादेन शक्ति पुइखजी।

१०:२८ यहूदीगदेसे चा अर्गु यहूलला म्हिगदेदा परमेश्वरला डाच्छा नइबादेन तिगै गे आखेलबा म्हि भिसी म्हन्मुबा।

१०:३४ व्यय १०:१७

जमाहेन्से थेसे ज्यबा गेदेन शैतानसे दुख पिन्बा जम्मान म्हिगदेदा खम्ना लबान भ्रजी, तिग्दा भिसम थेदेन छ्याम परमेश्वर मुबा।

३६ “यहूदीगदेला यहुल्सादेन यरूशलेमरी येशूसे लबा जम्मान गे डन्से म्राड्बा मुला। थेदा म्हिगदेसे कुसरी टांगब लसी साइजी। ४० तर सोमरेमाकुनु परमेश्वरसे थेदा सोना लजी। थेतबासेलमा डन्से दोःसी येशूदा म्राड्म्याड्जी। ४१ थेदा जम्मान म्हिसे मी म्राड्आम्याड्नी, तर थे सिबाग्याम सोमाहेन्से थेदेन छ्यामनोन चबा थुड्बा लसी भ्रबा म्हि डन्से जे म्राड्जी। चुनोन ताम उन्बाला लागिरी डाच्छान परमेश्वरसे डन्दा धम्बा हिन्ना। ४२ ओच्छे थार्बा पिन्बा समाचार थेःना लबारीदेन येशूदा सिबादेन सोबा म्हिगदेला निसाफ लबाला लागिरी परमेश्वरसे धम्बा हिन्ना भिसी पाङ्गो भिसी येशूसे डन्दा कुल्बा मुला। ४३ ओच्छे येशूथोरी विश्वास लबागदे जम्मालान पाप येशूला मिनरी माफ याड्ला भिसी जम्मान अगमवक्तागदेसेनोन पाङ्बा मुला।”

४४ पत्रुससे चु ताम पाङ्ना पाङ्नान पत्रुसला ताम थेःबा जम्मान म्हिथोरी परमेश्वरला आत्मा फेप्खजी। ४५ अर्गु यहुलला म्हिगदेथोरीएनोन परमेश्वरला आत्मा फेप्खबा म्राड्सी पत्रुसदेन छ्याम खबा यहूदी विश्वासीगदे उदेक तजी। ४६ तिग्दा भिसम थेनीगदेसे

आसेबा ग्योड पाङ्सी परमेश्वरला जयजयकार लबान लबा यहूदी विश्वासीगदेसे थेःजी।

जमाहेन्से पत्रुससे चुहड् भिसी पाङ्जी, ४७ “यहाडसे हड्नोन परमेश्वरला आत्मा याड्बा चु म्हिगदेदा दाहेन्से क्युडला बप्तिस्मा किन्बारी खाल्से रोकब लबा?” ४८ थेतबासेलमा पत्रुससे थेनीगदेदा येशू ख्रीष्टला मिनरी बप्तिस्मा किन्गो भिसी कुल्जी। जमाहेन्से थेनीगदेसे पत्रुसदा तिगै धिन डन्देन छ्याम स्थूगो भिसी भिजी।

खतना लबा यहूदीगदेदा पत्रुससे घोना लबा

११ यहूदियारी मुबा मुल चेलादेन स्थहान्दो आलेगदेसे अर्गु यहुलला म्हिगदेसेनोन परमेश्वरला बचनरी विश्वास लजी भिबा ताम थेःजी। २ ओच्छे पत्रुस यरूशलेमरी धोखमाहेन्से खतना लनोन तोःला भिबा यहूदी विश्वासीगदेसे पत्रुसदा चुहड् भिसी बिरोध लजी, ३ “खतना आलबा म्हिगदेला दिमरी निसी थेनीगदेदेन छ्याम हाडसे तिग्दा चबा थुड्बा लबा?”

४ जमाहेन्से पत्रुससे थेनीगदेदा मेलोसेन घोना लबारी छ्याइजी। ५ “च्यागो, डा योप्पा भिबा शहररी प्रार्थना लमा सेम गिक तसी एकोहोरो तबा धुडरी कुनी ब्लिरी खीबा घेन तन्ना हड्बा गिक मुग्याम मार खबान

लबा तिगै स्हे डाइ म्राङ्जी, थे तन्ना हङ्बा स्हे डा मुबा ग्लारी खजी।^६थेरी डाइ ज्यना लसी च्यामा जम्बुलिङरी मुबा काड ब्लि मुबा ल्हानान थरीला जन्तुगदेदेन सरी भ्रबा जन्तुगदे ओच्छे चरागदेदा म्राङ्जी।^७जमाहेन्से ‘पत्रुस रे:गो, एसे चुगदे साइसी चउ’ भिबा काइ डाइ थे:जी।

^८“तर डाइ ‘आहिन प्रभु, चुहङ्बा चबारी आतबा नइबा स्हेगदे डाइ खाइमै चबा आरे’ भिसी भिमा,
^९“दो:सीनोन स्वर्ग्याम परमेश्वरसे चोखो स्होसी जिन्बा स्हेदा एसे नइबा स्हे भिसी थापाङ्गो भिबा काइ डाइ थे:जी।^{१०}सोमरेमधोना चुहङ्गोनोन तजी, जमाहेन्से थे जम्मान स्हे दो:सी स्वर्गरीन भोजी।

^{११}“थेनोन धुइरी कैसरिया भिबा ग्लाग्याम डा मुबा ग्लारी पुइखबा म्हि सोम डा चिबा दिमरी धोखजी।
^{१२}परमेश्वरला आत्मासे डादा थेनीगदेदेन छ्याम शङ्का आलना निउ भिसी सुङ्जी। ओच्छे चु ज्योज्यो आले ढुएनोन डादेन छ्याम निमुबा, जमाहेन्से डनी थे म्हिला दिम न्हङरी वाङ्जी।

^{१३}थेसे डन्दा चुहङ्ग भिसी पाङ्जी, स्वर्गदूत गिक थेला दिमरी राप्सी चुहङ्ग भिसी पाङ्बान लबा म्राङ्जी, ‘एसे योप्पा भिबा शहररी म्हि पुइसी सिमोन भिबा पत्रुसदा ड्योइसी भउ।

^{१४}थेसे एदा जुन ताम पाङ्ला थे तामग्याम एदेन एला दिमला जम्मान म्हिगदेसे थार्बा याङ्ला।’

^{१५}“डाइ पाङ्बारी छ्याइमाहेन्से, डाच्छा य्हाङथोरी परमेश्वरला आत्मा फेप्खबा हङ् लसी थेनीगदेथोरीनोन परमेश्वरला आत्मा फेप्खजी।
^{१६}जमाहेन्से ‘यूहन्नासे एनीगदेदा क्युइग्याम बप्तिस्मा पिन्जी, तर दाहेन्से परमेश्वरला आत्माग्याम एनीगदेला बप्तिस्मा तला’ भिसी प्रभुसे सुङ्बा ताम डाइ ढन्जी।^{*}^{१७}प्रभु येसू ख्रीष्टदा विश्वास लमाहेन्से परमेश्वरसे य्हाङदा मोलम पिन्जी, थेनोन मोलम परमेश्वरसे थेनीगदेदाएनोन पिन्जी भिसम परमेश्वरदा रोकब लबा डा खाल हिन्ना?”

^{१८}चु ताम थे:माहेन्से थेनीगदेसे बिरोध लबा ख्लाजी, जमाहेन्से थेनीगदेसे परमेश्वरदा जयजयकार लजी, ओच्छे “दाहेन्से परमेश्वरसे अर्गु य्हलला म्हिगदेदाएनोन हाङ हाङला पाप ख्लासी परमेश्वरपट्टि दो:सी सोबा मौका पिन्बा मुला” भिसी भिजी।

एन्टिओखिया भिबा शहरला मण्डली

^{१९}स्तिफनसला बारेरी खबा दुखसे लमा ससा बडबड तबागदेसे स्थान्दोगदेदा आहिन, तर यहूदीगदेदा

जे थाबा पिन्बा समाचार थे:ना लबान, फोनिके भिबा ग्लादेन साइप्रस भिबा ग्ला ओच्छे एन्टिओखिया भिबा शहरधोना निजी। * २० तर थेनीगदे न्हडला कोइ कोइ चेलागदे साइप्रसदेन कुरेनी भिबा ग्लाला मुबा। थेनीगदे एन्टिओखिया भिबा शहररी खसी अर्गु यहुलला म्हिगदेदाएनोन प्रभु येशूला बारेरी थाबा पिन्बा समाचार थे:ना लजी। २१ थेनीगदेदेन छ्याम प्रभुला शक्ति मुबासे लमा ल्हानान म्हिगदेसे विश्वास लसी प्रभुला चेला दोजी।

२२ चु ताम यरूशलेमरी मुबा मण्डलीसे थे:जी, जमाहेन्से थेनीगदेसे एन्टिओखिया भिबा शहररी बारनाबासदा पुइजी। २३ बारनाबास थेरी खसी परमेश्वरसे दयामाया लबादेन मोलम पिन्बा म्राड्सी ल्हानान ताड्जी। ओच्छे थेसे थेनीगदे जम्मादान सदन सेमहेन्से प्रभुदा विश्वास लसी चिउ भिसी आँट पिन्जी। २४ बारनाबास परमेश्वरला आत्मासे प्लिङ्बादेन विश्वासरी कोड्बा ज्यबा म्हि मुबा। थेतबासेलमा ल्हानान म्हिगदेसे प्रभुदा विश्वास लजी।

२५ जमाहेन्से बारनाबास शाऊलदा म्हाइबारी टार्सस भिबा शहररी निजी। २६ थेसे शाऊलदा स्याप्माहेन्से

एन्टिओखिया भिबा शहररी भजी। जमाहेन्से थेनीगदेसे तिदिडधोना मण्डलीला म्हिगदेदेन छ्याम स्याप्बान ल्हानान म्हिगदेदा परमेश्वरला बचन लोप्बारी छ्याइजी। चेलागदेदा जम्मान भन्दा डाच्छा एन्टिओखिया भिबा शहररीन ख्रीष्टियान भिसी भजी।

२७ थे धुइरी कोइ कोइ अगमवक्तागदे यरूशलेमग्याम एन्टिओखिया भिबा शहररी खजी। २८ थे अगमवक्तागदे न्हडला अगाबस भिबा अगमवक्ता रे:जी, ओच्छे परमेश्वरला आत्मासे थेदा चु जम्बुलिङ नाडनोन घेन अनिकाल तबारी छ्याइबा मुला भिसी पाड्पुड्जी। चु ताम लिच्छा क्लौडियस भिबा ग्लेला पालोरी पूरा तजी। * २९ जमाहेन्से जम्मान चेलागदेसे हाड हाडसे खमतेधोना भेटी हुप्सी यहूदिया भिबा ग्लारी चिबा विश्वासीगदेदा पिन्बारी पक्का लजी। ३० चुहङ् लसी बारनाबासदेन शाऊलसे भेटी हुप्सी मण्डलीदा च्याबा म्हिगदे मुबा ग्लारी पुइजी।

पत्रुसदा भ्याल्खानरी थान्बा

१२ थे धुइरी हेरोद अग्रिपा[†] भिबा ग्लेसे मण्डलीला कोइ कोइ म्हिगदेदा चुइसी ल्हानान दुख पिन्बारी छ्याइजी। २ थे ग्लेसे

१२:१ चु हेरोद अग्रिपा घेन हेरोदला छाया हिन्ना। येशू न्हबा धुइरी चा घेन हेरोद ग्ले मुबा (मत्ती २:१-१८, लूका १:५)।

११:१६ मुल ८:१-४ ११:२८ मुल २१:१०

यूहन्नाला ज्योज्यो याकूबदा तरवारसे
थासी साइपुङ्जी। ^३चुहङ् लमा
यहूदीगदे ताङ्बा म्राङ्सी हेरोद ग्लेसे
पत्रुसदाएनोन चुङ्पुङ्जी। हेरोद ग्लेसे
चुहङ् लबा खमीर आयुना गेड चसी
धङ्बा चाडला ^१ धुइरी मुबा। ^४हेरोद
ग्लेसे पत्रुसदा चुङ्सी भ्याल्खानरी
भाङ्माहेन्से सिपाहीगदेला समूह
ब्लि स्होसी खुङ्पुङ्जी। ओच्छे
मिश्र यहुल्साग्याम फेसी खबा धिनदा
ढन्सी धङ्बा चाड जिन्माहेन्से थेदा
म्हिगदेला डाच्छापट्टि भसी ड्योइबा
छाबा लबा सेम लजी।*

^५थेतबासेलमा पत्रुसदा भ्याल्खानरी
भाङ्जी, तर मण्डलीसे पत्रुसला
लागिरी परमेश्वरदेन छ्याम भन
प्रार्थना लबाला लबान लजी।

पत्रुस भ्याल्खानग्याम थोन्बा

^६हेरोद ग्लेसे पत्रुसदा म्हिगदेला
डाच्छापट्टि भबारी छ्याइबा धिनना
डाच्छाकुनुला म्हुनड, पत्रुस सिपाही
न्हीला गुडरी म्हेसी चिबा मुबा, थेदा
च्याल्दा न्हीसे खीसी थान्बा मुबा।
ओच्छे स्थान्दो सिपाहीगदेसेनोन
भ्याल्खानना म्रापरी खुङ्सी चिबा
मुबा। ^७तिक्खुरीन प्रभुला दूत गिक
पत्रुस मुबा ग्लारी खसी राप्जी, ओच्छे
पत्रुसदा थान्बा कोठारी य्हाल तजी।

ओच्छे थे स्वर्गदूतसे पत्रुसला राइरी
थुर्सी, “ए योना रे:गो” भिसी पत्रुसदा
छिङ्जी। स्वर्गदूतसे थेहङ् भिमैछ्याम
पत्रुसला यारी खीबा च्याल्दा हङ्नोन
बलसी सरी ताइजी। ^८जमाहेन्से
स्वर्गदूतसे थेदा “एसे क्वानदेन लखम
क्वान्गो” भिसी भिमा थेसे थेहङ्नोन
लजी। दो:सीनोन स्वर्गदूतसे पत्रुसदा
“ए घ नान्सी डाला लिच्छा लिच्छा
खउ” भिसी भिजी। ^९स्वर्गदूतसे थेहङ्
भिमाहेन्से पत्रुस स्वर्गदूतला लिच्छा
लिच्छा भ्रबारी छ्याइजी। स्वर्गदूतसे
लबा चु गे साँच्चिन हिन्ना भिसी
पत्रुसदा थानोन आरेबा। तर पत्रुससे
चु डाइ म्हाड म्राङ्बान मुला भिसी
म्हन्जी। ^{१०}जमाहेन्से भ्याल्खानरी
खुङ्सी चिबा सिपाहीला समूह
न्हीदा वाइसी थेनीगदे शहरपट्टि
निबा फाइला म्रापरी धोजी, थेरी
धोमैछ्याम थे म्राप हङ्नोन ठोङ्जी,
जमाहेन्से थेनीगदे थोन्सी गल्लीला
ग्याम तसी निना निनान स्वर्गदूतसे
पत्रुसदा रूलासी निजी।

^{११}थे धुइरी चा तिग तजी भिबा
ताम पत्रुससे था याङ्सी चुहङ् भिजी,
“प्रभुसे हाडला दूत पुइखसी हेरोद
ग्लेला याग्यामदेन यहूदीगदेसे लबारी
छ्याइबा गेग्याम फेबा ताम पक्का
हिन्ना।”

१२:३ “खमीर आयुना गेड चसी धङ्बा चाड” भिबादेन मिश्र यहुल्साग्याम फेसी खबा धिनदा
ढन्सी धङ्बा चाड भिबा गिकनोन हिन्ना।

१२:४ प्रस्था १२:१-२७

१२ चु ताम था याङ्माहेन्से थे मर्कूस भिबा यूहन्नाला आमा मरियमला दिमरी निजी। थेरी ल्हानान म्हिगदे हुप तसी प्रार्थना लसी चिबा मुबा। १३ थेसे प्राप ढ्वक ढ्वक लमाहेन्से रोदा भिबा नोकरस्या प्राप ठोङ्बारी खजी। १४ थेसे पत्रुसला काइ डोसेसी ताङ्बासे लमा प्रापनोन आठोङ्ना न्हङरी यार्बान निसी, “पत्रुस प्रापरी राप्सी चिबा मुला” भिसी जम्मादान भिजी।

१५ तर थेरी मुबागदेसे थेदा “ए म्योजीम” भिसी भिमा थेसे ढीपि लबान चु ताम पक्का हिन्ना भिसी भिजी। जमाहेन्से थेनीगदेसे “थे पत्रुसदा च्याबा स्वर्गदूत मुला तला” भिसी भिजी।

१६ तर पत्रुससे चा प्राप ढ्वक ढ्वक लबाला लबान लजी। जमाहेन्से प्राप ठोङ्मा पत्रुसदा प्राङ्सी थेनीगदे उदेक तजी। १७ तर पत्रुससे थेनीगदेदा “कुटिसी चिउ” भिसी यासे चाल लजी, ओच्छे प्रभुसे हाङ्दा खाहङ् लसी भ्याल्खानग्याम मङ्ग्यार तेःजी भिबा ताम थेनीगदेदा पाङ्जी। ओच्छे चु ताम याकूबदेन विश्वास लबा स्थान्दो ज्योज्यो आले नाना आङागदेदाएनोन पाङ्सी पिन्गो भिसी पत्रुस थेनीगदे मुबा ग्लाग्याम अर्गु ग्लारी निजी।

१८ स्थो तमाहेन्से पत्रुस खानड निजी भिसी सिपाहीगदे न्हङरी ल्हानान हल्ली खल्ली तजी। १९ हेरोदसे पत्रुसदा म्हाङ्गो भिसी कुल्जी। तर थेनीगदेसे पत्रुसदा खानडएनोन आस्याप्नी।

थेतबासेलमा सिपाहीगदेदा ड्योइबा छार्बा लजी, तसैनोन तिगै जोहाब आपिन्माहेन्से थेनीगदेदा साङ्गो भिसी कुल्जी। जमाहेन्से हेरोद चा यहूदियाग्याम कैसरिया भिबा ग्लारी निसी थेरीन चिजी।

हेरोद सिबा

२० टुरोसदेन सीदोन यहूल्साला म्हिगदेदेन छ्याम हेरोद ल्हानान बोमो खबा मुबा। थेतबासेलमा थेनीगदे ढिकसी हेरोद मुबा ग्लारी खजी, ओच्छे ग्लेला गे लबा बलस्तस भिबा म्हिदा हो स्होसी ग्लेदेन छ्याम ढिकबाला लागिरी सल्लाह लजी। तिग्दा भिसम थेनीगदेला चबा स्हे हेरोद ग्लेला यहूल्साग्याम खतोःबा मुबा।

२१ तोगब लबा धिनकुनु ग्लेसे जे क्वान्बा क्वान क्वान्सी हेरोद ग्ले निसाफ लबा ठिरी चिसी म्हिगदेला डाच्छा भाषण लजी। २२ जमाहेन्से म्हिगदेसे “चु काइ मी लला काइ हिन्ना, म्हिंला आहिन!” भिसी क्रिङ्जी। २३ तर परमेश्वरला मानदेन जयजयकार आलबासे लमा थेनोन धुङ्गरी स्वर्गदूत गिकसे हेरोद ग्लेदा आखम्बा तना लजी, जमाहेन्से स्याउँ स्याउँ च्योलोड तसी थे सिजी।

२४ तर परमेश्वरला बचन जुन जुन ग्लारी थेःजी थेरी ल्हानान विश्वासीगदे बढब तबान निजी। २५ ओच्छे बारनाबासदेन शाऊल हाङला गे जिन्ना लसी यरूशलेमग्याम

दोःजी। थेनीगदेदेन छ्याम मर्कूस
भिबा यूहन्नाएनोन मुबा।

बारनाबासदेन शाऊलदा धम्बा

१३ एन्टिओखियाला मण्डली-
री मुबा अगमवक्तागदेदेन
लोप्बा म्हिगदे चुनोन हिन्ना।
बारनाबास, म्लाङ्गै भिबा शिमियोन,
कुरेनी भिबा लुकियस, शासन लबा
हेरोददेन छ्याम^१ छर्बा मनेन ओच्छे
शाऊल, ^२थेनीगदे फोइथान चिसी
प्रार्थना लबान प्रभुदा तेन्बा धुडरी
परमेश्वरला आत्मासे “बारनाबासदेन
शाऊलदा डाला लागिरी फेसी थान्गो,
डाइ थेन्नीदा डाला गे लबाला लागिरी
धम्बा मुला” भिसी सुङ्जी। ^३जमाहेन्से
थेनीगदे फोइथान चिसी थेन्नीथोरी
हाड हाडला या थान्सी प्रार्थना लसी
थेन्नीदा प्रभुला गे लबारी पुङ्जी।

पावल थार्बा पिन्बा समाचार थेःना लबारी डाच्छारेम निबा

समुन्द्रला गुडरी मुबा साइप्रस भिबा
ग्लारी

^४परमेश्वरला आत्मासे बारनाबास-
देन शाऊलदा पुङ्जी, ओच्छे थेन्नी
सिलुकिया भिबा ग्लारी निजी। थे

ग्लाग्याम पानी जहाजरी क्रेःसी
साइप्रसपट्टि निजी। ^५ओच्छे सलामिस
भिबा ग्लारी धोखमाहेन्से थेन्नीसे
यहूदीगदे हुप तबा दिमरी परमेश्वरला
बचन थेःना लजी। थेन्नीदा हो लबारी
मर्कूस भिबा यूहन्नाएनोन थेन्नीदेन
छ्यामनोन मुबा।*

^६जमाहेन्से थेनीगदे साइप्रस भिबा
अञ्चलला^१ शहर शहररी कोर्बान
पाफोस भिबा ग्लाधोना धोखजी,
थेरी थेनीगदेसे बार-येशू भिबा जादु
लबा फट्टा यहूदी अगमवक्ता गिकदा
स्याज्जी। ^७थे जादु लबा म्हि साइप्रस
भिबा अञ्चलरी शासन लबा सर्गियस
पौलुस भिबा म्हिला हो मुबा। थे
सर्गियस पौलुस बुद्धि मुबा म्हि मुबा।
थेसे परमेश्वरला बचन ड्यान्बा सेम
लबासे लमा शाऊलदेन बारनाबासदा
ड्योङ्जी। ^८तर जादु लबा एलुमाससे
सर्गियस पौलुससे थेनीगदेला ताम
विश्वास थालगै भिसी शाऊलदेन
बारनाबासला बिरोध लजी। एलुमास
भिबा चा ग्रीक ग्योइरी जादु लबा
म्हि भिबा हिन्ना। ^९तर शाऊल, थेदा
पावलएनोन भिमुबा, परमेश्वरला
आत्मासे प्लिङ्सी थे एलुमासदा
एकोहोरो च्याबाला च्याबान लसी
चुहङ् भिसी भिजी, ^{१०}“ए जम्मान

१३:१ चु हेरोद चा हेरोद अन्तिपास हिन्ना।

१३:६ “साइप्रस” भिबा अञ्चल चा समुन्द्रला गुडरी मुबा ग्ला हिन्ना। बाइबलला ग्यापपट्टि
मुबा नक्सारी स्हीगो।

१३:५ मुल चेला १२:१२, २५

ज्यबा गेला शत्रु, ओच्छे पापी सेमदेन नइबा सेमसे प्लिङ्बा शैतानना कोला, तिग एसे प्रभुग्याम लोप्बा सत्य तामगदेदा न्होङ्ना लबारी आरुला? ११च्यागो, दाहेन्से प्रभुसे एदा सजाय पिन्सी जिन्बा मुला, थेतबासेलमा छिन्नडधोना ए काना तसी धिनीला य्हालएनोन आम्राङ्” भिसी भिजी। थेहङ् भिमैछ्याम खसु हङ्बा खसी थेला मी घप्जी, ओच्छे धोपधोप तसी थेसे तिगै आम्राङ्नी।

जमाहेन्से खालैसे यारी चुङ्सी डोज्याब लला वा भिसी थे क्यारमार भ्रबारी छ्याइजी। १२चुहङ् तबा म्राङ्सी थे ग्लारी शासन लबा म्हिसे प्रभुदा विश्वास लजी। तिगदा भिसम प्रभुला बचनग्याम लोप्बा तामरी थे उदेक तबा मुबा।

पावलसे एन्टिओखिया भिबा शहररी थार्बा पिन्बा समाचार थे:ना लबा

१३पावलदेन थेला ह्योगदे पाफोसग्याम पानी जहाजरी क्रे:सी पामफिलिया भिबा ग्लारी परब तबा पर्गा भिबा ग्लारी धोजी, ओच्छे मर्कूस भिबा यूहन्ना चा थेनीगदेग्याम फेसी यरूशलेमरी धोजी। १४तर थेनीगदे चा पर्गा भिबा ग्लाग्याम पिसिदिया भिबा अञ्चलरी परब तबा एन्टिओखिया शहररी खजी,

ओच्छे ब्लप्बा न्हबा धिनकुनु यहूदीगदे हुप तबा दिम न्हडरी निसी चिजी। १५ओच्छे यहूदीगदे हुप तबा दिमला नेतागदेसे मोशाला ठिमदेन अगमवक्तागदेसे भिबा किताब पढब लमाहेन्से थेनीगदेदा “आलेगदे, हाडनीदेन छ्याम म्हिगदेदा अर्ती पिन्बा खाल्ला तिगै बचन मुसम सुङ्गो” भिसी भिजी।

१६जमाहेन्से पावल राप्सी यासे चाल लबान चुहङ् भिबारी छ्याइजी, “इसाएलला डाला ज्योज्यो आलेदेन परमेश्वरदा तेन्बा अर्गु यहुलला म्हिगदे डाला ताम ड्यान्गो। १७य्हाडला आखे म्हेमेगदे मिश्र यहुल्सारी चिबा धुइरी इसाएल यहुलला परमेश्वरसे थेनीगदेदा धम्सी घेन म्हि स्होजी। जमाहेन्से परमेश्वरसे हाडला शक्तिशाली छ्यासे थेनीगदेदा थे यहुल्साग्याम ते:सी भजी। * १८ओच्छे तोडतोडबा ग्लारी थेनीगदेसे लबा आज्यबा बानीबेहोर नाबान ओस्पन बोगल न्ही दिङ्धोना परमेश्वरसे थेनीगदेदा हो लजी। * १९जमाहेन्से परमेश्वरसे कनान यहुल्साला गोर निस यहुलला म्हिगदेदा नाश लजी। ओच्छे थे यहुल्सा परमेश्वरसे थेनीगदेला अधिकाररी पिन्जी। * २०चु जम्मान ताम ओस्पन ग्यार्जा ब्लिसे बोगल न्हीसे च्युइ दिङ्धोना तजी।

१३:१७ प्रस्था १:७; १२:५१ १३:१८ गन्ती १४:३४; व्यव १:३१

१३:१९ व्यव ७:१; यहो १४:१

“जमाहेन्से शमूएल अगमवक्ताला पालोधोना परमेश्वरसे न्यायाधीश पिन्जी।* २१ जमाहेन्से म्हिगदेसे ग्ले ह्रीजी, थेतबासेलमा परमेश्वरसे बेन्यामीनना वंशला कीश भिबा म्हिला भा शाऊलदा बोगल न्ही दिडधोना शासन लपुङ्जी।* २२ ओच्छे परमेश्वरसे शाऊलदा ते:माहेन्से दाऊददा थेनीगदेला ग्ले स्होजी। ओच्छे परमेश्वरसे दाऊदला बारेरी ‘डाइ यिशै भिबा म्हिला भा दाऊददा डाला सेमसे म्हन्बा हड्बान म्हि स्याप्जी, थेसे डाइ म्हन्बा जम्मान गे लला’ भिसी सुङ्जी।* २३

“परमेश्वरसे कबुल लबा अन्छार चुनोन म्हिला सन्तानग्याम इस्राएलीगदेदा थार्बा पिन्बाला लागिरी येशूदा भजी। २४ येशू फेप्खबा भन्दा डाच्छा यूहन्नासे इस्राएलला जम्मान म्हिगदेदा हाड हाडला पाप रूलासी परमेश्वरपट्टि दो:सी बप्तिस्मा किन्गो भिसी थे:ना लजी।* २५ यूहन्नासे हाडला गे जिन्ना लबारी छ्याइमा ‘एनीगदेसे डा खाल भिसी म्हन्बा मुला? डा थे आहिन। तर च्यागो, थे डा भन्दा लिच्छा फेप्खला, डा थेला लखम स्युबाधोनाला आरे’ भिसी भिमुबा।* २६

“अब्राहामला सन्तान, डाला ज्योज्यो आलेदेन परमेश्वरसे कुल्बा ताम ड्यान्बा अर्गु यहुलला आलेगदे चु थार्बा याड्बा समाचार यहाडला लागिरी पुइखबा मुला। २७ तर यरूशलेमरी चिबा म्हिगदेदेन हाडला नेतागदेसे थेदा डोआसेनी, ओच्छे ब्लप्बा न्हबा धिनकुनु पढब लबा अगमवक्तागदेसे भिबा बचन आघोना थेदा सिबाला सजाय पिन्सी थे बचन पूरा लजी। २८ सिबाला सजाय पिन्तो:बा तिगै ताम आस्याप्सैनोन थेनीगदेसे थेदा साइनोन तो:ला भिसी पिलातसदा भिजी।* २९ ओच्छे थेनीगदेसे थेला बारेरी बचनरी भिबा अन्छार जम्मान ताम लसी जिन्माहेन्से थेनीगदेसे थेदा क्रुसग्याम मार ते:सी धुर्सारी थान्जी।* ३० तर परमेश्वरसे थेदा सिबाग्याम सोना लजी। ३१ ओच्छे गालीलग्याम यरूशलेमधोना हाडदेन छ्याम खबा म्हिगदेसे थेदा ल्हानान धिनधोना म्राङ्जी, दान्दे म्हिगदेला लागिरी थेनीगदे थेला साक्षी हिन्ना। ३२

“परमेश्वरसे यहाडला आखे म्हेमेदेन छ्याम लबा थे कबुलला समाचार डन्से हाडनीदा पाड्ला। ३३ परमेश्वरसे येशूदा सिबाग्याम सोना

१३:२० न्याय २:१६; १ शमू ३:२० १३:२१ १ शमू ८:५; १०:२१

१३:२२ १ शमू १३:१४; १६:१२; भजन ८६:२० १३:२४ मर्क १:४; लूका ३:३

१३:२५ मत्ती ३:११; मर्क १:७; लूका ३:१६; यूह १:२०, २७

१३:२८ मत्ती २७:२२-२३; मर्क १५:१३-१४; लूका २३:२१-२३; यूह १६:१५

१३:२९ मत्ती २७:५७-६१; मर्क १५:४२-४७; लूका २३:५०-५६; यूह १६:३८-४२

लसी थेनीगदेला कोलागदे य्हाडला
लागिरी थे ताम पूरा लसी पिन्जी, थेला
बारेरी दाऊद ग्लेसे भिबा न्हीरमला
व्हाइरी चुहड् भिसी भिबा मुला

‘ए डाला भा हिन्ना,

तिनी डा एला आबा दोजी।’*

३४ परमेश्वरसे येशूदा खाइमै नइना
आलना सिबाग्याम सोना लबाला
बारेरी चुहड् भिसी सुड्बा मुला,

‘डाइ दाऊददा पिन्ना भिसी

लबा कबुल चोखोदेन सत्य मोलम
एनीगदेदा पिन्ना।’*

३५ ओच्छे अर्गु व्हाइरीनोन चुहड्
भिबा मुला,

‘परमेश्वरसे ह्वाडदा जे तेन्बा

म्हिला ल्हुइ धुसारी

नइआपुड्।’*

३६ तर चु ताम दाऊदसे ह्वाडला बारेरी
पाड्बा आहिन। तिगदा भिसम दाऊदसे
ह्वाड सोतेधोना परमेश्वरसे म्हन्बा
हड्बान गे लसी सिजी। ओच्छे थेदा
थेला आखे म्हेमे ल्हुबा ग्लारीन ल्हुजी,
ओच्छे थेला ल्हुइ नइसी निजी। ३७ तर
परमेश्वरसे सिबाग्याम सोना लबा
येशूला ल्हुइ चा आनइनी।

३८ “थेतबासेलमा ज्योज्यो आलेगदे
चु येशूग्यामसेन य्हाडला पाप माफ
तला भिसी डाइ पाड्बा चु ताम
ह्वाडनीदा था तगै। ३९ मोशाला
ठिमग्याम ह्वाडनी परमेश्वरदा सेम
निबा म्हि दोबारी आखम्नी। तर

येशूदा विश्वास लबागदे जम्मान
परमेश्वरदा सेम निबा म्हि दोबा
मुला। ४० थेतबासेलमा होशियार लसी
स्य्हूगो, आहिन्सम अगमवक्तागदेसे
पाड्बा चु ताम ह्वाडनीथोरी खला।
४१ अगमवक्तागदेसे चुहड् भिसी
पाड्बा मुबा,

‘परमेश्वरसे सुड्बा तामदा हेला
लबागदे,

उदेक तसी सिउ!

एनीगदेला धुइरी डाइ गे गिक लला,

थे गेला बारेरी खालैसे पाड्सी


पिन्सैनोन

एनीगदेसे खाइमै विश्वास

आल।’ ”*

४२ पावलदेन बारनाबास यहूदीगदे
हुप तबा दिमग्याम थोन्सी निबारी
छ्याइमुबा, जमा म्हिगदेसे खबा
साताला ब्लप्बा न्हबा धिनकुनुएनोन
डन्दा चु ताम लोप्सी पिन्गो भिसी
थेनीगदेदा पाड्बाला पाड्बान लजी।
४३ यहूदीगदे हुप तबा दिमग्याम
थोन्माहेन्से ल्हानान यहूदीगदेदेन
यहूदी धर्म तेन्बा अर्गु य्हुलला म्हिगदे
पावलदेन बारनाबासला लिच्छा
भ्रबारी छ्याइजी, जमाहेन्से पावलदेन
बारनाबाससे थेनीगदेदा एनीगदे सदन
परमेश्वरला दयामायारी चिउ भिसी
भिजी।

४४ ब्लप्बा न्हबा अर्गु धिनकुनुएनोन
शहरला जम्मान हड्बा म्हिगदे



मुल चेला १३:४-१४:२८

पावल थाबर्वा पिन्बा समाचार थे:ना लबरी डाच्छारेम निबा

परमेश्वरला बचन ड्यान्बारी पोप तजी। ^{४५}चुदे ल्हाना म्हिला हुल म्राङ्सी कोइ कोइ यहूदीगदेदा ल्हानान डाह तजी, ओच्छे पावलसे पाङ्बा तामदा बिरोध लसी थेनीगदेसे पावलला बेइज्जत लजी।

^{४६}तर पावलदेन बारनाबास दुक्क तसी थेनीगदेदा चुहङ् भिसी भिजी, “जम्मान भन्दा डाच्छा परमेश्वरला बचन एनीगदे यहूदीगदेदान थे:ना लतो:बा मुबा। तसैनोन चुदा एनीगदेसे ड्यान्बारीन आम्हाइनी। चुहङ् लसी एनीगदेसे हाडसे हाडदा जुकजुकधोनाला जुनी याङ्बा-धोनाला म्हि हिन्ना भिसी आम्हन्बासे लमा दाहेन्से डनी अर्गु यहुलला म्हिगदे मुबा ग्लारी निसी परमेश्वरला बचन थे:ना लला। ^{४७}तिगदा भिसम प्रभुसे डन्दा चुहङ् भिसी कुल्बा मुला,

‘जम्बुलिङला कनाकुनीधोना
थार्बा याङ्बा समाचार धोना
लबारी

ओच्छे अर्गु यहुलला म्हिगदेला
गुडरी य्हाल दोबारी डाइ
एनीगदेदा धम्बा मुला।’ ”*

^{४८}चु ताम थे:माहेन्से अर्गु यहुलला म्हिगदे ताङ्सी परमेश्वरला बचनला जयजयकार लजी, ओच्छे जुकजुकधोनाला जुनी याङ्बारी धम्बागदेसे परमेश्वरला बचनरी विश्वास लजी।

^{४९}जमाहेन्से विश्वासीगदेसे जम्मान ग्लारी प्रभुला बचन थे:ना लजी। ^{५०}तर पावलदेन बारनाबासला बिरोध लसी यहूदीगदेसे म्हिगदेग्याम मान याङ्बा परमेश्वरसे कुल्बा ताम ड्यान्बा म्निङम्हेमेगदेदेन शहरला मुल म्हिगदेदा थीसी, पावलदेन बारनाबासदा हाडला ग्लाग्याम ते:जी। ^{५१}थेतबासेलमा पावलदेन बारनाबाससे चा थेनीगदेला बिरोधरी हाडला काडला धुलु खर्सी आइकोनियन भिबा ग्लारी निजी।* ^{५२}तर एन्टिओखियारी मुबा चेलागदे चा परमेश्वरला आत्मासे प्लिङ्सी ल्हानान ताङ्जी।

पावलदेन बारनाबास आइकोनियन भिबा शहररी

१४ थेहङ् लसीन बारनाबास-
देन पावल आइकोनियन
भिबा शहररीनोन यहूदीगदे हुप तबा
दिमरी निजी। ओच्छे थेनीगदेसे
यहूदीगदे हुप तबा दिम न्हडरी ज्यना
लसी घोना लबासे लमा थेरी मुबा
ल्हानान यहूदीगदेदेन अर्गु यहुलला
म्हिगदेसे प्रभु येशू ख्रीष्टदा विश्वास
लजी। ^२तर विश्वास आलबा
यहूदीगदेसे चा अर्गु यहुलला म्हिगदेदा
थीसी प्रभुरी विश्वास लबा ज्योज्यो
आलेगदेला बिरोध लबारी छ्याइजी।
^३तसैनोन पावलदेन बारनाबास
ल्हानान धिनधोना थेरीन चिजी।

थेन्नीसे प्रभुथोरी विश्वास थान्सी आलोङ्गनान ताम लजी। थेनीगदेग्याम प्रभुसे उदेकला चिनुगदेदेन गेगदे लसी हाडला दयामायाला बचन सत्य हिन्ना भिसी उन्जी। ^४तर थे शहरला म्हिगदे फेसी कोइ यहूदीगदेदेन छ्याम कोइ येथूला मुल चेलागदेदेन छ्याम ढिक्बारी छ्याइजी। ^५जमाहेन्से अर्गु यहूलला म्हिगदेदेन यहूदीगदे न्हीनोन नेतागदेदेन छ्याम ढिक्सी थेनीगदेदा दुख पिन्बादेन युडबासे तोबारी म्हाइजी। ^६पावलदेन बारनाबाससे चु था याङ्सी लुकोनिया भिबा शहरला लुस्त्रादेन डर्बी शहररी ओच्छे थे शहरला क्यारमारला जिल्ला तबान यासी निजी। ^७थेरीनोन थेनीगदेसे थाबा पिन्बा समाचार थे:ना लसीन चिजी।

पावलदेन बारनाबास लुस्त्रादेन डर्बी शहररी

^८लुस्त्रा भिबा शहररी काड चलब आतबा म्हि गिक मुबा। थे म्हि न्हमान कुज्या मुबा, थे खाइमै भ्रबा आरेमुबा। ^९थे म्हिसे पावलसे पाङ्मा ड्यान्बान मुबा। ओच्छे थे म्हिसे डाएनोन खम्ला भिसी विश्वास लबा ताम था याङ्सी पावलसे थे म्हिदा एकोहोरो च्यासी, ^{१०}“ए काड जूसी डोड रे:गो” भिसी घेन काइसे पाङ्जी। थेहङ्

पाङ्मैछ्याम थे म्हि डोड रे:सी भ्रबारी छ्याइजी।

^{११}म्हिला हुलसे पावलसे लबा चु गे म्हाङ्माहेन्से लुकोनिया ग्योइरी क्रिङ्बान, “लगदे म्हि दोसी य्हाड मुबा ग्लारी फेप्खजीम” भिसी भिजी। ^{१२}जमाहेन्से थेनीगदेसे बारनाबासदा जिउस भिबा ल ओच्छे पावलदा हर्मेस ल^१ भिसी भिबारी छ्याइजी, तिगदा भिसम पावल चा ताम पाङ्बा मुल म्हि मुबा। ^{१३}थे जिउसला मन्दिर थे शहरला डामरीन मुबा। थेतबासेलमा थे मन्दिररी पूजा लबा म्हिसे बहरगदेदेन म्हेन्दोला लुड भसी शहरला म्पारी खजी। जमाहेन्से मुल चेला बारनाबासदेन पावलला डाच्छापट्टि थे बाहरगदे बलि पिन्बारी ठीक लजी।

^{१४}तर मुल चेलागदे बारनाबासदेन पावलसे चु ताम था याङ्माहेन्से थेनीगदेसे हाड हाडला क्वान ढेबान म्हिला हुल न्हडरी यासी निसी क्रिङ्बान चुहङ् भिबारी छ्याइजी। ^{१५}“म्हिगदे! हाडनीसे तिगदा चुहङ्बा गे लबा? डनीएनोन हाडनी हङ्बान दुख सुख नासी भ्रबा म्हिगदे हिन्ना, ओच्छे चुहङ्बा नइबा गेगदे रुलासी स्वर्गदेन जम्बुलिङ ओच्छे समुन्द्रदेन थेरी मुबा जम्मान स्हेगदे स्होबा छोन्बो परमेश्वरपट्टि दो:गै भिसी हाडनीदा

१४:१२ थे ग्लाला म्हिगदेसे तेन्बा मुल ल चा ‘जिउस’ भिबा ल मुबा, ओच्छे ‘हर्मेस’ भिबा चा लगदेला ताम थे:ना लबा ल भिसी म्हेन्मुबा।

सत्य ताम पाङ्बारी डनी थाबा पिन्बा समाचार भसी खबा हिन्ना।* १६दडबो धुइरी परमेश्वरसे जम्मान यहुलला म्हिगदेदा हाड हाडला ठिम अन्छार भ्रपुङ्जी, १७तसैनोन परमेश्वरसे हाडला दयामायाला गे लबा आख्लाना स्वर्गग्याम नाम ताइना लसी चबा स्हेगदे रोना लजी। ओच्छे ल्हानान चबा स्हेगदे पिन्सी म्हिगदेला सेम ताइना लजी। चुनोन गेगदेसे परमेश्वरला साक्षी पिन्बा मुला।” १८चुहङ् भिसैनोन बलि थालउ भिसी थे म्हिगदेदा रोकब लबारी थेनीगदेदा गाहो तजी। तसैनोन म्हिला हुलदा बलि पिन्आपुङ्नी।

१९जमाहेन्से एन्टिओखियादेन आइकोनियन भिबा शहरग्याम कोइ कोइ यहूदीगदे थेरी धोखजी। थेनीगदेसे म्हिगदेदा थीसी युडबासे तोपुङ्जी। जमाहेन्से जम्मान म्हिगदेसे युडबासे तोजी, ओच्छे सिजी भिसी म्हन्सी थेनीगदेसे पावलदा डुइबान शहरग्याम मङ्ग्यार भोजी। २०तर प्रभुला चेलागदे खसी पावलला क्यारक्युर पोप तमा थे रेःसी शहर न्हडरी निजी। ओच्छे न्हङ्गरदड बारनाबासदेन छ्यामनोन थे डर्बी भिबा शहररी निजी।

**सिरिया भिबा ग्लाला एन्टिओखिया
शहररी दोःसी निबा**

२१थेन्नीसे डर्बी भिबा शहररी थाबा पिन्बा समाचार थेःना लसी

ल्हानान म्हिगदेदा येशूला चेला स्होजी। जमाहेन्से थेन्नी लुस्त्रादेन आइकोनियन ओच्छे एन्टिओखिया भिबा शहररी दोःसी निजी। २२थेन्नीसे थेरी मुबा चेलागदेदा आँट पिन्बान सदन विश्वासरी चिउ भिसी भिजी। ओच्छे यहाड सेमरी ल्हानान दुख नासी परमेश्वरला यहुल्सारी वाङ्तोःला भिसी थेनीगदेदा भिजी। २३जमाहेन्से बारनाबासदेन पावलसे जम्मान मण्डलीरी मण्डलीदा च्याबा म्हिगदे धम्सी थान्जी। ओच्छे फोइथान चिसी प्रार्थना लसी थेनीगदेदा हाडसे विश्वास लबा प्रभुला छ्यारी जिम्मा पिन्जी।

२४जमाहेन्से थेनीगदे पिसिदिया अञ्चलग्याम पामफिलिया भिबा अञ्चलरी खजी। २५ओच्छे पर्गा भिबा शहररी परमेश्वरला बचन थेःना लसी थेनीगदे अटालिया भिबा शहररी निजी।

२६थेनीगदे अटालियाग्याम पानी जहाजरी क्रेःसी एन्टिओखियारी दोःसी निजी। थेनोन शहररी पावलदेन बारनाबासदा प्रभुदा विश्वास लबा ज्योज्यो आलेगदेसे परमेश्वरला दयामायारी जिम्मा पिन्सी परमेश्वरला बचन थेःना लबारी पुइबा मुबा। दान्दे चु गे पावलदेन बारनाबाससे पूरा लजी। २७एन्टिओखियारी धोखमाहेन्से पावलदेन बारनाबाससे

मण्डलीला जम्मान म्हिगदेदा
ड्योइजी। ओच्छे परमेश्वर थेन्नीदेन
छ्याम तसी लबा गेदेन अर्गु यहुलला
म्हिगदेसेनोन विश्वास लबारी खम्ला
भिबा ताम थेनीगदेदा पाङ्सी पिन्जी।
२८ जमाहेन्से थेनीगदे थेरी चेलागदेदेन
छ्याम ल्हानान धिनधोना चिजी।

यरूशलेमरी चिबा सभा

१५ यहूदियाग्याम एन्टिओखिया-
री खबा कोइ कोइ म्हिगदेसे
येशूदा विश्वास लबा ज्योज्यो आले
नाना आडागदेदा “एनीगदेसे मोशाला
ठिम अन्छार खतना आलनी भिसम
एनीगदेसे थाबा आयाङ्” भिसी
लोप्जी।* २ पावलदेन बारनाबासला
ताम थेनीगदेदेन छ्याम आढिकबासे
लमा थेनीगदेसे हाड हाडलान ताम
थान्जी। थेतबासेलमा पावलदेन
बारनाबास ओच्छे कोइ कोइ
विश्वासीगदेदा चु ताम सल्लाह लबारी
यरूशलेमरी मुबा मुल चेलागदेदेन
मण्डलीदा च्याबा म्हिगदे मुबा ग्लारी
पुइबाला लागिरी धम्जी।

३ जमाहेन्से मण्डलीला म्हिगदेसे
थेनीगदेदा थे ग्याम पुइजी। थेनीगदे
फोनिक्केदेन सामरियाग्याम तबान निबा
धुइरी स्याप्बा विश्वासीगदेदा अर्गु
यहुलला म्हिगदेसेनोन प्रभुदा विश्वास
लजी भिबा ताम पाङ्जी। चु ताम
थे:सी थेरी मुबा विश्वासीगदे ल्हानान

ताङ्जी। ४ थेनीगदे यरूशलेमरी
धोखमाहेन्से थेनीगदेदा मण्डलीला
म्हिगदेदेन मुल चेलागदे ओच्छे
मण्डलीदा च्याबा म्हिगदेसे मान लजी।
जमाहेन्से परमेश्वरसे थेनीगदेग्याम
लबा जम्मान गे थेरी मुबागदेदा
पाङ्जी।

५ जमाहेन्से फरिसी समूहला कोइ
कोइ विश्वासीगदे राप्सी, “अर्गु
यहुलला म्हिगदेदाएनोन खतना लसी
मोशाला ठिम अन्छार भ्रतो:ला भिसी
पाङ्तो:ला” भिसी भिजी।

६ चु तामला बारेरी सल्लाह लबाला
लागिरी मुल चेलागदेदेन मण्डलीदा
च्याबा म्हिगदे हुप तजी। ७ थेनीगदे
न्हडरी ल्हानान सल्लाह लसी
जिन्माहेन्से पत्रुस राप्सी थेनीगदेदा
चुहङ् भिबारी छ्याइजी, “आलेगदे,
ल्हानान धुइ डाच्छा अर्गु यहुलला
म्हिगदेसे डाला सुङग्याम थोन्बा थाबा
पिन्बा समाचार थे:सी विश्वास लगै
भिसी हाडनी न्हङग्याम परमेश्वरसे
डादा धम्बा ताम हाडनीदा थानोन
मुला।* ८ ओच्छे परमेश्वर चा जम्मान
म्हिला सेमला ताम था याङ्बा
परमेश्वर हिन्ना। परमेश्वरसे य्हाडदा
हङ्गनोन अर्गु यहुलला म्हिगदेदाएनोन
हाडला आत्मा पिन्सी थेनीगदे डाला
हिन्ना भिसी उन्बा मुला।* ९ ओच्छे
परमेश्वरसे य्हाडदेन थेनीगदे खालैला
ली आच्याना गे लसी थेनीगदेसे

लबा विश्वासग्याम थेनीगदेला सेम
साडसाड तना लजी। १०थेतबासेलमा
तिग्दा अर्गु यहुलला विश्वासीगदेदा चु
धोइ काप्सी परमेश्वरदा बोमो खना
लबारी म्हाइबा? तिग्दा भिसम चु धोइ
य्हाडला आखे म्हेमेसेनोन पुइआखम्नी
ओच्छे य्हाडसेनोन पुइआखम्नी।
११तर य्हाडसे ह्ङ्ङनोन थेनीगदेसेनोन
प्रभु येशूला दयामायाग्याम थार्बा
याड्बा मुला भिसी य्हाडसे विश्वास
लबा मुला।”

१२पत्रुसला चुहङ्बा ताम थे:सी
सभारी मुबा जम्मान म्हिगदे कुटिसी
चिजी, ओच्छे अर्गु यहुलला म्हिगदेला
गुडरी परमेश्वरसे थेनीगदेग्याम
खाहङ्बा उदेकला गेदेन चिनुगदे
उन्बा ताम पावलदेन बारनाबाससे
पाङ्मा थेनीगदे ड्यान्सी चिजी।
१३पावलदेन बारनाबाससे पाङ्सी
जिन्माहेन्से याकूबसे चुहङ् भिसी
भिजी, “ज्योज्यो आलेगदे डाला
ताम ड्यान्गो, १४परमेश्वरसे दया
लसी अर्गु यहुलला म्हिगदेदा धम्सी
ह्वाडलान म्हि स्होजी। चु ताम मी
सिमोनसे ह्वाडदा दोलोन पाङ्सी
जिन्बा मुला। १५चुनोन तामदेन छ्याम
अगमवक्ताला बचनएनोन ढिक्मुला।
परमप्रभुसे सुङ्बा ताम अगमवक्तासे
चुहङ् लसी भिबा मुला,
१६“डा दो:सी खला,

ओच्छे दाऊदला फुप्बा दिम†
दो:सी स्होला,
थेनोन फुप्बा दिमला जगथोरी
दो:सी दिम स्होला,
१७थेहङ् लसीन बाँकी मुबा म्हिगदे
डा मुबा ग्लारी खगै,
ओच्छे अर्गु यहुलला म्हिगदेदाएनोन
डाला म्हि स्होबाला लागिरी डाइ
ड्योइबा मुला।

१८चु ताम डा परमप्रभुसे ल्हानान
डाच्छाहेन्सेन था तना लबा
मुला।”*

१९“थेतबासेलमा परमेश्वरपट्टि
दो:बा अर्गु यहुलला म्हिगदेदा य्हाडसे
दुख आपिन्गे भिसी डाइ म्हन्बा मुला।
२०तर य्हाडसे थेनीगदेदा चुहङ् भिसी
भिसी पुङ्गे, ‘एनीगदेसे मूर्तिदा फुल्बा
स्हे थाचउ। ओच्छे स्थहान्दोदेन छ्याम
ब्रेल्सी थाभ्रउ, ओच्छे खारे च्यासी
साइबा जन्तुला स्या थाचउ, ओच्छे
तिगैलान का थाचउ।’* २१तिग्दा
भिसम डाच्छाला म्हिगदेला धुइहेन्सेन
जम्मान शहररी मोशाला ठिमग्याम
लोप्बान मुला, चु ठिम चा ब्लप्बा
न्हबा धिनरी यहूदीगदे हुप तबा दिमरी
पढब लमुबा।”

अर्गु यहुलला म्हिगदेदा भिबा चिठी

२२जमाहेन्से मुल चेलागदेदेन
मण्डलीदा च्याबा म्हिगदे ओच्छे

१५:१६ चु पदरी “दिम” भिबा चा दाऊद ग्लेला यहुल्सा हिन्ना।

१५:१६-१८ आमो ६:११-१२ १५:२० प्रस्था ३४:१५-१७; लेवी १७:१०-१६; १८:६-२३

जम्मान मण्डली ढिक्सी हाड
न्हडला कोइ कोइ म्हिगदेदा धम्सी
पावलदेन बारनाबासदा छ्यामनोन
एन्टिओखियारी पुइबा ज्यबा तला
भिसी म्हन्जी। ओच्छे विश्वासीगदे
न्हडला मुल म्हिगदे यहूदा भिबा
बारसाबासदेन सिलासदा धम्जी।
२३ थेनीगदेदेन छ्याम चुहङ्ग भिसी
भ्रिबा चिठी पुइजी,

“हाडनीलान ज्योज्यो आले डनी
मुल चेलागदेदेन मण्डलीदा च्याबा
म्हिगदेग्याम एन्टिओखियादेन
सिरिया ओच्छे किलिकियारी
मुबा अर्गु यहूलला विश्वासीगदेदा
फ्याफुल्ला।

२४ “डनी न्हडला कोइ कोइसे
डन्से आपाड्बा तामगदे हाडनीदा
लोप्सी हाडनीला सेम धरमर तना
लसी हाडनीदा ल्हानान तामग्याम
दुख पिन्बा मुला भिबा ताम डन्से
थे:बा मुला। २५ थेतबासेलमा डनी
जम्मान ढिक्सी लबा सल्लाह
अन्छार कोइ कोइ म्हिगदेदा
धम्सी थेनीगदेदा डन्ना सेम निबा
हो बारनाबास ओच्छे पावलदेन
छ्याम हाडनी मुबा ग्लारी
पुइखबा ज्यबा छोर्जी। २६ चुगदे
चुहङ्गबा म्हिगदे हिन्ना, चुगदेसे
यहाडला प्रभु येशू ख्रीष्टला
लागिरी हाडला ज्याननोन
पिन्बारी छ्याइबा मुबा।
२७ थेतबासेलमा डन्से यहूदादेन
सिलासदाएनोन पुइखबा मुला।

थेनीगदेसेनोन चु ताम हाडनीदा
पाङ्सी पिन्ना। २८ तिग्दा भिसम
था ततो:बा ताम बाहेक अर्गु
ल्हानान तामग्याम दुख आपिन्बा
परमेश्वरला आत्मादेन डन्दा
ज्यबा छोर्जी। २९ हाडनीदा था
ततो:बा ताम चा चुनोन हिन्ना,
हाडनीसे मूर्तिदा बलि पिन्बा
तिगै स्हेगदे, कादेन खारे च्यार्सी
साइबा जन्तुला स्या थासोल्लो,
ओच्छे स्थहान्दोदेन छ्याम ब्रेल्सी
थाभ्रउ। चुहङ्गबा तामगदेला
संगतनोन आलनी भिसम
हाडनीदा ज्यबा तला। दान्देदा
चुदेन लास्सो फ्याफुल्ला।”

३० जमाहेन्से पावल, बारनाबास,
यहूदादेन सिलास यरूशलेमग्याम
एन्टिओखिया शहररी निजी। थेरी
थेनीगदेसे विश्वासीगदेदा ग्ला
गिकरी ड्योइसी थेनीगदेदा थे चिठी
पिन्जी। ३१ चिठीरी भ्रिबा आँट पिन्बा
ताम पढब लसी एन्टिओखियाला
विश्वासीगदे ल्हानान ताङ्गी।
३२ यहूदादेन सिलास चा अगमवक्ता
मुबा। थेन्नीसे प्रभुदा विश्वास
लबा ज्योज्यो आले नाना
आडागदेदा बचनग्याम ल्हानान
आँट पिन्सी विश्वासरी कोङ्ना
लजी। ३३ थेनीगदे तिगै रेधोना थेरी
चिमाहेन्से थेरी मुबा आलेगदेसे
थेनीगदेदा पुइखबागदे मुबा ग्लारी
ढुक्क तसी फेण्गो भिसी पुइजी।
३४ तर सिलासदा चा थेरीन चिबा

ज्यबा छोर्जी।† ३५तर पावलदेन बारनाबास चा म्हिगदेदा लोप्बादेन प्रभुला बचन थे:ना लबान ल्हानान म्हिगदेदेन छ्याम एन्टिओखियारी चिजी।

पावल थार्बा पिन्बा समाचार थे:ना लबारी न्हीरेमला पालरी निबा

पावलदेन बारनाबासला ताम
आढिक्बा

३६तिगै धिन लिच्छा पावलसे बारनाबासदा “य्हाडसे डाच्छा प्रभुला बचन थे:ना लबा शहरला विश्वासीगदेदा दो:सी स्याप्बारी निइ ओच्छे थेनीगदे खाहड्बा चीम च्यागे” भिसी भिजी। ३७बारनाबाससे मर्कूस भिबा यूहन्नादा भोर्बा सेम लजी। ३८तर पावलदा चा मर्कूसदा छ्यामनोन भोर्बारी ज्यबा आछोर्नी, तिगदा भिसम पामफिलियारी मुबा धुइरी मर्कूस थेनीगदेग्याम फेसी निमुबा, ओच्छे थेनीगदेदेन छ्याम ढिक्सी गे लबा आरेमुबा।* ३९चु तामरी पावलदेन बारनाबासला ताम आढिक्ना थेन्नी फेजी। ओच्छे बारनाबाससे मर्कूसदा भोर्सी पानी जहाजरी क्रे:सी साइप्रस भिबा ग्लारी निजी। ४०तर पावलसे चा सिलासदा

धम्जी, ओच्छे प्रभुदा विश्वास लबा आलेगदेसे थेन्नीदा परमेश्वरला छ्यारी जिम्मा पिन्माहेन्से थेन्नी थेग्याम निजी। ४१पावलदेन सिलास सिरियादेन किलिकियारी निसी थेरी मुबा मण्डलीगदेदा विश्वासरी कोङ्ना लबान भ्रजी।

पावलदेन सिलास तिमोथीदेन
छ्याम हुप तबा

१६ पावल डर्बीदेन लुस्त्रा शहररीएनोन खजी। थेरी तिमोथी भिबा चेला गिक मुबा। थेला आमा यहूदी विश्वासी मुबा, तर आबा चा ग्रीक मुबा। २लुस्त्रादेन आइकोनियन शहरला ज्योज्यो आले नाना आडागदेसे तिमोथीदा ज्यबा म्हि भिसी पाङ्मुबा। ३पावलसे तिमोथीदाएनोन छ्यामनोन भोर्बा सेम लजी। ओच्छे थेरी चिबा यहूदीगदेसे लमा पावलसे थेदा भोर्सी खतना लसी पिन्जी। तिगदा भिसम थेला आबा ग्रीक हिन्ना भिसी थेनीगदेदा था मुबा। ४जमाहेन्से थेनीगदे शहर शहररी निबान यरूशलेमरी मुबा मुल चेलागदेदेन मण्डलीदा च्याबा म्हिगदेसे पक्का लबा ताम ड्यान्गो भिसी पाङ्बान भ्रजी। ५थेतबासेलमा मण्डलीगदे विश्वासरी कोङ्बान धिन धिननोन

१५:३४ ल्हानान हड्बा ग्रीक बाइबलरी ३४ पद आरे।

१५:३८ मुल १३:१३

प्रभुदा विश्वास लबा म्हिगदे बढब
तबान निजी।

पावल म्हेर्बा धुइरी माकेडोनियाला म्हिदा म्राङ्बा

६ परमेश्वरला आत्मासे पावल,
सिलासदेन तिमोथीदा एशियारी बचन
थे:ना लआपुङ्बासे लमा थेनीगदे
फ्रिगियादेन गलातियाला ग्लागदे तबान
निजी। ७ माइसिया भिबा ग्लाला साँधरी
धोखमाहेन्से थेनीगदे बिथिनिया भिबा
ग्लापट्टि निबारी म्हाइजी। तर येसूला
आत्मासे थेनीगदेदा थेपट्टि निआपुङ्नी।
८ थेतबासेलमा माइसिया तबान थेनीगदे
त्रोआस भिबा ग्लारी निजी। ९ म्हुनड
म्हेर्बा धुइरी पावलसे माकेडोनियाला
म्हि गिक राप्सी थेदा “माकेडोनियारी
फेप्खउ ओच्छे डन्दा ह्यो लसी पिन्गो”
भिसी बिन्ती लसी चिबा म्राङ्जी।
१० थेसे चुहड्बा म्राङ्माहेन्से डनीं
माकेडोनियारी निबारी तयार तजी।
तिगदा भिसम थे ग्लाला म्हिगदेदा
थार्बा पिन्बा समाचार थे:ना लबारी
परमेश्वरसे डन्दा ड्योइजीम भिबा
ताम डन्से था याङ्जी।

लिडिया भिबा म्रिडम्हेमेसे विश्वास लबा

११ जमाहेन्से डनी त्रोआसग्याम पानी
जहाजरी क्रे:सी सोजोन सामोथ्रेस

भिबा ग्लारी खजी, ओच्छे न्हडगरदड
नियापोलिस भिबा ग्लारी धोखजी।
१२ थेग्याम माकेडोनियाला घेन शहर
फिलिप्पीरी निजी। थे शहररी चा
रोमीगदेसे शासन लमुबा। थेरीन डनी
तिगै रेधोना चिजी। १३ ब्लप्बा न्हबा
धिनकुनु डनी शहरग्याम थोन्सी
स्योडला कुनीरी निजी। तिगदा भिसम
थेरी प्रार्थना लबा ग्ला मुला तला भिसी
डन्से म्हन्बा मुबा, थेरी कोइ कोइ
म्रिडम्हेमेगदे हुप तसी चिबा स्याप्जी।
थेतबासेलमा डनीएनोन थेनीगदेदेन
छ्याम चिसी ताम लजी। १४ थेरी डन्ना
ताम ड्यानबागदे न्हडरी थिआटीरा
भिबा शहररी चिबा वाला वाला पिङ्गै
छोनना क्वान चूङ्बा परमेश्वरदा
तेन्बा लिडिया भिबा म्रिडम्हेमे गिक
मुबा। पावलसे पाङ्मा ज्यना लसी
ड्यानसी घोखम्मौ भिबा सेम प्रभुसे
थेदा पिन्बा मुबा। १५ थेदेन थेला
दिमला जम्मान म्हेमेगदेसे बप्तिस्मा
किन्माहेन्से थेसे “चुदे हाडनीसे डादा
प्रभुदा विश्वास लबा म्हि म्हन्सम
डाला दिमरी फेप्खसी धन्छ्यागो”
भिसी डन्दा कर लसी ड्योइजी।

पावलदेन सिलासदा भ्याल्खानरी भाङ्बा

१६ डनी प्रार्थना लबा ग्लारी निबान
मुबा, थेरी डन्से म्हडसे स्याप्बा नोकर

१६:१० चु किताब लूकासे भिबा मुबा, चु धुइरी लूकाएनोन पावल, तिमोथी, सिलासदेन
छ्याम निबा मुबा।


स्या गिकदा स्याप्जी, थेसे थे म्हडला शक्तिग्याम म्हुदु च्यासी स्होबा ल्हानान टाङगा ह्वाङला मालिकगदेदा पिन्मुबा। १७ ओच्छे थे नोकरस्यासे “चु म्हिगदे शक्तिशाली परमेश्वरला गे लबा म्हिगदे हिन्ना। चुगदेसे एनीगदेदा थार्बा याङ्बा ग्यामला बारेरी पाङ्बान मुला” भिसी क्रिङ्बान पावलदेन छ्याम डन्ना लिच्छा लिच्छा भ्रजी। १८ थे नोकरस्यासे ल्हानान धिनधोना चुहङ् पाङ्बाला पाङ्बान लबासे लमा पावल छेर्सी थेपट्टि प्लिक दोःसी थे नोकरस्याला ल्हुइरी मुबा म्हडदा चुहङ् भिसी भिजी, “ए थेला ल्हुइग्याम येशू खीष्टला मिनरी थोन्सी निउ भिसी डाइ कुल्बा मुला।” पावलसे थेहङ् भिमैछ्याम थे म्हड थोन्सी निजी।

१९ थे नोकरस्याला मालिकगदेसे दाहेन्से चुला कमाइ चआम्याडनम भिबा म्राङ्सी पावलदेन सिलासदा चुङ्सी बजारला गुडरी मुबा नेतागदे मुबा ग्लारी डुइबा छेङ्बा लबान भोर्जी। २० ओच्छे थेनीगदेदा थे शहरला हाकिमगदे मुबा ग्लारी भसी चुहङ् भिसी भिजी, “चु म्हिगदे यहूदी हिन्ना, चुगदेसे य्हाङला शहररी आतोःबा ताम लोप्सी डन्दा कोल्ना लजी। २१ ओच्छे थेनीगदेसे य्हाङला ठिमसे लोप्बारी आतबा ताम लोप्बा मुला य्हाङ रोमी म्हिगदे तबासे लमा

थेन्से लोप्बा ताम य्हाङसे विश्वास लसी ड्यान्बारी आत।”

२२ जमाहेन्से थेरी मुबा म्हिगदे पावलदेन सिलासला बिरोधरी रेःजी। थे शहरला हाकिमगदेसे थेनीगदेला क्वान ठेसी भ्याङ्जी, ओच्छे थेनीगदेदा तोउ भिसी कुल्जी। २३ थेनीगदेदा ल्हानान तोमाहेन्से भ्याल्खानरी भाङ्सी भ्याल्खानना हाकिमदा चु कैदीगदेदा यार्बारी आखम्ना लसी थान्गो भिसी कुल्जी। २४ चुहङ् भिमाहेन्से थे भ्याल्खानना हाकिमसे पावलदेन सिलासदा भ्याल्खानना न्हडला कोठारी भोर्सी ठिँगुरो लगब लसी थान्जी। २५ तर म्हुन गडसलरीक्यार पावलदेन सिलास प्रार्थना लबान परमेश्वरला व्हाइ गोबान मुबा, ओच्छे स्थान्दो कैदीगदेसे चा ड्यान्बान मुबा। २६ जमाहेन्से थेरी तिकखुरीन घ्रेन सङ्गुल खसी भ्याल्खानना जग य्हङ य्होङ तसी तुरुन्तन भ्याल्खानना म्प्रापगदे ठोङ्जी। ओच्छे थेनीगदे जम्मादान खीबा स्हेगदेएनोन हङ्नोन ब्लजी। २७ थे भ्याल्खानना हाकिम फातछोर्मा भ्याल्खानना जम्मान म्प्राप ठोङ्बा म्राङ्सी थेसे जम्मान कैदीगदे यार्जी भिसी म्हन्सी ह्वाङसे ह्वाङदान साइबारी तरवार स्याजी। २८ तर पावलसे थेदा “ह्वाङसे ह्वाङदान तिगै थालउ, तिग्दा भिसम डनी जम्मान

१६:२७ थे धुइरी चा कैदीगदे यार्जी भिसम भ्याल्खानना हाकिमदा सरकारसे साइमुबा।



ठिंगुरो (१६:२२-२६)

चुरीन मुला” भिसी घेन काइसे क्रिड्जी।

२६ जमाहेन्से थेसे नाडसल हीसी छ्योड्बान न्हडरी खजी, थे लोड्सी फितफित धर्बान पावलदेन सिलासला डाच्छापट्टि र्लुप तजी। ३० ओच्छे थेसे थेनीगदेदा मडग्यार भसी, “दाहेन्से डाइ थार्बा याड्बारी तिग लतो:ला?” भिसी ड्योड्जी।

३१ पावलदेन सिलाससे “प्रभु येशू ख्रीष्टदा विश्वास लउ, ओच्छे हाडदेन हाडला जम्मान म्हेमेगदेसे थार्बा याड्ला” भिसी भिजी। ३२ जमाहेन्से थेनीगदेसे थेदेन थेला दिमरी मुबा जम्मादान प्रभुला बचन थे:ना लजी।

३३ जमाकुनु म्हुनडला थेनोन धुडरी थेसे थेनीगदेदा भोर्सी थेनीगदेला पोर खुसी पिन्जी। ओच्छे थेदेन थेला दिमरी मुबा जम्मासेन तुरुन्तन बप्तिस्मा किन्जी। ३४ जमाहेन्से थे भ्याल्खानना हाकिमसे पावलदेन सिलासदा हाडला दिमरी भसी सोल पिन्जी। ओच्छे थेसे परमेश्वरदा विश्वास लबासे लमा थेला दिमरी मुबा जम्मान म्हिगदे विश्वास लसी थेदेन छ्याम ल्हानान ताड्जी।

३५ तर य्हाल तमाहेन्से शहरला हाकिमगदेसे सिपाहीगदेदा “थे म्हिगदेदा पुड्सी पिन्नो” भिसी कुल्जी। ३६ जमाहेन्से भ्याल्खानना हाकिमसे

पावलदा “शहररी मुबा हाकिमगदेसे हाडनीदा पुइसी पिन्गो भिसी पाङ्बा मुला। थेतबासेलमा दाहेन्से हाडनी थोन्सी हुक्क तसी फेप्गो” भिसी भिजी।

^{३७}तर पावलसे थे खबर भसी खबा सिपाहीगदेदा “डनी रोमी म्हि तना तनान थेनीगदेसे रोमी ठिम अन्छार डन्दा तिगै ड्योइबा छाबा आलना तोसी भयाल्खानरी भाङ्जी। दान्दे चा डन्दा सुटुक्क ते:बारी म्हाइबा? डनी नीनोन आनि। थेहङ् भिसी कुल्बा हाकिमगदेन छ्याम खसी डन्दा ते:तो:ला” भिसी भिजी।

^{३८}जमाहेन्से सिपाहीगदे हाकिमगदे मुबा ग्लारी निसी पावलसे पाङ्बा ताम पाङ्जी। पावलदेन सिलास रोमी म्हि चीम भिबा थे:सी थेनीगदे लोङ्जी। ^{३९}जमाहेन्से थेनीगदे खसी पावलदेन सिलासदा माफ ह्रीजी, ओच्छे पावलदेन सिलासदा भयाल्खानग्याम मङ्ग्यार भोर्सी, “डन्ना शहर र्लासी फेप्गो” भिसी बिन्ती लजी। ^{४०}भयाल्खानग्याम थोन्माहेन्से पावलदेन सिलास लिडिया भिबा म्रिडम्हेमेला दिमरी निजी। थेरी प्रभुदा विश्वास लबा ज्योज्यो आले नाना आडागदेदेन छ्याम हुप तसी थेनीगदेदा प्रभुरी


कोङ्सी चिउ भिसी आँट पिन्सी पावलदेन सिलास थेग्याम निजी।

थेसलोनिके भिबा ग्लारी परमेश्वरला
य्हुसाला समाचार थे:ना लबा

१७ जमाहेन्से पावलदेन सिलास^१ अम्फिपोलिसदेन अपोल्लोनिया भिबा शहरग्याम तबान थेसलोनिके भिबा शहररी खजी। थेरी यहूदीगदे हुप तबा दिम गिक मुबा। ^२सदला हङ्गोन लसी पावल थेनीगदे मुबा ग्लारी निजी, ओच्छे सोमरेम ब्लप्बा न्हबा धिनधोना परमेश्वरला बचनग्याम थेनीगदेदेन छ्याम छलफल लजी। ^३थेसे परमेश्वरला बचनग्याम ख्रीष्टसे दुख नासी सिबाग्याम सोनोन तो:ला भिसी प्रस्टन उन्सी घोना लजी। “चुनोन येशू थाबा पिन्बा ख्रीष्ट हिन्ना भिसी डाइ हाडनीदा पाङ्बान मुला,” भिसी भिजी। ^४जमाहेन्से थेनीगदे न्हडला कोइ कोइ म्हिगदेसे प्रभुदा विश्वास लजी। ओच्छे परमेश्वरदा तेन्बा ल्हानान ग्रीकगदेदेन स्थान्दोसे मान लबा ल्हानान म्रिडम्हेमेगदेसेनोन प्रभुदा विश्वास लसी पावल, सिलासदेन छ्याम ढिक्सी भजी।

^५तर यहूदीगदेसे डाह लसी गे आलना न्होङ्सी भ्रबा म्हिगदेदा थीसी

१७:१ १७:१ हेन्से २०:४ पदधोना लूकासे ‘डनी’ भिसी पाङ्बा आरे। चु तामग्याम लूका पावल, सिलासदेन छ्याम आरे भिबा ताम था याङ्खम्ला। चु धुइरी लूका चा फिलिप्पीरी चिबा मुबा।



पावल थाबार्बा पिन्बा समाचार थे:ना लबरी नीरमला पाल्ली निबा मुल चेला १५:३६-१८:२२

शहररी हुल दडगा लपुङ्जी, ओच्छे यासोन भिबा म्हिला माप भ्याल छ्याकछिक लसी पावलदेन सिलासदा म्हिगदेला डाच्छापट्टि भबारी छ्याइजी। ६थेनीगदेसे पावलदेन सिलासदा आस्याप्माहेन्से यासोनदेन स्थहान्दो कोइ कोइ ज्योज्यो आलेगदेदा शहररी मुबा शासन लबा म्हिगदे मुबा ग्लारी डुइबा छेइबा लसी चुहड् भिसी क्रिड्बान भिजी, “जम्बुलिङ नाङनोन हल्ली खल्ली तना लबा चु म्हिगदे चुरीनोन धोखजीम। ७थे म्हिगदे यासोनना डोन्बो दोबा मुला, थेनीगदे जम्मासेन येशू भिबा स्थहान्दोन ग्ले गिक मुला भिसी रोमी ग्याल्बो कैसरला ठिम अन्छार लतोःबा गेला बिरोध लबा मुला।” ८चु थेःसी म्हिगदेदेन शहररी मुबा शासन लबा म्हिगदे आत्यब तजी। ९जमाहेन्से यासोन ओच्छे थेदेन छ्याम मुबा बाँकी म्हिगदेदेन छ्याम धरौटी किन्सी पुइजी।

बेरिया भिबा ग्लारी परमेश्वरला

यहुल्साला समाचार थेःना लबा

१०म्हुन तमैछ्याम पावलदेन सिलासदा विश्वासीगदेसे बेरिया भिबा ग्लारी पुइजी, ओच्छे थेनीगदे थेरी धोखमाहेन्से यहूदीगदे हुप तबा दिमरी निजी। ११थे ग्लाला यहूदीगदे थेसलोनिकेला म्हिगदे भन्दा ल्हानान फर्स्यालो मुबा। तिग्दा भिसम थेनीगदेसे परमेश्वरला बचन सेम लसी ड्यान्मुबा, ओच्छे पावलसे

पाङ्मा ढिकबा चीम कि आढिकबा चीम भिसी सदन परमेश्वरला बचनरी च्यामुबा। १२थेतबासेलमा ल्हानान म्हिगदेसे प्रभुदा विश्वास लजी। ओच्छे स्थहान्दोसे मान लबा ल्हानान ग्रीक म्रिडम्हेमेगदेदेन हेम्फेबेगदेसेनोन प्रभुदा विश्वास लजी। १३तर परमेश्वरग्यामला बचन बेरिया भिबा ग्लारीनोन पावलसे थेःना लबान मुला भिबा थेसलोनिकेला यहूदीगदेसे था याङ्माहेन्से थेनीगदे थेरीनोन हुल दडगा लबारी म्हिगदेदा सुज्याब लबारी खजी। १४जमाहेन्से विश्वासीगदेसे पावलदा तुरुन्तन समुन्द्रधोना सनिजी। तर सिलासदेन तिमोथी चा थेरीन चिजी। १५पावलदा सबारी निबागदेसे पावलदा एथेन्स भिबा ग्लाधोना सनिजी। थेरी धोमाहेन्से पावलसे सिलासदेन तिमोथीदा खम्तेधोना योना खउ भिउ भिसी पाङ्गो भिसी कुल्जी। जमाहेन्से थेदा सबागदे थेंग्याम बेरियारी दोःसी निजी।

पावल एथेन्स भिबा ग्लारी धोबा

१६सिलासदेन तिमोथीदा पावलसे एथेन्स भिबा ग्लारी भ्रान्सी चिमा थेसे थे शहर नाङनोन लथाननोन लथान म्राङ्सी थेदा ल्हानान दुख इहम्जी। १७थेतबासेलमा थेसे यहूदीगदे हुप तबा दिमरी परमेश्वरदा तेन्बा म्हिगदे, यहूदीगदेदेन छ्याम ओच्छे बजाररी स्याप्बा म्हिगदेदेन छ्याम धिन धिननोन ड्योइबा छार्बा लमुबा।

१८ इपिक्युरीदेन स्तोइ भिबा धर्म तेन्बा म्हिगदेसेनोन थेदेन छ्याम ड्योइबा छार्बा लजी। ओच्छे थेनीगदे न्हडला कोइ कोइसे “चु फतफतेसे तिग पाङ्बारी म्हाइबा हिन्ना?” भिसी भिमा, स्थहान्दोगदेसे “चुसे अर्गु यहुल्साला ल लुला बारेरी पाङ्बा हड्बा मुला” भिसी भिजी। तिगदा भिसम थेसे येथूदेन छ्याम सिबागदे दोःसी सोला भिबा तामला बारेरी पाङ्बान मुबा। १९ थेतबासेलमा थेनीगदेसे पावलदा अरियोपागसरी[†] भोर्सी चुहड् भिसी भिजी, “ह्वाडसे लोप्बा चु छार ताम खाहड्बा हिन्ना, डन्सेनोन घोबारी तला? २० तिगदा भिसम ह्वाडसे डन्दा उदेकला ताम लोप्बान मुला। थेतबासेलमा चु खाहड्बा ताम हिन्ना थे ताम डन्दाएनोन घोबा सेम मुला।” २१ दान्दे एथेन्सला जम्मान म्हिगदेदेन थे ग्लारी चिबा अर्गु यहुल्साला म्हिगदे छार छार ताम पाङ्बादेन ड्यान्सीन धिन निना लमुबा।

२२ थेतबासेलमा पावलसे अरियोपागस भिबा सभाला गुडरी राप्सी चुहड् भिसी भिजी, “एथेन्सला म्हिगदे, ह्वाडनी जम्मान तामरी धर्म लबा चीम भिसी डाइ म्हाइबा मुला। २३ तिगदा भिसम डा कोर्बान निमा

ह्वाडनीसे तेन्बा लथानगदे म्हाड्जी। ओच्छे ग्ला गिकला भेटी फुल्बा ग्लारी चा ‘डोआसेबा लला लागिरी’ भिसी ठ्वाइसी भिसी थान्बाएनोन स्याप्जी। थेतबासेलमा डाइ ह्वाडनीसे डोआसेनान तेन्बा परमेश्वरला बारेरी ह्वाडनीदा पाङ्गला।

२४ “चु जम्बुलिडदेन जम्बुलिडरी मुबा जम्मान स्हे स्होबा परमेश्वर स्वर्गदेन जम्बुलिडला प्रभु हिन्ना, थेतबासेलमा यासे स्होबा मन्दिररी परमेश्वर धन्आछ्या। २५ ओच्छे म्हिला याग्याम फुल्बा स्हेगदे परमेश्वरदा तोःला भिसी थाम्हन्गो। तिगदा भिसम परमेश्वर ह्वाडसेन जम्मान म्हिगदेदा जुनी, सादेन तोःबा जम्मान स्हेगदे पिन्बा मुला।* २६ परमेश्वरसे म्हि गिकग्याम जम्बुलिड नाडनोन चिबारी यहुल यहुलला म्हिगदे स्होजी। ओच्छे थेनीगदे सोबा धुइदेन चिबा ग्लाएनोन तोगब लसी पिन्जी। २७ चुहड् लबा चा जम्मान यहुलला म्हिगदेसे परमेश्वरदा आस्याप्तेथोना साम्सी म्हाइसी स्याप्गै भिबा परमेश्वरला सेम मुला। तसैनोन परमेश्वर य्हाड जम्मानग्याम थारेड आरे। २८ तिगदा भिसम परमेश्वर य्हाडदेन छ्यामनोन मुबासे लमा य्हाड सोबा मुला, य्हाड

१७:१६ अरियोपागस भिबा एथेन्स भिबा ग्लाला गड मुबा। थे ग्लारी चा एथेन्सला नेतागदे हुप तबा ग्ला मुबा। लिच्छा चुनोन ग्लाला मिनग्याम सभाला मिन थान्जी।

१७:२४-२५ १ राजा ८:२७; यशै ४२:५; मुल ७:४८

क्यारमार भ्रबा मुला ओच्छे यहाड जम्बुलिङरी मुला। हाडनीलान वहाड भिबा म्हिगदेसेनोन 'यहाड पक्कान परमेश्वरला सन्तान हिन्ना' भिसी भिबा मुला।

२६ यहाड परमेश्वरला सन्तान तबासे लमा परमेश्वर म्हर, म्हुइदेन युडबागदेला ल हड्बा हिन्ना भिसी यहाडसे म्हन्बारी आत। चुगदे चा म्हिला सेमसे म्हन्सी म्हिला सीपसे स्होबा स्हे जे हिन्ना। ३० थेतबासेलमा डाच्छा आसेना आघोना लबा धुइला गेदा परमेश्वरसे वास्ता आलनी। तर दाहेन्से परमेश्वरसे जम्मान म्हिगदेदा “हाड हाडला पापगदे ख्लासी डापट्टि दोःगो” भिसी कुल्बा मुला। ३१ तिगदा भिसम परमेश्वर हाडसेन धम्बा म्हिग्याम खालैला ली आच्याना जम्बुलिङला निसाफ लबारी परमेश्वरसे थे धिन तोगब लसी जिन्बा मुला। ओच्छे जम्मान म्हिगदेदा चु धिन उन्बाला लागिरी येशूदा सिबाग्याम सोना लजी।”

३२ सिबाग्याम सोना लजी भिबा ताम थेःसी थेनीगदे न्हडला कोइ कोइसे पावलदा खिसी लजी। तर स्थान्दोगदेसे चा “हाडसे पाड्बा चु ताम डन्दा दोःसी ड्यान्बा सेम मुला” भिसी भिजी। ३३ जमाहेन्से पावल सभाग्याम थोन्सी निजी। ३४ तर कोइ कोइ म्हिगदे थेदेन छ्याम भ्रसी प्रभुदा विश्वास लजी। थेनीगदे न्हडला अरियोपागस भिबा सभाला

डियनुसियस भिबा म्हिदेन दामारिस भिबा मिडम्हेमे गिक मुबा ओच्छे स्थान्दोगदेसेनोन प्रभुदा विश्वास लजी।

पावल कोरिन्थ भिबा ग्लारी निबा

१८ जमाहेन्से पावल एथेन्स-ग्याम कोरिन्थ भिबा ग्लारी निजी। २ थेरी पावलसे पोन्टस भिबा ग्लाला अकिलास भिबा यहूदी म्हि गिकदा स्याप्जी। थे म्हि तिगै धिन डाच्छा जे हाडला मिड प्रिस्किलादेन छ्याम इटालिया भिबा ग्लाग्याम खबा मुबा। तिगदा भिसम क्लौडियस भिबा ग्याल्बोसे जम्मान यहूदीगदेदा रोमग्याम थोन्सी निउ भिसी कुल्बा मुबा। पावल थेनीगदेदा स्याप्बारी निजी। ३ पावलदेन थेनीगदेला गे गिकनोन तबासे लमा थेनीगदे छ्यामनोन चिजी। तिगदा भिसम थेनीगदेनोन पाल स्होबा गे लमुबा। ४ बल्प्बा न्हबा धिनदडसेन पावल यहूदीगदे हुप तबा दिमरी निसी छलफल लमुबा, ओच्छे यहूदीदेन ग्रीकगदेदा घोना लबारी म्हाइमुबा।

५ सिलासदेन तिमोथी माकेडोनिया-ग्याम खबा धुइरी पावल परमेश्वरला बचन थेःना लबा गे लबादेन यहूदीगदेदा येशून थार्बा पिन्बा स्त्रीष्ट हिन्ना भिसी घोना लबा गे जे लमुबा। ६ तर यहूदीगदेसे पावलला बिरोध लबान तामगन लबारी छ्याइजी,

जमाहेन्से पावलसे हाडला क्वान खर्सी, “एनीगदे हाडलान दोषसे लमा नाश तजी भिसम चुला दोष डादा लगब आत। दाहेन्से, डा अर्गु यहूलला म्हिगदे मुबा ग्लारी निला” भिसी भिजी।*

७ जमाहेन्से पावल थेग्याम परमेश्वरदा तेन्बा तीतस युस्तस भिबा म्हिला दिमरी निजी। थेला दिम यहूदीगदे हुप तबा दिमला डामरीन मुबा। ८ थेरी यहूदीगदे हुप तबा दिमला नेता क्रिस्पसदेन थेला दिमरी मुबा जम्मान म्हिगदेसे प्रभुदा विश्वास लजी, ओच्छे कोरिन्थला म्हिगदे न्हडला ल्हानान म्हिगदेसे पावलसे पाङ्बा परमेश्वरला बचन ड्यान्सी विश्वास लसी बप्तिस्मा किन्जी।

९ तिरेकुनु म्हुनड म्हेर्बा धुइरी म्हाडरी पावलदा प्रभुसे चुहङ् भिसी भिजी, “ए थालोङ्गो, तर पाङ्बान निउ, ओच्छे कुटिसी थाचिउ। १० तिग्दा भिसम डा एदेन छ्याम मुला। थेतबासेलमा एदा खालैसे तिगै लआखम, तिग्दा भिसम चु शहररी डाला म्हिगदे ल्हानान मुला।” ११ थेतबासेलमा परमेश्वरला बचन लोप्बान पावल दिङ गिकसे ला दुधोना थेनीगदेदेन छ्यामनोन चिजी।

१२ तर अखैया भिबा ग्लाला नेता गलियोनना धुइरी जम्मान यहूदीगदे

ढिकसी पावलदा चुङ्सी अदालतरी भोजी, १३ ओच्छे चुहङ् भिसी भिजी, “चु म्हिसे मोशाला ठिमला बिरोध लसी परमेश्वरदा तेन्गो भिसी म्हिगदेदा वहाम्बान लोप्बा मुला।”

१४ पावलसे ताम पाङ्बारी छ्याइमा गलियोनसे थे यहूदीगदेदा चुहङ् भिसी भिजी, “यहूदीगदे, चुदे चु ताम अन्यायदेन आज्यबा गेला बारेरी हिन्सम डाइ एनीगदेला ताम ड्यान्नोन तोःबा मुबा। १५ तर एनीगदेसे पाङ्बा चु तामदेन मिन मोशासे पिन्बा एनीगदेलान ठिमला बारेरी तबासे लमा एनीगदेसेन ढिकना लउ। चुहङ्बा तामला निसाफ चा डाइ आल।” १६ जमाहेन्से गलियोनसे थेनीगदेदा अदालतग्याम तेःजी। १७ जमाहेन्से थेनीगदे जम्मासेन यहूदीगदे हुप तबा दिमला सोस्थेनेस भिबा नेतादा चुङ्सी अदालत न्हडरीन तोजी। तर गलियोनसे थे तामला तिगै वास्ता आलनी।

पावल दोःसी थार्बा पिन्बा समाचार थेःना लबारी ग्ला ग्लारी निबा

१८ पावल कोरिन्थरी तिगै धिनधोना चिजी। जमाहेन्से विश्वासीगदेग्याम फेसी पावल पानी जहाजरी क्रेःबारी किंक्रिया भिबा ग्लारी निजी। थेदेन छ्याम प्रिस्किलादेन अकिलासएनोन मुबा। सिरिया भिबा ग्लारी निबाला

लागिरी पानी जहाजरी क्रेःबा भन्दा डाच्छा हाडसे लबा कबुल पूरा लबाला लागिरी किंक्रिया भिबा ग्लारी पावलसे हाडला क्रा भ्रेजी।* १६जमाहेन्से थेनीगदे एफिसस भिबा ग्लारी धोखजी, ओच्छे पावलसे प्रिस्किलादेन अकिलासदा थेरीन खलाजी। तर हाड चा यहूदीगदे हुप तबा दिम गिकरी वाड्सी यहूदीगदेदेन छ्याम छलफल लबारी छ्याइजी। २०पावलदा यहूदीगदेसे अफ्र तिगै धिनधोना चिउ भिसी भिमा पावलसे थेनीगदेला ताम आड्यान्नी। २१थेनीगदेग्याम फेबा धुइरी पावलसे थेनीगदेदा “परमेश्वरसे सेम लजी भिसम डा दोःसी हाडनी मुबा ग्लारी खला” भिसी पावल पानी जहाजरी क्रेःसी एफिससरी निजी।

२२जमाहेन्से कैसरिया शहररी धोखसी पावल यरूशलेमरी निसी थेरी मुबा मण्डलीला म्हिगदेदेन छ्याम हुप तजी। ओच्छे पावल एन्टिओखिया शहररी धोजी।

पावल थार्बा पिन्बा समाचार थेःना लबारी सोमरेमला पालरी निबा

२३पावल तिगै धिनधोना थेरीन चिजी। जमाहेन्से पावल गलातियादेन फ्रिगियाला जम्मान ग्लागदेरी निबान

जम्मान चेलागदेदा विश्वासरी कोड्ना लबान भ्रजी।

अपोल्लोससे थार्बा पिन्बा समाचार थेःना लबा

२४अलेक्जेन्ड्रिया भिबा ग्लाला अपोल्लोस भिबा यहूदी गिक एफिससरी खजी। थे परमेश्वरला बचन सेबा घोबादेन ज्यना लसी ताम पाड्खम्बा म्हि मुबा। २५थेसे थार्बा पिन्बा प्रभु येशूला बारेरी थेःबा मुबा, थेतबासेलमा सेमहेन्सेन ताड्सी प्रभु येशूला बारेरी ज्यना लसी लोप्मुबा। तसेनोन थेदा यूहन्नासे पिन्बा बप्तिस्माला बारेरी जे था मुबा। २६थे दुक्क तसी यहूदीगदे हुप तबा दिमरी पाड्बारी छ्याइजी। थेसे पाड्मा प्रिस्किलादेन अकिलाससे थेःमाहेन्से थेनीगदेसे थेदा हाडला दिमरी भोजी। ओच्छे थेदा परमेश्वरला गेला बारेरी ज्यना लसी घोना लसी पिन्जी।

२७जमाहेन्से अपोल्लोस अखैया भिबा ग्लारी निबा सेम लजी। थेतबासेलमा एफिससरी मुबा चेलागदेसे थेदा निबारी आँट पिन्सी, अपोल्लोसदा मान लगै भिसी चिठी गिक भिसी पुइजी। अखैयारी धोमाहेन्से प्रभुला दयामायाग्याम विश्वास लबा म्हिगदेदा थेसे ल्हानान ह्यो लजी। २८तिगदा भिसम थेसे परमेश्वरला बचनग्याम येशून थार्बा

पिन्बा ख्रीष्ट हिन्ना भिसी म्हिगदेला ओन्छाडरी यहूदीगदेदा तिगै पाङ्आखम्बा तना लजी।

पावल एफिसस शहररी निबा

१६ अपोल्लोस कोरिन्थरी मुबा धुइरी पावल एशियाला गुडग्याम तबान एफिसस भिबा शहररी खजी। थेरी पावलसे कोइ कोइ चेलागदेदा स्याप्जी।^२जमाहेन्से पावलसे थेनीगदेदा “एनीगदेसे विश्वास लमाहेन्से परमेश्वरला आत्मा याङ्जी?” भिसी ड्योइमा, थेनीगदेसे पावलदा “परमेश्वरला आत्मा मुला भिसी डन्से थे:बै आरे” भिसी भिजी।^३दो:सीनोन पावलसे थेनीगदेदा “एनीगदेसे खाहङ्बा बप्तिस्मा किन्जी?” भिसी ड्योइमा, थेनीगदेसे पावलदा “यूहन्नासे लोप्बा अन्छारला बप्तिस्मा किन्जी” भिसी भिजी।^४जमाहेन्से पावलसे थेनीगदेदा “यूहन्नासे पिन्बा बप्तिस्मा चा हाङ हाङला पाप ख्लासी परमेश्वरपट्टि दो:गै भिसी पिन्बा बप्तिस्मा हिन्ना। थेसे हाङ भन्दा लिच्छा फेप्खबा म्हिदा विश्वास लउ भिसी म्हिगदेदा लोप्मुबा, थे म्हि येशू हिन्ना” भिसी पाङ्जी।^{*} ^५चु ताम थे:सी थेनीगदेसे प्रभु येशूला मिनरी बप्तिस्मा किन्जी।^६पावलसे थेनीगदेथोरी या

थान्माहेन्से थेनीगदेथोरी परमेश्वरला आत्मा फेप्खजी, जमाहेन्से थेनीगदेसे आसेबा ग्योइदेन परमेश्वरग्याम खबा ताम पाङ्जी।^७थेनीगदे ओस्पन च्युक न्ही ते मुबा।

^८जमाहेन्से पावल ढुक्क तसी यहूदीगदे हुप तबा दिमरी वाङ्सी ला सोमधोना परमेश्वरला यहुल्साला बारेरी थेनीगदेदेन छ्याम छलफल लबान म्हिगदेदा घोना लजी।^९तर थेरी कोइ कोइ म्हिगदे अटेरी तसी विश्वास आलना येशूदा विश्वास लबा म्हिगदेला ओन्छाडरी थेरी मुबा समूहला बिरोध लबारी छ्याइजी। थेतबासेलमा पावल थेनीगदेग्याम फेसी चेलागदेदा छ्यामनोन भोर्सी टुरान्नस भिबा ग्लाला स्कूलरी धिन धिननोन छलफल लबारी छ्याइजी।^{१०}चु गे लबा न्ही दिङ तमा एशियारी चिबा जम्मान यहूदीदेन ग्रीकगदेसे प्रभुला बचन थे:जी।

एफिससरी उदेकला गे

^{११}थेरी परमेश्वरसे पावलग्याम म्हिसे लबारी आखम्बा उदेकला गेगदे लजी।^{१२}पावलला लहुइरी रूमाल तसै घ तसै थुर्सी आखम्बा म्हिगदे मुबा ग्लारी भोर्सी थेनीगदेला लहुइरी थुर्माहेन्से आखम्बा म्हिगदे खम्मुबा ओच्छे थेनीगदेला लहुइग्याम म्हड थोन्सी यार्मुबा।

१३ जमाहेन्से डाबा स्युइबा लबा कोइ कोइ यहूदीगदे क्यारमार निसी प्रभु येशूला मिनग्याम म्हडसे स्याप्बागदेदा “डाइ एदा पावलसे थे:ना लबा येशूला मिनरी थोन्सी निउ भिसी कुल्बा मुला” भिसी भिजी। १४ चुहड्बा गे लबा चा परमेश्वरला मन्दिररी पूजा लबा यहूदी मुल म्हि स्केवासला भा निस मुबा। १५ तर तिरकुनु चा म्हडसे थेनीगदेदा “डाइ येशूदा डोसेमुला, ओच्छे पावलदाएनोन डोसेबा मुला, तर एनीगदे चा खाल हिन्ना?” भिसी ड्योइजी। १६ जमाहेन्से थे म्हडसे स्याप्बा म्हि छ्योइबान थेनीगदे मुबा ग्लारी खजी, ओच्छे थेनीगदे जम्मादान लछार पछार लसी तहरी थान्जी, जमाहेन्से थेनीगदे लिगन्डी तसी घाइते तसी थे दिमग्याम थोन्सी यार्जी।


१७ चु ताम एफिससरी चिबा जम्मान यहूदीदेन ग्रीकगदेसे थे:सी थेनीगदे जम्मान लोइजी। ओच्छे थेनीगदेसे प्रभु येशूला मिननोन जम्मान भन्दा घेन हिन्ना भिसी भिबारी छ्याइजी। १८ जमाहेन्से विश्वास लबा ल्हानान म्हिगदे खजी ओच्छे थेनीगदे जम्मासेन हाड हाडसे लबा आज्यबा गेगदे म्हिगदेला ओन्छाडरी पाइजी।* १९ जादु लबा म्हिगदे न्हडला ल्हानान म्हिगदेसे हाड हाडला जादुला किताब हुप लसी भजी, ओच्छे जम्मान म्हिगदेला ओन्छाडरी खाइजी।

थेनीगदेसे भबा किताबला सय लमा ओस्पन बोगल न्हीसे हजार च्युइ म्हुइला डबल तजी। २० चुहड् तसी प्रभुला शक्तिशाली बचन खानडदमान थे:सी ल्हेबान निजी।

२१ चुहड् तमाहेन्से पावलसे माकेडोनियादेन अखैया तबान यरूशलेमरी निबारी पक्का लजी। ओच्छे थेरी धोमाहेन्से “डा रोमरीएनोन निनोन तो:ला” भिसी पावलसे भिजी। २२ ओच्छे पावलसे हाडदा हो लबा तिमोथीदेन इरास्तसदा माकेडोनियारी डाच्छा पुइजी। तर हाड चा तिगै धिनधोना एशियारीन चिजी।

एफिसस भिबा ग्लाला म्हिगदे न्हडरी खल्बल तबा

२३ थे धुइरी थाबा याइबा ग्यामला बारेरी थे:ना लबासे लमा एफिससरी ल्हानान खल्बल तजी। २४ तिगदा भिसम डेमेत्रियस भिबा म्हुइला मूर्तिगदे स्होबा म्हि गिकसे आर्तमिस भिबा लुला जजाबा मन्दिरगदे स्होसी गे लबागदेदा ल्हानान गे पिन्बा मुबा। २५ ओच्छे थेसे थे गे लबागदेदेन अर्गु थेहड्बान गे लबागदे जम्मादान ग्ला गिकरी हुप लसी चुहड् भिसी भिजी, “डाला होगदे, एनीगदेदा थानोन मुला, यहाडदा चुनोन गेग्याम ल्हानान फाइदा मुला। २६ एनीगदेसे म्राड्बादेन थे:बा तामगदे एफिससरी जे आहिन,



पावल थाबां पिन्बा समाचार थे:ना लबरी सोमरेमला पाल्सी निबा मुल चेला १८:२३-२१:१७

तर एशियाला जम्मान ग्लारी पावल भिबा म्हिसे म्हिला याग्याम स्होबा ल लुगदे चा तिगै आहिन भिसी ल्हानान म्हिगदेदा व्हाम्सी भोर्बा मुबा। ^{२७}थेतबासेलमा य्हाडला व्यापार म्हासी निबा जे आहिन, तर आर्तेमिस भिबा घेन लुला मन्दिरएनोन गे आखेल्ला तला, ओच्छे एशियाला जम्मान ग्लादेन जम्बुलिङ न्हडनोन घेन मान पिन्बा लुदा तेन्बा खलाला।”

^{२८}चु ताम थेःसी थेनीगदेदा ल्हानान बोमो रेःजी, ओच्छे “एफिससला म्हिगदेला आर्तेमिसनोन घेन हिन्ना” भिसी थेनीगदे क्रिङ्बारी छ्याइजी। ^{२९}ओच्छे शहर न्हडनोन हल्ली खल्ली तजी। जमाहेन्से थेनीगदे जम्मान ढिक्सी माकेडोनियाला गायसदेन अरिस्तार्खस भिबा पावलला हो न्हीदा चुङ्सी डुइबा छेङ्बा लसी रङगशाला न्हडरी भोर्जी। ^{३०}पावलएनोन तिगै ताम पाङ्बा सेम लसी म्हिला हुल न्हडरी निबारी म्हाइजी, तर प्रभुदा विश्वास लबागदेसे थेदा निआपुङ्नी। ^{३१}एशियाला सरकारला गे लबा कोइ कोइ मुल म्हिगदेएनोन पावलला हो मुबा। ओच्छे थेनीगदेसेनोन पावलदा रङगशाला न्हडरी थानिउ भिसी पाङ्सी पिन्गो भिसी कुल्सी पुइजी।

^{३२}थेनोन धुइरी थेनीगदे न्हडरी गिकसेम गिक ह्वाड ह्वाडला ताम लबान क्रिङ्सी हल्ली खल्ली लबान मुबा। तिगदा भिसम थेरी मुबा ल्हानान म्हिगदेदा ह्वाड तिगदा पोप तजी भिबा

ताम सुतै था आरेमुबा। ^{३३}जमाहेन्से म्हिला हुल न्हडग्याम कोइ कोइ म्हिगदेसे अलेक्जेन्डर भिबा म्हिदा डाच्छापट्टि भजी। थेदा यहूदीगदेसे तिगै ताम पाङ्सी चुगदेदा घोना लसी पिन्गो भिसी भिजी। ओच्छे अलेक्जेन्डरसे ह्वाड जोगब तबाला लागिरी याला चाल लबान तिगै पाङ्बा सेम लजी। ^{३४}तर थेनीगदेसे थे म्हि यहूदी चीम भिबा था याङ्सी जम्मान म्हिगदे ढिक्सी ओस्पन घण्टा न्ही ते “एफिससला म्हिगदेला आर्तेमिसनोन घेन हिन्ना” भिसी क्रिङ्जी।

^{३५}जमाहेन्से शहरला हाकिमसे म्हिगदेदा कुटिसी चिना लमाहेन्से चुहङ् भिसी घोना लजी, “एफिससला म्हिगदे, एफिसस शहर चा घेन आर्तेमिसला मन्दिरदेन मुग्याम ताइबा थेला मूर्तिदा जोगब लसी थान्बा मुला भिबा ताम खाल्दा था आरे? ^{३६}चु ताम खालै म्हिसे आहिन भिसी पाङ्बारी आखम भिबा ह्वाडनीदा थानोन मुला। थेतबासेलमा ह्वाडनी कुटिसी स्थूगो, ओच्छे तिगै आम्हन्ना तिगै गे लबारी आत। ^{३७}तिगदा भिसम ह्वाडनीसे भबा चु म्हिगदेसे य्हाडला लथान य्हो लबा आरे, ओच्छे य्हाडला लुदा बिरोध-एनोन लबा आरे। ^{३८}चुदे डेमेत्रियसदेन थेला गे लबागदेसे खालैला बिरोधरी उजुर लतोःबा मुसम अदालतगदे मुनोन मुला ओच्छे न्यायाधीशगदे-एनोन मुनोन मुला। थेतबासेलमा थेनीगदेसे गिकसे गिकदा बिरोध लबा

हिन्सम मुद्दा युगै। ३६तर चु बाहेक अर्गुन ताम पाङ्बा सेम मुसम थे तामला निसाफ य्हाङला ठिम अन्छार गन्बागदे हुप तसी सदन लबा सभारी ढिकना लला। ४०तिग्दा भिसम तिनी तबा चु हुल दङ्गाला दोष य्हाङथोरी खबारी खम्ला, चु थेहङ्गोन तबा हुल दङ्गा तिग्दा तजी भिसी य्हाङसे घोना लबारी आखम।” ४१चुदे भिसी थे हाकिमसे थेरी मुबा म्हिगदेदा पुइजी।

पावल माकेडोनियादेन ग्रीस भिबा
ग्लारी निबा

२० थे हल्ली खल्ली म्हमाहेन्से पावलसे प्रभुदा विश्वास लबागदेदा इयोइबारी पुइजी, ओच्छे थेनीगदेदा आँट पिन्सी थेनीगदेग्याम फेसी थे माकेडोनिया भिबा ग्लापट्टि निजी। २माकेडोनियाग्याम तबान निमा थेसे प्रभुदा विश्वास लबा थे ग्लाला म्हिगदेदा ल्हानान आँट पिन्सी थे ग्रीस भिबा ग्लारी निजी। ३थेरी पावल ला सोमधोना चिजी। ओच्छे पानी जहाजरी क्रैःसी सिरिया भिबा ग्लारी निबारी छ्याइमा थेदा यहूदीगदेसे साइबारी जाल लबा ताम था याङ्सी थेसे भ्रसीन माकेडोनिया तसी निबारी पक्का लजी। ४ओच्छे बेरिया भिबा ग्लाला पुरस भिबा म्हिला भ्ना सोपात्रोस, थेसलोनिक्के भिबा ग्लाला अरिस्तार्खसदेन सिकन्दस

ओच्छे डर्बी भिबा ग्लाला गायसदेन तिमोथी ओच्छे एशिया भिबा ग्लाला तुखिकसदेन त्रोफिमसएनोन थेदेन छ्याम निजी। ५चुगदे डाच्छान त्रोआस भिबा ग्लारी धोसी डन्दा १ भ्रान्सी चिबा मुबा। ६डनी चा मिश्र य्हुल्साग्याम फेसी खबा धिनदा ढन्सी धङ्बा चाड निमाहेन्से फिलिप्पी भिबा ग्लाग्याम पानी जहाजरी क्रैःसी खमा डारेकुनु थेनीगदे मुबा ग्ला त्रोआसरी धोखजी, ओच्छे थेरी डनी डारेधोना चिजी।

युटिकस भिबा म्हि सिबाग्याम
सोबा

७साताला डाच्छाकुनु डनी प्रभु भोज चबारी पोप तजी, ओच्छे पावल चा न्हङगरदङ्गोन निबा सेम लबासे लमा थेनीगदेदेन छ्याम म्हुन गडसलधोना ताम लसी चिजी। ८डनी पोप तबा दिमला तलाथोला कोठारी चा ल्हानान नाडसलगदे मुबा। ९युटिकस भिबा भ्योन म्हि चा भ्यालरी चिबा मुबा। पावलसे ल्हानान धुइधोना ताम लबासे लमा थेदा म्हेर्बा खसी छुप निजी। थेतबासेलमा थे तला सोमग्यामसे ताइजी, थेनीगदेसे थेदा थीमा सिसी जिन्बा स्याप्जी। १०जमाहेन्से पावल मार फाप्जी, ओच्छे र्लुप तसी थेदा हाप र्खाइजी। पावलसे थेरी मुबागदेदा “थालोङ्गो, तिग्दा भिसम चु सोबान

२०:५ चुरी लूकासे “डन्दा” भिसी पाङ्बा चा पावलएनोन लूकादेन छ्याम मुबा।

मुला” भिसी भिजी। ११ जमाहेन्से थे तलाथोरी निजी ओच्छे गेड क्युइसी चमाहेन्से यहाल आततेधोना ताम लसी चिजी। जमाहेन्से थेनीगदेग्याम पावल फेसी निजी। १२ ओच्छे थेनीगदेसे थे सिबाग्याम सोबा भ्योन म्हिदा दिमरी भोर्जी। ओच्छे थेनीगदेसे ल्हानान आँट याङ्जी।

पावल त्रोआसग्याम मिलेटस भिबा ग्लाधोना निबा

१३ त्रोआसग्याम पावल बाहेक डनी जम्मान पानी जहाजरी क्रेःसी अस्सोस भिबा शहररी निजी। पावलसे चा अस्सोसधोना भ्रसी निबा सेम लबासे लमा थे अस्सोसधोना भ्रसी निजी। ओच्छे अस्सोसग्याम चा डन्देन छ्यामनोन पानी जहाजरी क्रेःसी निबा पावलला सेम मुबा। १४ डनी अस्सोसरी धोखमाहेन्से पावलएनोन डन्देन छ्यामनोन पानी जहाजरी क्रेःसी डनी जम्मान छ्यामनोन मितिलेने भिबा शहररी निजी। १५ थेग्याम डनी पानी जहाजरी निसी न्हङगरदड खियस भिबा ग्लाला डामरी धोखजी, ओच्छे रेनीदड सामोस भिबा ग्लारी धोखजी। ओच्छे अर्गु धिनकुनु चा मिलेटस भिबा ग्लारी खजी। १६ पावलसे एशियारी चिबा सेम आलबासे लमा एफिससरी आवाङ्गान निबा सेम लजी। तिगदा भिसम पावलसे खमतेधोना पेन्तिकोसला धिनरी यरूशलेमरीन दोबारी भड लबान मुबा।

एफिससला मण्डलीदा च्याबा म्हिगदेग्याम फेसी निबा

१७ पावलसे मिलेटसग्याम एफिससरी मुबा मण्डलीला मण्डलीदा च्याबा म्हिगदेदा ड्योइबारी म्हि पुइजी। १८ थेनीगदे पावल मुबा ग्लारी धोखमाहेन्से पावलसे थेनीगदेदा चुहङ् भिसी भिजी, “एशियारी काड न्हेःमाकुनुहेन्से डा हाङनीला गुडरी खाहङ् लसी चिजी भिबा ताम हाङनीदा थानोन मुला। १९ ओच्छे यहूदीगदेसे जाल लसी डादा फसब लबारी म्हाइबासे लमा डादा ल्हानान दुख तजी, तसैनोन डा सोजो तसी क्राबान प्रभुला गे लजी। २० ओच्छे हाङनीदा ज्यबा ताम पाङ्बा धुइरी जम्मान म्हिला ओन्छाडरीदेन एनीगदे जम्मालान दिम दिमरी निसी डाइ हाङनीदा लोप्बा धुइरी डाइ तिगै ताम बाँकी आथान्ना लोप्जी। २१ यहूदीगदेदेन अर्गु यहूलला म्हिगदेदाएनोन डाइ हाङ हाङला पाप रूलासी परमेश्वरपट्टि दोःगो ओच्छे यहाङला प्रभु येशू ख्रीष्टदा विश्वास लउ भिसी पाङ्बा मुला।

२२ “च्यागो, डा परमेश्वरला आत्माला करसे लमा यरूशलेमपट्टि निबान मुला, थेरी तिग तला भिबा ताम डादा था आरे। २३ जम्मान शहररी डादा दुख तबादेन भ्याल्खानरी फाङ्ला भिसी परमेश्वरला आत्मासे उन्बा ताम जे डादा था मुला। २४ तसैनोन डाइ हाङला ज्यानदा घेन म्हन्बा आरे,

तिगदा भिसम परमेश्वरला दयामायाला
बारेरी थाबा पिन्बा समाचार थे:ना
लबादेन प्रभु येशूसे डादा पिन्बा गे
जिन्ना लखम्मो भिबा डाला सेम मुला।*

२५ “च्यागो, डाइ हाडनी न्हडला
जम्मादान परमेश्वरला यहुल्साला
समाचार थे:ना लबान भ्रजी, दो:सी
खाइमै यहाड हुप आत भिबा डादा
था मुला। २६ थेतबासेलमा तिनी डाइ
हाडनीदा पाडुला, हाडनी न्हडला
खालै नाश तसैनोन थेला दोष डादा
आत। २७ तिगदा भिसम एनीगदेसे
था याङ्गै भिसी परमेश्वरसे म्हन्बा
जम्मान ताम डाइ एनीगदेदा गिकनोन
बाँकी आथान्ना पाड्बा मुला।

२८ “दाहेन्से हाड हाडलान लागिरी
ओच्छे परमेश्वरला आत्मासे
हाडनीदा जिम्मा पिन्बा ग्युगदेला
लागिरी होशियार तसी चिउ।
परमेश्वरला मण्डलीदा ज्यना लसी
च्याबा म्हि दोगो, तिगदा भिसम प्रभु
येशूसे थे म्हिगदेदा हाडलान कासे
ग्लुबा मुला। २९ तिगदा भिसम डा
निमाहेन्से एनीगदेला गुडरी लोड्बा
खबा फार्बागदे हड्बान लुसीला ताम
लोप्बा म्हिगदे खला, थेसे म्हिगदेदा
बाँकी आथान भिबा ताम डादा था
मुला। ३० हाडनीलान गुडग्यामएनोन
न्होड्ना लबा ताम पाड्बा म्हिगदे
थोन्ना, थेनीगदेसे प्रभुदा विश्वास
लबागदेदा हाडदेन छ्याम भोर्ला।

३१ थेतबासेलमा हाडनी होशियार
तसी स्थूगो, डाइ सोम दिडधोना
धिन म्हुननोन क्रासी क्रासी एनीगदे
जम्मादान लोप्बा ताम थाम्ले:गो।

३२ “दाहेन्से डाइ हाडनीदा
परमेश्वरदेन थेला दयामायाला
बचनरी जिम्मा पिन्ना, थे बचनसेन
हाडनीदा विश्वासरी कोड्ना लला,
ओच्छे परमेश्वरसे हाडला लागिरी
फेसी थान्बा म्हिगदेसे याड्बा हक
एनीगदेसेनोन याड्बा। ३३ डाइ
खालै म्हिला म्हर, म्हुइदेन क्वान्ना
लोभ आलनी। ३४ ओच्छे डाइनोन
गे लसी डाला खाँचो ओच्छे डादेन
छ्याम मुबागदेदा खाँचो तबा स्हेगदे
डाइ पिन्बा हाडनीदा थानोन मुला।
३५ हाडनीसेनोन डाइ हड् लसी
कमजोर म्हिगदेदा हो लगे भिसी
डाइ सेमहेन्सेन लबा जम्मान गे
हाडनीदा उन्बा मुला, तिगदा भिसम
प्रभु येशूसेनोन ‘किन्बागदे भन्दा
पिन्बागदेसे चा भन मोलम याड्बा’
भिसी सुड्बा मुला। थेतबासेलमा
हाडनीसेनोन चु बचनदा ढन्सी
हाडसेन गे लसी आखम्बागदेदा हो
लउ।”

३६ चुदे पाडुसी जिन्माहेन्से पावलसे
पुइ जूसी थेनीगदेदेन छ्याम प्रार्थना
लजी। ३७ ओच्छे थेनीगदे जम्मान
क्रासी पावलदा हापरुवाइसी च्योक
लजी। ३८ पावलसे दो:सी खाइमै हुप

आत भिसी पाङ्बासे लमा थेनीगदेदा
ल्हानान दुख इहम्जी। ओच्छे
थेनीगदेसे पावलदा पानी जहाज मुबा
ग्लाधोना सबारी निजी।

पावल यरूशलेमरी निबा

२१ थेनीगदेग्याम फेसी डनी
पानी जहाजरी क्रेःसी
सोजोन कोस भिबा ग्लारी खजी,
ओच्छे न्हङगरदङ रोडस भिबा ग्लारी
धोखजी थेग्याम पटारा भिबा ग्लारी
धोखजी। ^२जमाहेन्से फोनिके भिबा
ग्लारी निबा पानी जहाज गिक स्याप्जी
ओच्छे डनी थेरीन क्रेःसी निजी।
^३साइप्रस भिबा ग्ला म्राङ्माहेन्से थे
ग्लाला देब्रेपट्टिग्याम डनी सिरियापट्टि
निसी टुरोस भिबा ग्लारी फाप्जी।
तिग्दा भिसम पानी जहाजरी भबा
मालसामान थेरी तेःतोःबा मुबा।
^४ओच्छे प्रभुदा विश्वास लबागदेदा
म्हाइसी स्याप्माहेन्से डनी निसरेधोना
थेरीन चिजी। थेनोन धुइरी प्रभुदा
विश्वास लबागदेसे परमेश्वरला
आत्माग्याम पावलदा यरूशलेमरी
थानिउ भिसी भिजी। ^५थे ग्लाग्याम
निबा धुइ तमाहेन्से डनी थे
ग्लाग्याम थोन्जी। ओच्छे थेनीगदेला
कोलागदेदेन म्हेमेगदे क्योङ्सेन डन्दा
शहर मङग्यारधोना सबारी खजी।
जमाहेन्से डनी जम्मासेन समुन्द्रला

कुनीरी पुइ जूसी प्रार्थना लजी।
^६जमाहेन्से डनी थेनीगदेग्याम फेसी
पानी जहाजरी क्रेःजी, ओच्छे थेनीगदे
चा हाङला दिमरी निजी।

^७टुरोसग्याम डनी समुन्द्रला ग्याम
तबान टोलेमाइस भिबा ग्लारी
धोखजी। जमाहेन्से थेरी मुबा प्रभुदा
विश्वास लबागदेदा स्याप्सी डनी
थेनीगदेदेन छ्याम तिरे चिजी।
^८न्हङगरदङ डनी थे ग्लाग्याम थोन्सी
कैसरिया भिबा शहररी धोखजी,
ओच्छे डनी थार्बा पिन्बा समाचार
थेःना लबा फिलिप[†] भिबा म्हेला
दिमरी वाङ्जी। थे फिलिप यरूशलेमरी
धम्बा गोर निस न्हङला गिक मुबा।^{*}
^९थे फिलिपला ब्याह आलबा भामे
ब्लि मुबा। थेनीगदेसे परमेश्वरग्याम
खबा ताम पाङ्मुबा।

^{१०}डनी तिगै रेधोना थेरी चिबा धुइरी
यहूदिया भिबा ग्लाग्याम अगाबस
भिबा अगमवक्ता गिक डनी मुबा
ग्लारी खजी।^{*} ^{११}थे अगमवक्ता
डनी मुबा ग्लारी खसी पावलला केः
किन्सी हाङलान काङ या खीजी।
थेसे “चु केः जुन म्हेला हिन्ना थेदा
यरूशलेमरी यहूदीगदेसे चुहङ्गोन
लसी खीला। ओच्छे अर्गु यहूलला
म्हिगदेला यारी जिम्मा पिन्ना भिसी
परमेश्वरला आत्मासे सुङ्बा मुला”
भिसी भिजी।

२१:८ फिलिपदा चा मुल चेलागदेदा हो लबाला लागिरी धम्बा मुबा।

२१:८ मुल ६:१-७ २१:१० मुल ११:२७-२८

१२ चु ताम थे:सी थेरी मुबागदेदेन डन्से पावलदा यरूशलेमरी थाफेप्पो भिसी बिन्ती लजी। १३ तर पावलसे थेनीगदेदा “तिगदा एनीगदे क्रासी डाला सेम क्राना लबा? प्रभु येशूला लागिरी डा भयाल्खानरी चिबा जे आहिन, तर यरूशलेमरी सिबारीनोन तयार मुला” भिसी जोहाब पिन्जी। १४ डन्से पावलला सेम दो:बारी आखम्माहेन्से “प्रभुसे जुन म्हन्बा मुला थे ताम पूरा तगै” भिसी डनी कुटिसी चिजी।

१५ जमाहेन्से डनी हाड हाडला सामानगदे तयार लसी यरूशलेमपट्टि निजी। १६ डन्देन छ्याम कैसरिया भिबा ग्लाला कोइ कोइ प्रभुदा विश्वास लबागदेएनोन निजी। ओच्छे थेनीगदेसे डन्दा डाच्छाहेन्सेन प्रभुदा विश्वास लबा साइप्रस भिबा ग्लाला मनासोन भिबा म्हिला दिमरी बास चिबाला लागिरी भजी।

पावलसे मण्डलीला मण्डलीदा च्याबा म्हिगदेदा हुप तबा

१७ डनी यरूशलेमरी धोखमाहेन्से थेरी मुबा ज्योज्यो आले नाना आडागदे ताड्सी डन्दा मान लजी। १८ ओच्छे न्हडगरदड पावल डन्देन छ्याम याकूब मुबा ग्लारी निजी। थेरी जम्मान मण्डलीदा च्याबा म्हिगदे हुप तबा मुबा। १९ थेनीगदेदा लास्सो फ्याफुल्ला भिसी पाड्माहेन्से पावलसे थेनीगदेदा हाडसे लबा

गेग्याम अर्गु यहुलला म्हिगदेला गुडरी परमेश्वरसे खाहड्बा गेगदे लजी भिबा जम्मान ताम थेनीगदेदा पाड्जी।

२० चु ताम थे:माहेन्से थेनीगदेसे परमेश्वरला जयजयकार लजी। जमाहेन्से थेनीगदेसे पावलदा चुहड् भिसी भिजी, “आले, चुरीनोन भयासीन भयाबारी आखम्बाधोनाला यहूदीगदेसे परमेश्वरदा विश्वास लसी मोशासे पिन्बा ठिम अन्छार ज्यना लसी भ्रमुला। २१ हाडसे अर्गु यहुल्सारी चिबा यहूदीगदेदा एनीगदेसे हाडला कोलागदेला खतना थालउ। ओच्छे मोशासे पिन्बा ठिम अन्छार आलसै तला भिसी लोप्बा मुला रो भिबा ताम थेनीगदेसे थे:बा मुला। २२ दाहेन्से तिग लसे? थेनीगदेसे हाड चुरी फेप्खजी भिबा पक्कान थे:ला। २३ थेतबासेलमा डन्से हाडदा पाड्बा अन्छार लउ, चुरी परमेश्वरदेन छ्याम कबुल लबा म्हि बिलि डन्देन छ्याम मुला। २४ चुगदेदा भोर्सी हाडएनोन चुगदेदेन छ्यामनोन चोरुयाब तउ, ओच्छे चुगदेदा तो:बा खर्च हाडसेन युसी पिन्गो। जमाहेन्से चुगदेसे क्रा भ्रैगै। हाडसे चुहड् लसी मोशासे पिन्बा ठिम अन्छार लबा म्राड्सी हाडला बारेरी चुगदेसे थे:बा जम्मान ताम सत्य आहिन्बा चीम भिसी था याड्ला। २५ तर डन्से सल्लाह लसी प्रभुदा विश्वास लबा अर्गु यहुलला म्हिगदेदा हाडनीसे मूर्तिदा बलि

पिन्बा तिगै स्हेगदे, कादेन खारे च्यासी साइबा जन्तुला स्या थाचउ, ओच्छे स्थान्दोदेन छ्याम ब्रेल्सी थाभ्रउ भिसी चिठी भिबा मुला।”

२६ जमाहेन्से न्हडगरदड थे म्हि ब्लिदा भोर्सी हाडदाएनोन थेनीगदेदेन छ्यामनोन चोख्याब लजी, ओच्छे चोख्याब लबा धिन खाइमा जिन्ना भिबादेन थे म्हिगदेला लागिरी बलि खाइमा फुल्बा भिसी परमेश्वरला मन्दिररी पूजा लबा म्हिदा पाङ्बारी पावल परमेश्वरला मन्दिर न्हडरी वाङ्जी।

पावलदा चुङ्बा

२७ कबुल पूरा लबा निसरे तबारी छ्याइबा धुइरी एशियाला यहूदीगदेसे पावलदा परमेश्वरला मन्दिररी म्राङ्सी थेरी मुबा जम्मान म्हिगदेदा थीसी पावलदा चुङ्जी। २८ थेनीगदेसे क्रिङ्बान, “इसाएलला म्हिगदे डन्दा हो लउ। तिगदा भिसम खानडदमान य्हाङला य्हुलला म्हिगदेदेन य्हाङला ठिम ओच्छे चु ग्लाला बिरोध लसी लोप्सी भ्रबा म्हि चुनोन हिन्ना। चुदे जे आहिन, चुसे परमेश्वरला मन्दिररी अर्गु य्हुलला म्हिगदेदा भसी चु चोखो ग्लादा नइबा तना लबा मुला” भिसी भिजी। २९ तिगदा भिसम चु भन्दा डाच्छा थे म्हिगदेसे एफिसस भिबा ग्लाला त्रोफिमस भिबा म्हिदा पावलदेन छ्याम म्राङ्बा मुबा। थेतबासेलमा पावलसे थेदा

परमेश्वरला मन्दिररी भजी भिसी थे म्हिगदेसे म्हन्जी।

३० जमाहेन्से शहर नाडनोन हल्ली खल्ली तसी म्हिगदे तिकखुरीन यार्बान खजी। ओच्छे पावलदा चुङ्सी डुइबा छेङ्बा लसी परमेश्वरला मन्दिरग्याम मङ्ग्यार तेःसी तुरुन्तन मन्दिरला म्राप दुङ्जी।

३१ थेनीगदेसे पावलदा साइबारी म्हाइबा धुइरी यरूशलेम नाडनोन हल्ली खल्ली तबा मुला भिबा ताम रोमी सिपाहीगदेला हाकिमसे थेःजी। ३२ जमाहेन्से थेसे तुरुन्तन सिपाहीदेन कप्तानगदेदा छ्यामनोन भोर्सी यार्बान पावलदा तोबान लबा ग्लारी खजी। पावलदा तोबागदेसे हाकिमदेन सिपाहीगदेदा म्राङ्सी पावलदा तोबा रूलाजी।

३३ ओच्छे रोमी सिपाहीगदेला हाकिम पावलला डामरी खसी पावलदा चुङ्जी। ओच्छे चुदा च्याल्दा न्हीसे खीगो भिसी कुल्जी। जमाहेन्से थेसे चु म्हि खाल हिन्ना? चुसे तिग लजी? भिसी ड्योइजी। ३४ तर थेरी मुबा म्हिगदे न्हडरी कोइसे तिग ताम लसी क्रिङ्सी हल्ली खल्ली लबासे लमा थेसे थे घटनाला बारेरी तिगै आघोनी। थेतबासेलमा थेसे पावलदा सिपाहीगदेला ब्यारेकरी भोर्गो भिसी कुल्जी। ३५ पावल चामरी धोमा म्हिगदेसे पावलदा तोबारी खबासे लमा सिपाहीगदेसे थेदा पुइसी भोर्जी। ३६ तिगदा भिसम म्हिला हुलसे “चुदा

साइनोन तोःला” भिसी क्रिड्बान लिच्छा लिच्छा भ्रबा मुबा।

म्हिला हुलदा पावलसे हाडला बारेरी पाङ्बा

३७ सिपाहीगदेला ब्यारेक न्हडरी भोर्बारी छ्याइमा पावलसे सिपाही-गदेला हाकिमदा “हाडसे डादा ताम पाङ्पुङ्सम तिगै ताम पाङ्बा सेम मुला” भिसी भिमा सिपाहीगदेला हाकिमसे पावलदा चुहङ् भिसी भिजी, “एसे ग्रीक ग्योइ सेमुला? ३८ डाच्छा रोमी सरकारदा बिरोध लसी हजार ब्लि बिरोध लबागदेदा तोडतोडबा ग्लारी भोर्सी निबा मिश्री एनोन आहिन?” ३९ तर पावलसे “डा मी किलिकिया भिबा ग्लाला टार्सस भिबा शहरला यहूदी हिन्ना, डा जजाबा शहरला म्हि आहिन। थेतबासेलमा डादा चु म्हिगदेदा तिगै पाङ्पुङ्गो” भिसी बिन्ती लजी। ४० जमाहेन्से “तला” भिसी भिमाहेन्से पावल चामरी राप्सी म्हिगदेदा यासे चाल लजी, ओच्छे म्हिगदे कुटिसी चिजी। जमाहेन्से थेसे हिब्रू ग्योइरी[†] चुहङ् भिसी पाङ्बारी छ्याइजी।

२२ “डाला होगदे हाडनीला ओन्छाडरी डाइ डाला बारेरी पाङ्बारी छ्याइबा ताम

ड्यान्गो।” २ पावलसे हिब्रू ग्योइरी ताम पाङ्बा थेःसी थेनीगदे भन कुटिसी चिजी।

३ जमाहेन्से पावलसे चुहङ् भिसी पाङ्बारी छ्याइजी, “डा किलिकिया भिबा ग्लाला टार्सस शहररी न्हबा यहूदी हिन्ना। तर डा यरूशलेम शहररी गमलिएल भिबा म्हिला कुरी छर्बा हिन्ना। गमलिएल गुरुग्यामनोन डाइ यहाडला आखे म्हेमेला ठिम अन्छार लोप्तोःबा जम्मान ताम लोप्जी। तिनी हाडनीसे सेमहेन्से परमेश्वरदा खाहङ् लसी तेन्बा मुला डाइनोन थेहङ् लसीन तेन्बा मुबा। ४ ओच्छे डाइ थार्बा याङ्बा ग्यामरी भ्रबा म्हिगदेदा सिबाधोनान तोसी हेम्फेबेदेन मिडम्हेमे न्हीदान चुङ्सी भ्याल्खानरी फाङ्जी।* ५ डाइ पाङ्बा चु ताम सत्य हिन्ना भिसी परमेश्वरला मन्दिररी पूजा लबा मुल म्हिदेन यहूदीगदे हुप तबा दिमला गन्बागदेसेनोन पाङ्खम्ला। थेनीगदेसेन दमस्कस भिबा ग्लारी मुबा यहूदी ज्योज्यो आलेगदेदा चिठी भिसी डादा पुङ्जी। थे चिठीरी प्रभु येशूदा विश्वास लबागदे जम्मादान चुङ्बा अधिकार डादा पिन्बा मुबा। थेतबासेलमा थेनीगदेदा खीसी यरूशलेमरी भसी सजाय पिन्बा सेमसे डा दमस्कसरी निबा मुबा।

२१:४० हिब्रू ग्योइ चा यहूदीगदेला ग्योइ हिन्ना।

२२:४ मुल ८:३

६“डा दमस्कसला डामरी धोमा ओस्पन धिनी गडसल तजी तला, थेनोन धुइरी स्वर्गग्याम तिकखुरीन डाला क्युर्नोन य्हाल खसी भवालङ तजी। ७डा सरी हिल्ली, ओच्छे डादा ‘शाऊल, शाऊल, एसे डादा तिगदा दुख पिन्बा?’ भिबा काइ थे:जी।

८“ओच्छे डाइ ‘प्रभु, हाड खाल हिन्ना?’ भिसी ड्योइमा, थेसे डादा ‘एसे दुख पिन्बान लबा नासरतला येशू डानोन हिन्ना’ भिसी सुङ्जी। ९डादेन छ्याम मुबागदेसे थे य्हाल मी प्राङ्जी, तर डादेन छ्याम ताम पाङ्बाला काइ भिसम आथे:नी।

१०“थेनोन धुइरी डाइ ‘प्रभु, दाहेन्से डाइ तिग लउ?’ भिसी भिमा, प्रभुसे डादा ‘एरे:गो ओच्छे दमस्कस शहररी निउ, एसे लतो:बा जम्मान गे थेरी पाङ्सी पिन्ना’ भिसी सुङ्जी। ११थे य्हालसे लमा डाइ तिगै आम्राङ्नी। थेतबासेलमा डादेन छ्याम मुबागदेसे डादा यारी चुङ्सी दमस्कस शहररी भजी।

१२“थे शहररी हननिया भिबा मोशासे पिन्बा ठिम अन्छार भ्रबा म्हि गिक मुबा। थेदा दमस्कसरी चिबा जम्मान यहूदीगदेसे मान लमुबा। १३थेनोन म्हि डा मुबा ग्लारी खसी डाला डामरी राप्सी डादा ‘शाऊल आले, एला मी

दो:सी प्राङ्गै’ भिसी पाङ्मैछ्याम डाइ प्राङ्खम्जी, ओच्छे डाइ थेदा प्राङ्जी।

१४“ओच्छे थेसे चुहङ् भिसी भिजी, ‘य्हाडला आखे म्हेमला परमेश्वरला सेम घोबादेन परमेश्वरसे म्हन्बा अन्छार भ्रबा म्हिदा† प्राङ्बारी ओच्छे थेसे पाङ्मा थे:बारी हाडदा धम्बा मुला।* १५तिगदा भिसम हाडसे थेला बारेरी प्राङ्बादेन थे:बा तामला साक्षी दोसी हाडसे जम्मान म्हिगदेदा थे:ना लतो:बा मुला। १६थेतबासेलमा दाहेन्से तिगदा भ्रान्से? रे:गो, बप्तिस्मा किन्गो, ओच्छे थेला मिनरी विश्वास लमाहेन्से हाडला पाप धाला।’

१७“यरूशलेमरी दो:सी खमाहेन्से परमेश्वरला मन्दिररी प्रार्थना लबा धुइरी सेम गिक तसी डा एकोहोरो तजी। १८एकोहोरो तबा धुइरी डाइ प्रभुदा प्राङ्जी, थेसे डादा ‘योना लसी ए यरूशलेमग्याम थोन्सी निउ। तिगदा भिसम डाला बारेरी एसे पाङ्मा थेनीगदेसे विश्वास आल’ भिसी सुङ्जी।

१९“तर डाइ चुहङ् भिसी पाङ्जी, ‘प्रभु, जम्मान यहूदीगदे हुप तबा दिमरी निसी हाडदा विश्वास लबागदेदा तोबा ग्याङ्बा लसी भ्याल्खानरी भाङ्बा ताम यहूदीगदे जम्मादान

२२:१४ परमेश्वरसे म्हन्बा अन्छार भ्रबा म्हि चा येशू ख्रीष्ट हिन्ना। यहूदीगदेसे बिरोध थालगै भिसी पावलसे चुरी येशूला मिन आपाङ्नी।

२२:१४ मुल ६:१७

था मुला। २० ओच्छे ह्वाडला बारेरी पाङ्बा स्तिफनसदा साइबारी डाएनोन ढिक्सी डामरीन राप्सी स्तिफनसदा साइबागदेला क्वान खुङ्सी चिबा मुबा। २१ “जमाहेन्से प्रभुसे डादा ‘ए निउ, तिग्दा भिसम डाइ एदा अर्गु यहुलला म्हिगदे मुबा ग्लारी थारेड थारेडधोना पुइला’ भिसी सुङ्जी।”

२२ पावलसे चुहङ् पाङ्तेधोना थेनीगदेसे ड्यान्बान मुबा, ओच्छे ड्यान्ना ड्यान्नान “चुहङ्बा म्हिदा मी जम्बुलिडरी थान्बारी आत। तिग्दा भिसम सोबा भन्दा सिबान ज्यबा तला” भिसी थेनीगदे क्रिङ्बारी छ्याइजी।† २३ ओच्छे थेनीगदे ह्वाड ह्वाडला क्वान स्युसी साप्रा स्वाबान क्रिङ्जी।

२४ जमाहेन्से सिपाहीगदेला हाकिमसे चुहङ् भिसी कुल्जी, “चु म्हिगदेसे तिग्दा चुदा बिरोध लसी क्रिङ्बा चीम भिबा ताम था याङ्बाला लागिरी थेदा ब्यारेक न्हडरी भसी कोर्से तोबान ड्योइबा छार्बा लउ।” २५ सिपाहीगदेसे पावलदा ढिला छोसे खीबारी छ्याइमा पावलसे ह्वाडला डामरी राप्सी चिबा कप्तानदा “तिग रोमीला ठिम अन्छार तिगै दोष आरेबा रोमी म्हिदा कोर्से तोबा ठीक हिन्ना?” भिसी ड्योइजी।

२६ चु ताम थे:माहेन्से कप्तान सिपाहीगदेला हाकिम मुबा ग्लारी खसी, “ह्वाडसे चु तिग लबारी छ्याइबा? चु म्हि मी रोमी म्हि चीम” भिसी भिजी।

२७ जमाहेन्से थे हाकिम खसी पावलदा “लु, डादा पाङ्गो, ए पक्कान रोमी म्हि हिन्ना?” भिसी ड्योइमा पावलसे “हिन्ना” भिसी भिजी। २८ ओच्छे थे हाकिमसे “डाइ ल्हानान टाङ्गा फासी डा चु यहुलसाला म्हि दोबा हिन्ना” भिसी जोहाब पिन्मा, पावलसे “तर डा मी न्हमान रोमी म्हि हिन्ना” भिसी भिजी।

२९ पावलदा ड्योइबा छार्बा लबारी तयार तबागदे जम्मान थेग्याम तुरुन्तन लिच्छापट्टि ले:जी। ओच्छे पावल रोमी म्हि चीम भिबा ताम था याङ्सी सिपाहीगदेला हाकिमएनोन लोङ्जी। तिग्दा भिसम पावलदा खीगो भिसी थेसे कुल्बा मुबा।

पावलदा यहूदीगदेला अदालतरी भोर्बा

३० न्हडगरदड यहूदीगदेसे तिग्दा बिरोध लजीम भिबा ताम घोबा सेम लसी थेदा ब्लसी पिन्जी। ओच्छे परमेश्वरला मन्दिररी पूजा लबा

२२:२२ परमेश्वरसे पावलदा अर्गु यहुलला म्हिगदे मुबा ग्लारी निउ भिसी सुङ्बा ताम थे:सी यहूदीगदेसे चा अर्गु यहुलला म्हिदेन यहूदीगदे गिकनोन हिन्ना भिसी म्हन्सी पावल प्राङ्सी यहूदीगदेदा भन बोमो खजी।

जम्मान मुल म्हिगदेदेन यहूदीगदेला अदालतला नेतागदेदा पोप तउ भिसी कुल्जी। जमाहेन्से पावलदा अदालतरी भसी थेनीगदेला डाच्छापट्टि राप्पुङ्जी।

२३ पावलसे अदालतरी मुबा- गदे जम्मादान च्यासी, “ज्योज्यो आलेगदे, तिनीला धिनधोना डा परमेश्वरला डाच्छा ज्यबा सेमसे भ्रबा मुला” भिसी भिजी। ^२चु ताम थे:सी परमेश्वरला मन्दिररी पूजा लबा मुल म्हि हननियासे पावलला डामरी राप्सी चिबागदेदा थेला ग्रम्बारी तोउ भिसी कुल्जी। ^३जमाहेन्से पावलसे थेदा “हाडसे हाडदान ज्यबा म्हन्बा म्हि! च्यागो, एदाएनोन परमेश्वरसे सजाय पिन्ना। ए मोशासे पिन्बा ठिम अन्छार डाला निसाफ लबारी चिसीनोन मोशाला ठिमदा ख्लासी एसे डादा तोउ भिसी कुल्बा?” भिसी भिजी।

^४पावलला डामरी राप्सी चिबागदेसे पावलदा “तिग एसे परमेश्वरला मन्दिररी पूजा लबा मुल म्हिला बेइज्जत लबा?” भिसी भिजी।

^५पावलसे थेनीगदेदा “डाला ज्योज्यो आलेगदे, थे परमेश्वरला मन्दिररी पूजा लबा मुल म्हि हिन्ना भिबा डादा था आरेबा। तिगदा भिसम ‘एसे हाडला यहुलला नेताला बारेरी नइबा ताम थापाङ्गो’ भिसी

परमेश्वरला बचनरी भिबा मुला” भिसी भिजी।*

^६तर अदालतरी सदुकीगदेला समूहदेन फरिसीगदेला समूह चीम भिबा था याङ्सी पावलसे “ज्योज्यो आलेगदे, डा फरिसीला कोला फरिसीन हिन्ना। डाइ सिबागदे दो:सी सोला भिसी आश लबासे लमा डादा चु मुदा तबा हिन्ना” भिसी भिजी।

^७पावलसे थेहङ् भिमाहेन्से फरिसीगदेदेन सदुकीगदेला ताम आढिकना थेनीगदे फेजी। ^८तिगदा भिसम सदुकीगदेसे म्हि सिबाग्याम दो:सी आसो भिबादेन स्वर्गदूत ओच्छे आत्मा भिबा तिगै आरे भिसी भिमुबा। तर फरिसीगदेसे चा चु जम्मान मुला भिसी विश्वास लमुबा।

^९जमाहेन्से थेरी ल्हानान हल्ली खल्ली तजी। थेतबासेलमा फरिसी समूहला कोइ कोइ धर्मगुरुगदे राप्सी सदुकीगदेला बिरोध लबान, “डन्से चु म्हिला तिगै दोष आस्याप्नी। तर आत्मा अथवा स्वर्गदूतसेन चु म्हिदा चुहङ् पाङ्बा हिन्सम तिग तजी?” भिसी भिजी। ^{१०}थेरी थेनीगदेला ताम आढिकना छेबा बङ्बा तबासे लमा पावलदा थेनीगदेसे तोबा ग्याङ्बा लसी साइला भिसी सिपाहीगदेला हाकिम लोङ्सी पावलदा थेग्याम भसी ब्यारेक न्हङरी भोगो भिसी सिपाहीगदेदा कुल्जी।

११ जमाकुनु म्हुनड प्रभु पावलला डामरी राप्सी, “पावल एसे भड लउ। तिगदा भिसम यरूशलेम शहररी एसे डाला बारेरी पाङ्बा हङ् लसी रोमरीनोन डाला बारेरी पाङ्तो:ला” भिसी सुङ्जी।

पावलदा साइबारी जाल लबा

१२ जमाहेन्से न्हडगरदड स्थोरी यहूदीगदे हुप तसी पावलदा जाल लसी साइबारी सल्लाह लजी। ओच्छे पावलदा आसाइतेधोना तिगै चबा थुङ्बा आल भिसी घान फाजी। १३ चुहङ् लसी जाल लबा म्हिगदे बोगल न्ही भन्दा ल्हानान मुबा। १४ थेनीगदे परमेश्वरला मन्दिररी पूजा लबा मुल म्हिगदेदेन यहूदी गन्बागदे मुबा ग्लारी निसी चुहङ् भिसी भिजी, “डन्से पावलदा आसाइतेधोना तिगै आच भिसी घान फाबा मुला। १५ थेतबासेलमा हाडनीदेन अदालत ढिकसी सिपाहीगदेला हाकिमदा चुहङ् भिसी पाङ्गो, चुला मुद्दाला बारेरी अफ्र ज्यना लसी छिनब लतो:ला भिबा स्होसी थेदा ते:सी भउ। ओच्छे थे चुरी खना खनान डन्से थेदा ग्यामरीन साइला।”

१६ तर पावलला कोनसे चुहङ्बा जाल लबा था याङ्सी ब्यारेक न्हडरी निसी पावलदा पाङ्सी पिन्जी। १७ जमाहेन्से पावलसे कप्तानगदे न्हडला गिकदा ड्योइसी, “चु भ्योन म्हिदा सिपाहीगदेला हाकिम मुबा

ग्लारी ससी पिन्गो। तिगदा भिसम चुसे थेदा पाङ्तो:बा ताम मुला” भिसी भिजी। १८ थेतबासेलमा कप्तानसे थेदा सिपाहीगदेला हाकिम मुबा ग्लारी भोर्सी, “भयाल्खानरी मुबा पावलसे डादा ड्योइसी चु भ्योन म्हिदा हाड मुबा ग्लारी भोर्गो भिसी पाङ्जी। तिगदा भिसम चुसे हाडदेन छ्याम तिगै ताम पाङ्बा सेम मुला रो” भिसी भिजी।

१९ जमाहेन्से सिपाहीगदेला हाकिमसे थे भ्योन म्हिदा यारी चुङ्सी कुनी गिकरी भोर्सी, “एसे डादा तिग ताम पाङ्बारी म्हाइबा?” भिसी ड्योइजी। २० ओच्छे थे भ्योन म्हिसे हाकिमदा चुहङ् भिसी भिजी, “यहूदीगदेसे पावलला बारेरी अफ्र ज्यना लसी ड्योइबा छार्बा लतो:ला भिबा निहुँ लसी न्हडगर थेदा अदालतरी भसी पिन्गो भिसी हाडदा बिन्ती लतो:ला भिसी सल्लाह लबा मुला। २१ तर हाडसे थेनीगदेला ताम थाङ्ग्यान्गो। तिगदा भिसम बोगल न्ही भन्दा ल्हानान म्हिगदेसे थेदा आसाइतेधोना तिगै चबा थुङ्बा आल भिसी घान फासी थेदा साइबारी खुङ्सी चिबा मुला। दान्दे थेनीगदेसे हाडसे तिग सुङ्बा चीम थे ताम जे भ्रान्सी चिबा मुला।”

२२ जमाहेन्से सिपाहीगदेला हाकिमसे थे भ्योन म्हिदा “एसे डादा पाङ्बा चु ताम स्थान्दो खालैदा थापाङ्गो” भिसी पुङ्जी।

पावलदा कैसरिया भिबा ग्लारी पुइबा

२३ जमाहेन्से सिपाहीगदेला हाकिमसे कप्तानगदे न्हडला न्हीदा ड्योइसी चुहङ् भिसी भिजी, “तिनी म्हुनना नौ बजेरीक्यार ग्यार्जा न्ही सिपाहीगदेदेन बोगल सोमसे च्युइ ताथोरी क्रेःबा म्हिगदे ओच्छे ग्यार्जा न्ही भाला पुइबा म्हिगदेदा कैसरिया भिबा ग्लाधोना निबारी ठीक लसी थान्गो। २४ ओच्छे पावलला लागिरीनोन ता गिक ठीक लसी थेदा बिरोध लबा म्हिगदेग्याम जोगब लसी यहूदिया अञ्चलाधीश फेलिक्स मुबा ग्लारी भोगो।” २५ थेसे चुहङ् भिसी चिठी भिजी,

२६ “माननीय अञ्चलाधीश फेलिक्सदा क्लौडियस लुसियसग्याम फ्याफुल्ला!

२७ चु म्हिदा यहूदीगदेसे चुङ्सी साइबारी छ्याइबा मुबा। तर चु रोमी म्हि चीम भिसी डाइ था याङ्सी सिपाहीगदेदेन छ्याम निसी चुदा जोगब लबारी थेनीगदेला याग्याम फेसी भजी।* २८ तिग तामरी चुदा थेनीगदेसे दोष लजीम भिसी घोबाला लागिरी डाइ चुदा थेनीगदेला अदालतरीनोन भोजी।

२९ थेनीगदेसे हाडलान ठिमला

ड्योइबा तामला बारेरी चुदा दोष लजीम। तर डाइ चुदा साइतोःबा अथवा भ्याल्खानरी भाङ्तोःबा हङ्बा तिगै दोष आस्याप्नी। ३० चु म्हिदा जाल लसी साइबारी छ्याइबा ताम था याङ्सी डाइ चु म्हिदा तुरुन्तन हाड मुबा ग्लारी पुइखबा हिन्ना। ओच्छे चुदा बिरोध लबागदेदा हाडला डाच्छापट्टि बयान पिन्गो भिसी डाइ पाङ्बा मुला।”

३१ जमाहेन्से सिपाहीगदेला हाकिमसे कुल्बा अन्छार पावलदा सिपाहीगदेसे म्हुनडनोन एन्टिपाट्रिस भिबा शहररी भोजी। ३२ न्हडगरदड ताथोरी क्रेःबा सिपाहीगदेदा पावलदेन छ्यामनोन निउ भिसी भिजी। ओच्छे भाला पुइबा सिपाहीगदे चा ब्यारेकरी दोःसी खजी। ३३ कैसरिया भिबा ग्लारी धोमाहेन्से थेनीगदेसे कैसरियाला मुल हाकिमदा चिठी पिन्जी। ओच्छे पावलदा एनोन थेला डाच्छापट्टि भजी। ३४ थेसे थे चिठी पढब लसी जिन्माहेन्से पावलदा ए खजिबा जिल्लाला हिन्ना भिसी ड्योइमा, पावल किलिकिया भिबा ग्लाला चीम भिबा था याङ्जी। ३५ थेसे “एदा दोष लबागदे खमाहेन्से डाइ एला मुद्दा च्याला” भिसी भिजी। ओच्छे पावलदा हेरोद^१ ग्लेसे स्होबा ग्लेखाडरी थान्गो भिसी कुल्जी।

२३:३५ चु हेरोद चा घेन हेरोद हिन्ना। चु हेरोद येशू न्हाहेन्से सिजी। मत्ती २ अध्यायरी स्हीगो।

२३:२७ मुल १६:३७; २२:२४-२६

पावलदा फेलिक्स भिबा मुल
हाकिमला डाच्छापट्टि भबा

२४ डारे लिच्छा परमेश्वरला
मन्दिररी पूजा लबा मुल
महि हननियादेन कोइ कोइ यहूदी
गन्बागदे तर्तुल्लस भिबा वकीलदेन
छ्याम थेरी खजी। थेनीगदेसे पावलदा
बिरोध लबा ताम मुल हाकिम
फेलिक्सदा घोना लजी। २पावलदा
थेरी भमाहेन्से तर्तुल्लससे थेला बिरोध
लसी चुहङ् भिबारी छ्याइजी,

“माननीय फेलिक्स ह्वाङ्ग्याम
डन्से ल्हानान शान्ति याङ्बा
मुला। ओच्छे ह्वाङ्गसे डन्ना
य्हुलला लागिरी ल्हानान ज्यबा
गेगदे लबा मुला। ३चु ताम डन्से
जम्मान ग्लारी सदन ढन्सी ह्वाङ्गदा
ल्हानान धन्यवाद पिन्बा मुला।
४डादा ह्वाङ्गदेन छ्याम ल्हानान
ताम पाङ्बा सेम आरे। तसैनोन
दया लसी ह्वाङ्गसे डन्ना ताम गिक
ड्यान्गो।

५“तिगदा भिसम चु महि जम्बुलिङ
नाडलान यहूदीगदेला गुडरी हल्ली
खल्ली लबादेन खानडदमान दुख
पिन्सी भ्रबा नासरी भिबा समूहला
मुल नेता हिन्ना। ६ओच्छे चुसे
परमेश्वरला मन्दिरदाएनोन नइबा
तना लबारी छ्याइबान मुबा।

थेनोन धुइरी डन्से चुदा चुङ्जी।
डन्ना ठिम अन्छार निसाफएनोन
लसेला मुबा। ७तर सिपाहीगदेला
हाकिम लुसियससे डनी मुबा
ग्लारी खसी जबरजस्ती थेदा
डनीग्याम ब्यन्सी भोजी। ८ओच्छे
चुदा बिरोध लबागदेदा ह्वाङ्गला
डाच्छा निउ भिसी कुल्जी। ९
दाहेन्से डन्से चुदा बिरोध लसी
पाङ्मा ठीक हिन्ना कि आहिन
भिसी ह्वाङ्गसेनोन ड्योइबा छार्बा
लमाहेन्से था याङ्गला।”

६थेदेन छ्याम खबा यहूदीगदेसेनोन
“चु जम्मान ताम ठीक हिन्ना” भिसी
भिजी।

१०अञ्चलाधीशसे पावलदा ताम
पाङ्पुङ्माहेन्से पावलसे चुहङ् भिसी
पाङ्जी, “ह्वाङ्ग ल्हानान दिङ्गहेन्से
यहूदी य्हुलला मुल हाकिमदेन
न्यायाधीश हिन्ना भिबा ताम डाइ
था याङ्जी। थेतबासेलमा ह्वाङ्गला
डाच्छापट्टि डादा बिरोध लबा तामला
बारेरी पाङ्म्याङ्मा डा ल्हानान ताङ्बा
मुला। ११डा परमेश्वरला मन्दिररी
परमेश्वरदा तेन्बारी यरूशलेमरी निबा
च्युक न्ही धिन भन्दा ल्हाना तबा आरे।
चु ताम ह्वाङ्गसेनोन था याङ्गख्म्ला।
१२ओच्छे चुगदेसे डाइ खालै म्हिगदेदेन
छ्याम छलफल लबाएनोन स्याप्बा
आरे। ओच्छे परमेश्वरला मन्दिरदेन

२४:७-८ “डन्ना ठिम अन्छार...ह्वाङ्गला डाच्छा निउ भिसी कुल्जी।” चु ताम ल्हाना ह्वाङ्ग
ग्रीक बाइबलरी आरे।

यहूदीगदे हुप तबा दिमरी ओच्छे शहररी हुल दडगा लबाएनोन स्याप्बा आरे। ^{१३}ओच्छे दान्दे चुगदेसे डादा लबा दोषला तिगै सत्य ताम हाडदा उन्बारी आखम। ^{१४}“तर चु ताम डाइ हाडलान डाच्छापट्टि पाङ्खम्ला। डा थार्बा याङ्बा ग्यामरी भ्रसी डन्ना आखे म्हेमेला परमेश्वरदा तेन्बा मुला। चुनोन थार्बा याङ्बा ग्यामदा चुगदेसे लुसीला ताम पाङ्बा म्हिगदेला समूह भिसी भिमुला। तर डाइएनोन थेनीगदे भ्रबा ग्यामरीन भ्रसी मोशाला ठिमरी मुबा तामदेन अगमवक्तासे भ्रिबा किताबला जम्मान तामरी विश्वास लबान मुला। ^{१५}थेनीगदेसे हङ् लसीन परमेश्वरसे म्हन्बा अन्छारला गे लबा म्हिदेन परमेश्वरसे म्हन्बा अन्छारला गे आलबा म्हि न्हीनोन सिबाग्याम दोःसी सोला भिसी डाइएनोन परमेश्वरथोरी आश लबा मुला। ^{१६}थेतबासेलमा डाइ सदन परमेश्वरदेन म्हिगदेला डाच्छापट्टि ज्यबा सेम थोसी भ्रबा मुला।

^{१७}“ल्हानान दिड लिच्छा डा हाडलान यहूदीगदेदा टाङगा पिन्सी हो लबारीदेन परमेश्वरदा भेटी फुल्बारी यरूशलेमरी खबा मुबा। ^{१८}परमेश्वरला मन्दिररी भेटी फुल्बान लबा धुइरी चुगदेसे डादा स्याप्बा हिन्ना। थे धुइरी डाइ चोख्याब तबारी लतोःबा जम्मान गे लसी जिन्बा मुबा। चुगदेसे डादा परमेश्वरला मन्दिररी स्याप्मा डादेन छ्याम खालै म्हिला

हुल आरेबा ओच्छे हुल दडगाएनोन तबा आरेबा। ^{१९}तर एशिया भिबा ग्लाग्याम खबा कोइ कोइ यहूदीगदेसे डादा परमेश्वरला मन्दिररी म्नाङ्बा मुबा। चुदे डाला बिरोधरी तिगै ताम पाङ्तोःबा मुसम थेनीगदे चा हाड मुबा ग्लारी खसी डाला बिरोधरी उजुर लदोमुबा। ^{२०}आहिन्सम, डा यहूदी अदालतला डाच्छापट्टि राप्बा धुइरी डाला तिग दोष स्याप्जी थे दोष चुरी मुबा म्हिगदेसेन पाङ्गै। ^{२१}तर डाइ थेनीगदेला डाच्छा क्रिङ्सी चु ताम जे पाङ्बा हिन्ना, ‘सिबागदे दोःसी सोला’ भिसी विश्वास लबासे लमा तिनी हाडनीला डाच्छा डादा चु मुदा तबान मुला।”

^{२२}चु तामला बारेरी फेलिक्सदा जम्मान ताम था तबासे लमा थेसे चु ताम थेःमाहेन्से पावलदा बिरोध लबागदेदा “सिपाहीगदेला हाकिम लुसियस चुरी खमाहेन्से डाइ एनीगदेला मुदा छिनब लसी पिन्ना” भिबा स्होसी पुङ्जी। ^{२३}जमाहेन्से फेलिक्ससे कप्तानदा “पावलदा ज्यना लसी खुङ्सी चिउ, तर थेदा ल्हानान कडाएनोन थालउ। ओच्छे थेदा तोःबा स्हेगदे थेला ह्योगदेसे पिन्बारी खमा थेला ह्योगदेदा रोकब थालउ” भिसी कुल्जी।

फेलिक्सदेन दूसिल्लाला

डाच्छापट्टि पावल

^{२४}तिगै धिन लिच्छा फेलिक्ससे हाडला यहूदी मिड दूसिल्लादा

छ्यामनोन भसी खजी, ओच्छे थेसे पावलदा ड्योइसी खीष्ट येशूदा विश्वास लबा बारेला ताम पावलग्याम ड्यान्जी। ^{२५}पावलसे थेदा परमेश्वरदा सेम निबा गे लतो:बा मुला ओच्छे हाडसे हाडदान तहरी थान्सी परमेश्वरसे लबा निसाफला बारेरी पाङ्मा फेलिक्स आत्तेब तसी पावलदा “दान्देदा ए निउ, तजी भिसम डाइ एदा ड्योइला” भिसी भिजी। ^{२६}पावलसे थेदा टाङगा पिन्ना वा भिबा आश लसी पावलदा धुइ धुइरी ड्योइसी ताम लमुबा।

^{२७}न्ही दिड लिच्छा फेलिक्सला ग्लारी पर्किअस फेस्तस भिबा हाकिम खजी। ओच्छे फेलिक्ससे यहूदीगदेदा ताङ्ना लबाला लागिरी पावलदा भ्याल्खानरीन थान्सी निजी।

पावलला मुद्दा फेस्तससे च्याबा

२५ फेस्तस मुल हाकिम दोबा सोमरे लिच्छा कैसरियाग्याम यरूशलेमरी निजी। ^२थेरी परमेश्वरला मन्दिररी पूजा लबा मुल म्हिगदेदेन यहूदी गन्बागदेसे पावलला बिरोधरी दोष लजी। ^३डन्ना लागिरी पावलदा यरूशलेमरी पुइखसी डन्दा दया लउ भिसी बिन्ती लजी। तिगदा भिसम थेनीगदेसे पावलदा ग्यामरी खना खनान साइबारी जाल लबान मुबा। ^४तर फेस्तससे थेनीगदेदा चुहड् भिसी पाङ्जी, “पावलदा कैसरियारीन

भ्याल्खानरी थान्बा मुला, ओच्छे डाएनोन योनान कैसरियारी दो:सी निबा सेम मुला। ^५एनीगदे न्हडला कोइ कोइ नेतागदे डादेन छ्यामनोन कैसरियारी भ्रउ, ओच्छे थे म्हिसे तिगै आज्यबा गे लबा मुसम थेरी थेला दोष उन्गो।”

^६जमाहेन्से थेनीगदे मुबा ग्लारी फेस्तस भ्रे:रे च्युइरे भन्दा ल्हाना आचिना कैसरियारी दो:सी निजी। ओच्छे न्हडगरदड निसाफ लबा ठिरी चिसी पावलदा भसी खउ भिसी कुल्जी। ^७पावल धोखमाहेन्से यरूशलेमग्याम खबा यहूदीगदे थेला क्युर्सिन राप्जी। ओच्छे पावलला बिरोधरी हिन्बा आहिन्बा तामला दोष लजी। तर थेनीगदे हाडसेन पाङ्मा सत्य हिन्ना भिसी उन्बारी आखम्नी।

^८जमाहेन्से पावलसे हाडला ताम पाङ्बान, “डाइ यहूदीगदेदा मोशासे पिन्बा ठिम, परमेश्वरला मन्दिरला बिरोधरीदेन रोमी ग्याल्बो कैसरला बिरोधरी तिगै आज्यबा गे लबा आरे” भिसी भिजी।

^९तर फेस्तससे यहूदीगदेदा ताङ्ना लबाला लागिरी पावलदा “तिग ए यरूशलेमरी निसी थेरी डाला डाच्छा चु तामला बारेरी निसाफ लसी पिन्गै भिसी म्हन्बा मुला?” भिसी ड्योइजी।

^{१०}तर पावलसे चुहड् भिसी भिजी, “डा रोमी ग्याल्बो कैसरसे निसाफ लबा ठिला डाच्छा राप्सी चिबान मुला। थेतबासेलमा डाला निसाफ

चुरीन ततोःला। डाइ यहूदीगदेदा तिगै नइबा गे लबा आरे भिबा ताम हाडदा थानोन मुला। ^{११}चुदे डाइ डादा साइतोःबाधोनाला गे लबा मुसम डादा साइसैनोन ठीक मुला। तर डादा यहूदीगदेसे लबा दोषला तिगै सत्य ताम उन्बारी आखम्सम डादा खालैसे थेनीगदेला यारी जिम्मा पिन्बारी आम्याङ्। तर रोमी ग्याल्बो कैसरसेन डाला चु मुद्दा च्यासी पिन्गै भिबा डाला बिन्ती मुला।”

^{१२}जमाहेन्से फेस्तससे हाडदा सल्लाह पिन्बा म्हिगदेदेन छ्याम सल्लाह लसी, “एसे रोमी ग्याल्बो कैसरदा बिन्ती लजी। थेतबासेलमा ए रोमी ग्याल्बो कैसर मुबा ग्लारीन नितोःला” भिसी भिजी।

अग्रिपास भिबा ग्लेदेन फेस्तससे लबा सल्लाह

^{१३}तिगै धिन लिच्छा अग्रिपास ग्लेदेन थेला आडा बरनिकी फेस्तसदा मान लबारी कैसरियारी खजी। ^{१४}थेरी थेनीगदे ल्हानान धिन चिमाहेन्से फेस्तससे पावलला मुद्दा ग्लेदा उन्बान चुहङ् भिसी भिजी, “चुरी फेलिक्ससे भ्याल्खानरी थान्बा म्हि गिक मुला। ^{१५}थेला बारेरी डा यरूशलेमरी निमा परमेश्वरला मन्दिररी पूजा लबा मुल म्हिदेन यहूदी गन्बागदेसे थेला बिरोधरी दोष लसी थेदा सिबाला सजाय पिन्तोःला भिसी डादा पाङ्मुबा।

^{१६}तर डाइ थेनीगदेदा चुहङ् भिसी भिजी, ‘दोष आस्याप्तेधोना खालै म्हिदा सिबाला सजाय पिन्बा रोमीगदेला ठिम आरे। ओच्छे दोष लबा म्हिला ओन्छाडरी दोष तबा म्हिसे हाडला बारेरी ताम पाङ्म्याङ्तोःला।’ ^{१७}थेतबासेलमा थेनीगदे चुरी खमाहेन्से डाइ योना लसीन न्हङगरदडनोन निसाफ लबा ठिरी चिसी थेदा भसी खउ भिसी कुल्जी। ^{१८}जमाहेन्से पावलदा दोष लबा म्हिगदेसे राप्सी पावलसे लबा आज्यबा गेला दोष उन्ना भिसी डाइ म्हन्बा मुबा। तर थेनीगदेसे डाइ म्हन्बा अन्छार तिगै दोष उन्बारी आखम्नी। ^{१९}बरु थेनीगदे न्हङरी आढिकबा ताम चा सिसी जिन्बा येशूला बारेरीदेन थेनीगदेलान धर्मला बारेरी मुबा। ओच्छे पावलसे चा येशू अफ सोबान मुला भिसी पाङ्बा मुबा। ^{२०}जमाहेन्से चु ताम तिग हिन्ना भिसी सत्य ताम था याङ्बारी डा अलमल तबासे लमा चु तामला बारेरी निसाफ लबारी यरूशलेमरी निबा सेम मुला कि भिसी डाइ पावलदा ड्योइजी। ^{२१}तर पावलसे रोमी ग्याल्बोग्याम छिनब आततेधोना डादा चुरीन भ्याल्खानरी थान्गो भिसी बिन्ती लबासे लमा थेदा रोमी ग्याल्बो कैसर मुबा ग्लारी आपुइतेधोना चुरीन थान्गो भिसी कुल्जी।”

^{२२}जमाहेन्से अग्रिपाससे फेस्तसदा “चु म्हिला ताम डादाएनोन ड्यान्बा

सेम मुला” भिसी भिमा फेस्तससे अग्रिपासदा “थेला ताम हाडसे न्हडगर ड्यान्म्याङ्ला” भिसी भिजी।

पावलदा अग्रिपास भिबा ग्लेला डाच्छा भोर्बा

२३ न्हडगरदड अग्रिपास ग्लेदेन थेला आडा बरनिकी ओच्छे सिपाहीगदेला हाकिमगदे, शहरला मुल नेतागदेदेन छ्यामनोन सभा दिम न्हडरी वाङ्जी, थेरी म्हिगदेसे थेनीगदेदा ल्हानान मान लजी। जमाहेन्से फेस्तससे पावलदा भसी खउ भिसी कुल्बासे लमा पावलदा थेरी भजी। २४ जमाहेन्से फेस्तससे चुहङ् भिसी भिजी, “ग्ले अग्रिपासदेन चुरी य्हाडदेन छ्याम मुबा जम्मान ज्योज्यो आलेगदे, हाडनीसे म्राङ्बा चु म्हिदा जम्मान यहूदीगदेसे क्रिङ्बान, ‘चु म्हिदा साइनोन तोःला’ भिसी यरूशलेमरीदेन चुरी डादाएनोन थेसे हाडला ताम पाङ्बा मुबा। २५ तर डाइ चुदा साइनोन तोःबा तिगै दोष आस्याप्नी ओच्छे चुसेनोन रोमी ग्याल्बोला डाच्छा हाडला ताम थान्बा सेम लबासे लमा डाइ चुदा रोमी ग्याल्बो मुबा ग्लारी पुइबा सेम लबा मुला। २६ चुला बारेरी डाइ डाला रोमी ग्याल्बोदा भिसी पुइतोःबा खास ताम तिगै आरे। थेतबासेलमा डाइ चुदा हाडनीला डाच्छापट्टि ओच्छे खास लसी हाड ग्ले अग्रिपासला डाच्छापट्टि भबा मुला, दाहेन्से य्हाडसे चुदा ड्योइबा छार्बा लमाहेन्से डाइ

भिसी पुइतोःबा ताम स्याप्ला तला। २७ तिगदा भिसम भ्याल्खानरी भाङ्बा म्हिला बारेरी तिगै दोष आउन्ना रोमी ग्याल्बो मुबा ग्लारी पुइबारी डादा ज्यबा आछोर्नी।”

२६ जमाहेन्से अग्रिपास ग्लेसे पावलदा “दाहेन्से एसे हाडला बारेरी ताम पाङ्म्याङ्ला” भिसी भिजी। ओच्छे पावलसे याला चाल लबान हाडला बारेरी चुहङ् भिसी ताम लबारी छ्याइजी।

२ “ग्ले अग्रिपास, यहूदीगदेसे डादा लबा जम्मान दोषला बारेरी तिनी हाडला डाच्छापट्टि पाङ्म्याङ्मा डा ल्हानान ताङ्बा मुला। ३ यहूदीगदेला जम्मान रिमठिमदेन थेनीगदे खाहङ्बाधोना मुला भिबा हाडदा ज्यना लसी था मुबासे लमा डाला ताम आछेर्ना ज्यना लसी ड्यान्सी पिन्गो भिबा डाला बिन्ती मुला।

४ “डाला य्हुलला गुडरीदेन यरूशलेमरीनोन डा जत्धुगुहेन्से दान्देधोना खाहङ् लसी भ्रबा मुला भिबा ताम यहूदीगदेदा था मुला। ५ डन्ना यहूदी धर्म तेन्बा म्हिगदे न्हडला हाडसे तेन्बा ताम जे जम्मान भन्दा ठीक हिन्ना भिबा फरिसीगदेला समूह न्हडला डाएनोन गिक मुबा भिबा ताम थेनीगदेदा था मुला। थेतबासेलमा चु ताम पाङ्बा सेम मुसम थेनीगदेसे पाङ्खम्ला। ६ परमेश्वरसे य्हाडला आखे म्हेमेदेन छ्याम लबा कबुलरी डाइ विश्वास लबासे लमा तिनी

डादा चु मुद्दा तबा मुला। ^७अग्रिपास ग्ले य्हाडला च्युक न्ही वंशगदेसेन चु कबुल याड्बाला लागिरी धिन म्हुननोन सेम गिक लसी परमेश्वरदा तेन्बा मुला। चुनोन कबुलरी डाइ विश्वास लबासे लमा यहूदीगदेसे डादा दोष लबा हिन्ना। ^८परमेश्वरसे सिबागदेदा दोःसी सोना लला भिबा तामरी विश्वास लबारी हाडनीदा तिग्दा गाहो तबा?

^९“हिन्बाम डाइनोन खमतेधोना नासरतला येशूला बिरोध लतोःला भिसी म्हन्बा मुबा। ^{१०}डाइ यरूशलेमरी चुहड् लसी बिरोध लजी। डाइ परमेश्वरला मन्दिररी पूजा लबा मुल म्हिगदेग्याम अधिकार किन्सी परमेश्वरला म्हिगदेदा भयाल्खानरी भाड्जी। ओच्छे थेनीगदेदा साइबा गेरीनोन हो लजी। ^{११}ओच्छे यहूदीगदे हुप तबा जम्मान दिमगदेरी थेनीगदेदा ल्हानान रेम सजाय पिन्सी परमेश्वरदा बिरोध लउ भिसी कर लबा मुबा। ओच्छे थेनीगदेदेन छ्याम ल्हानान बोमो खसी डाइ थेनीगदेदा अर्गु यहुलसाला शहरगदेरीनोन दुख पिन्जी।

पावलसे हाडसे येशूदा विश्वास लबाला बारेरी पाड्बा

^{१२}“चुहड् लसी परमेश्वरला मन्दिररी पूजा लबा मुल म्हिगदेग्याम

अधिकारदेन कुल्बा तामला चिठी याड्माहेन्से डा दमस्कस भिबा ग्लार्पाट्टि निजी। ^{१३}अग्रिपास ग्ले, डनी निबान लमा धिनी गुडरी डाइ स्वर्गग्याम धिनीला य्हाल भन्दा ल्हानान य्हाल खबा म्राड्जी। थे य्हाल डादेन डाला होगदेला क्युर्सीन ज्वालडलड तजी। ^{१४}ओच्छे डनी जम्मान सरी हिल्जी। जमाहेन्से डादा हिब्रू ग्योडरी “शाऊल, शाऊल ऐसे डादा तिग्दा दुख पिन्बा? डादेन छ्याम छेसी ऐसे हाडसे हाडदान दुख तना लबा मुला”[†] भिबा काइ डाइ थेःजी।

^{१५}“जमाहेन्से डाइ, ‘प्रभु, हाड खाल हिन्ना?’ भिसी ड्योड्जी।

“प्रभुसे डादा चुहड् भिसी सुड्जी, ‘ऐसे दुख पिन्बान लबा येशू डानोन हिन्ना।’ ^{१६}‘तर रेःगो, तिग्दा भिसम डाइ एदा डाला गे लबा म्हिदेन डाला साक्षी पिन्बा म्हि स्होबाला लागिरी डा ए मुबा ग्लारी खबा हिन्ना। ऐसे डाला बारेरी म्राड्बा तामदेन डाइ एदा लिच्छा उन्बा तामगदेएनोन स्थान्दो म्हिगदेदा थेःना लतोःला। ^{१७}ओच्छे एदा डाइ यहूदीगदेदेन अर्गु यहुलला म्हिगदे मुबा ग्लारी पुड्बारी छ्याइबा मुला। थेनीगदेसे एदा पिन्बा दुखग्याम डाइ एदा जोगब लला। ^{१८}ऐसे थेनीगदेला मी म्राड्ना लसी

२६:१४ ग्रीक बाइबलरी “सुडोरी काडसे छेक्मा एदान स्हु खला” भिसी भिबा मुला। चु भिबा चा “डादेन छ्याम छेसी ऐसे हाडसे हाडदान दुख तना लबा मुला” भिबा हिन्ना।

थेनीगदेदा धोपधोपग्याम य्हाल य्हाल मुबापट्टिदेन शैतानना शक्तिग्याम फेसी परमेश्वरपट्टि भतोःला। जमाहेन्से थेनीगदेसे पापग्याम माफ याङ्ला ओच्छे डादा विश्वास लबासे लमा थेनीगदे परमेश्वरसे धम्बा म्हिगदेदेन छ्याम चिम्याङ्ला।

१६ “थेतबासेलमा अग्रिपास ग्ले, डादा स्वर्गग्याम उन्बा ताम डाइ ड्यान्बा हिन्ना। २० डाइ डाच्छा दमस्कसरी, जमाहेन्से यरूशलेमरीदेन यहूदिया यहुल्सा नाडनोन चिबागदेदा, ओच्छे अर्गु यहुलला म्हिगदेदाएनोन हाड हाडला पाप रूलासी परमेश्वर-पट्टि दोःगो ओच्छे हाड हाडला पाप रूलासी परमेश्वरपट्टि दोःबा अन्छारला गे लउ भिसी थेःना लजी। २१ डाइ चुहङ् लसी थेःना लबासे लमा यहूदीगदेसे डादा परमेश्वरला मन्दिररी चुङ्सी साइबारी म्हाइजी। २२ तिनीधोना परमेश्वरसे डादा हो लबान मुला। थेतबासेलमा डा चुरी राप्सी यहुल्साला जजा घेन जम्मादान चु ताम पाङ्बान मुला। ओच्छे डाइ अगमवक्तागदेदेन मोशासे पाङ्बा ताम पूरा तनोन तला भिबा ताम बाहेक अर्गु तिगै ताम पाङ्बा आरे। २३ थेनीगदेसे थार्बा पिन्बा ख्रीष्टसे दुख नानोन तोःला, ओच्छे सिबागदे न्हडरी थे जम्मान भन्दा डाच्छा सोसी हाडला यहुलला म्हिदेन अर्गु यहुलला म्हिगदेदा परमेश्वरला यहुल्साला बारेरी पाङ्ला।”

२४ पावलसे चु ताम पाङ्बान लमा फेस्तससे “पावल ए म्योबा हिन्ना, एसे ल्हानान पढब लबासे लमा एदा थेसेन म्योना लबा हिन्ना” भिसी घेन काइ लसी पाङ्जी।

२५ तर पावलसे चुहङ् भिसी भिजी, “जम्मासेन मान लबा फेस्तस, डा म्योबा आहिन, तर डाइ सत्य तामदेन बुद्धिला ताम जे पाङ्बा मुला। २६ चु तामला बारेरी अग्रिपास ग्लेदाएनोन था मुबासे लमा डाइ दुक्क तसी चु ताम पाङ्बान मुला। डाइ पाङ्बा चु जम्मान ताम ग्लेदा थानोन मुला भिबा ताम डादा पक्का था मुला। तिग्दा भिसम चु ताम खालैसे आम्राङ्बा ग्लारी लबा आहिन।”

२७ जमाहेन्से पावलसे चुहङ् भिसी भिजी, “अग्रिपास ग्ले, तिग हाडसे अगमवक्तागदेदा विश्वास लमुला? डादा था मुला, हाडसे विश्वास लमुला।”

२८ जमाहेन्से अग्रिपास ग्लेसे पावलदा “तिग एसे डादा चुदे योनान ख्रीष्टियान स्होबारी म्हाइबा?” भिसी भिजी।

२९ पावलसे “योना तसै घइसी तसैनोन चु च्याल्दागदे बाहेक, हाड जे आहिन, तर तिनी डाला ताम ड्यान्बागदे जम्मान डा हङ्बान तगै भिसी डाइ परमेश्वरदेन छ्याम प्रार्थना लबा मुला” भिसी जोहाब पिन्जी।

३० जमाहेन्से ग्लेदेन हाकिम ओच्छे बरनिकीदेन थेरी मुबा जम्मान म्हिगदे रेःसी निबारी छ्याइजी। ३१ ओच्छे थेनीगदे थे ग्लाग्याम थोन्माहेन्से “चु म्हिसे साइनोन तोःबा अथवा भयाल्खानरी भाड्तोःबाधोनाला तिगै गे लबा आरेम” भिसी हाड हाड न्हडरी ताम लजी।

३२ ओच्छे अग्रिपाससे फेस्तसदा “चुसे रोमी ग्याल्बो कैसरला डाच्छा हाडला ताम थान्बा सेम आलबा हिन्सम पुइसै तसेला” भिसी भिजी।

**पावल रोम युहुल्सारी थार्बा पिन्बा
समाचार थेःना लबारी निबा**

२७ डनी समुन्द्रग्याम तबान इटालिया भिबा ग्लारी नितोःला भिसी पक्का लमाहेन्से थेनीगदेसे पावलदेन स्यहान्दो कोइ कोइ भयाल्खानरी मुबा म्हिगदेदा ग्याल्बो अगस्टसला सिपाहीगदेला कप्तान युलियस भिबा म्हिला यारी जिम्मा पिन्जी। २ जमाहेन्से डनी एड्रामिटेनोस भिबा ग्लाग्याम खसी एशियारी परब तबा पानी जहाज थान्बा ग्लागदे तबान निबा पानी जहाजरी क्रेःसी निजी। थेरी डन्देन छ्याम माकेडोनिया अञ्चलला थेसलोनिके भिबा ग्लाला अरिस्तार्खस मिन लबा म्हि गिकएनोन मुबा। ३ न्हडगरदड डनी सीदोन भिबा ग्लारी धोखजी।

ओच्छे युलियससे दया लसी पावलदा थेला होगदे मुबा ग्लारी निसी तोःतेबा स्हेगदे किन्पुङ्जी। ४ थेग्याम दोःसी डनी मुबा पानी जहाज निजी, ओच्छे पानी जहाजला डाच्छापट्टिग्याम लाबा खबासे लमा डनी समुन्द्रला गुडरी मुबा साइप्रस भिबा ग्लाला भर लसी कुनीग्याम तबान निजी। ५ जमाहेन्से किलिकियादेन पामफिलिया भिबा ग्लाला क्याम्सडपट्टिला समुन्द्ररी धोखमाहेन्से डनी लुकिया भिबा ग्लाला माइरा भिबा शहररी धोखजी। ६ थेरी कप्तान युलियससे अलेक्जेन्ड्रिया भिबा शहरग्याम इटालिया भिबा युहुल्सारी निबा पानी जहाज गिक स्याप्जी। ओच्छे डनी थे पानी जहाजरी क्रेःसी निजी। ७ ल्हानान धिनधोना दुख नासी डनी गोल्से गोल्से लसी कनीडस भिबा ग्लारी धोखजी। तर लाबासे अफ डन्दा डाच्छा निआपुङ्बासे लमा क्रेट भिबा गडला भर लसी कुनीग्याम तबान सालमोने भिबा ग्लारी निजी। ८ ल्हानान दुखसे डनी थे ग्लाला कुनीग्याम पानी जहाज थान्बा जेबा भिबा ग्लारी खजी। थे ग्लाग्याम लासिया भिबा शहर डामरीन मुबा।

९ समुन्द्रग्याम निबारी ल्हानान लोड्बा खबा धुइ तबासे लमा डनी ल्हानान धिनधोना थेरीन चिजी, ओच्छे फोइथान चिसी प्रार्थना लबा

धिनएनोन^१ निसी जिन्बासे लमा पावलसे थेनीगदेदा चुहङ् भिसी सल्लाह पिन्जी। ^{१०}“च्यागो ह्योगदे, चु समुन्द्रग्याम निजी भिसम यहाङ्दा ल्हानान दुख तला। पानी जहाजदेन मालसामान जे नाश तबा आहिन, तर यहाङ्दला ज्याननोन निखम्ला भिबा ताम डाइ म्राङ्बा मुला” भिसी भिजी। ^{११}तर सिपाहीगदेला कप्तानसे पावलला तामदा भन्दा पानी जहाज चलब लबा म्हिदेन पानी जहाजला धनीला ताम जे विश्वास लजी। ^{१२}चु ग्लारी सेखरी चिबारी गाहो तबासे लमा जस्तो लसीन फोनिकस भिबा ग्लारी निसी खङ्बा ला निना लतोःला भिसी ल्हानान हङ्बा म्हिगदेसे थेग्याम पानी जहाज चलब लतोःला भिसी सल्लाह पिन्जी। फोनिकस भिबा ग्ला चा क्रेट भिबा गङ्दला पानी जहाज थान्बा ग्ला हिन्ना। थे ग्ला चा ल्हो न्हुपदेन भ्याङ न्हुपपट्टि दोबा मुला।

समुन्द्री लाबालुडसर खबा

^{१३}ल्होग्याम गोलसे गोलसे लाबा खबारी छ्याइमाहेन्से थेनीगदेसे दाहेन्से यहाङ निखम्ला भिसी म्हन्जी, ओच्छे फाइला अङ्कुसी तेःसी क्रेट भिबा ग्लाला कुनीन कुनी निबारी

छ्याइजी। ^{१४}तर छिन्नड लिच्छा थे क्रेट भिबा गङ्ग्याम घेन लाबालुडसर खजी। चुहङ्बा लाबालुडसरदा स्यार भ्याङ लाबा भिसी भिमुबा। ^{१५}जमाहेन्से थे लाबालुडसरसे पानी जहाजदा डाच्छापट्टि निआपुङ्नी। तसैनोन पानी जहाज चलब लबा म्हिसे खम्तेधोना डाच्छा निबारी भङ लजी, तर निबारी आखम्नी। थेतबासेलमा डन्से पानी जहाज खानड खानड निजी थेनोन पट्टि निपुङ्जी। ^{१६}ओच्छे क्लौडा भिबा ग्लाला गङ्दला भर लसी कुनीग्याम निमा डन्से बल्ला बल्ला पानी जहाजला ग्यापपट्टि खीसी थान्बा जजाबा दोंगादा जोगब लखम्जी। ^{१७}थे दोंगादा पानी जहाज न्हडरी भाङ्माहेन्से पानी जहाज चलब लबागदेसे पानी जहाज थान्होङ्गै भिसी पानी जहाजला क्युर्सिन घेन छोसे खीजी। तसैनोन सिरटिस भिबा ग्लाला कुनीरीक्यार मुबा बलौटे सरी क्याला भिसी थेनीगदे लोङ्जी। जमाहेन्से पानी जहाज चलब लबागदेसे पानी जहाजला पाल तेःजी, ओच्छे पानी जहाजदा लाबाला भररी पुङ्जी। ^{१८}थे लाबालुडसरसे डन्दा प्लिड लला हङ्गोन लबासे लमा न्हङगरदङ थेनीगदेसे पानी जहाजरी

२७:६ “फोइथान चिसी प्रार्थना लबा धिन” चा नेपाली पात्रो अन्धार आसोज लारी परब तमुबा। चु धुइरी चा जम्मान यहूदीगदेला पाप माफ तबाला लागिरी परमेश्वरला मन्दिरसी पूजा लबा मुल म्हिसे बलि फुलमुबा। (प्रस्था ३०:१०; लेवी २३:२७; गन्ती २६:७-११; हिब्रू ६:७)


मुबा मालसामान भ्याङ्बारी छ्याइजी।
 १९ओच्छे पानी जहाज चलब लबारी
 तोःबा स्हेगदेएनोन रेनीदड थेनीगदेसेन
 भ्याङ्जी। २०ल्हानान धिनधोना
 धिनीदेन सार तिगैनोन आम्राङ्नी।
 ओच्छे लाबालुडसरएनोन खबाला
 खबान लबासे लमा डन्दा सोला भिबा
 आशनोन आरेबा।

२१ओच्छे ल्हानान धिनधोना
 थेनीगदेसे तिगै आचमाहेन्से पावल
 थेनीगदेला गुडरी राप्सी चुहङ् भिसी
 पाङ्जी, “होगदे, हाडनीसे डाला ताम
 ड्यान्सी क्रेटग्याम पानी जहाज चलब
 आलबा हिन्सम हाडनीसे चुहङ्बा
 दुख नाआतोःसेला मुबा। २२तसैनोन
 दाहेन्से हाडनी थालोङ्गो, भड
 लउ। तिग्दा भिसम हाडनी न्हडला
 खालैनोन आसि। तर पानी जहाज
 चा नाश तला। २३तिग्दा भिसम डा
 जुन परमेश्वरला हिन्ना ओच्छे डाइ
 जुन परमेश्वरदा तेन्बा मुला, थेनोन
 परमेश्वरला दूत गिक दोलो म्हुनड
 डा मुबा ग्लारी खजी। २४ओच्छे थेसे
 डादा ‘थालोङ्गो पावल, तिग्दा भिसम
 ए रोमी ग्याल्बो कैसर मुबा ग्लारी
 निनोन तोःला। च्यागो, एदेन छ्याम
 पानी जहाजरी मुबा जम्मान म्हिगदेदा
 परमेश्वरसे सोना लला’ भिसी भिजी।
 २५थेतबासेलमा होगदे, हाडनी
 थालोङ्गो, भड लउ। तिग्दा भिसम
 डादा परमेश्वरसे जुन ताम सुङ्बा
 मुला थे ताम पूरा तला भिबा तामरी
 डादा विश्वास मुला। २६तसैनोन

यहाडला पानी जहाज खजिबै गड
 गिकरी ठोक्तोःला।”

२७डन्ना पानी जहाज लाबालुडसरसे
 लमा एड्रियास भिबा समुन्द्ररी याडयोड
 तबा च्युक ब्लि धिन तसी जिन्बा मुबा।
 जमाहेन्से म्हुन गडसलरीक्यार पानी
 जहाज चलब लबागदेसे यहाड खजिबै
 ग्लाला डामरी धोबारी छ्याइजीम
 भिसी म्हेन्जी। २८जमाहेन्से थेनीगदेसे
 गाते नुप्बा चीम भिसी दप्सी च्यामा
 बोगल गिकसे च्युक दु मिटर नुप्बा
 मुबा ओच्छे जजाकी क्याथाड निसी
 दोःसी दप्सी च्यामा बोगल गिकसे
 मिटर दु नुप्बा मुबा। २९ओच्छे पानी
 जहाज खानडै युडबारी ठोक्ला भिसी
 लोङ्सी थेनीगदेसे पानी जहाजला
 ग्यापपट्रिग्याम गोर ब्लि फाइला
 अङ्कुसी मार पुइजी, ओच्छे यहाल
 तगै भिसी प्रार्थना लबारी छ्याइजी।
 ३०ओच्छे पानी जहाज चलब लबागदे
 थे पानी जहाज खलासी यार्बाला
 लागिरी पानी जहाजला डाच्छा-
 पट्रिग्याम फाइला अङ्कुसी मार
 पुइबा स्होसी थे पानी जहाजरी मुबा
 दाँगा समुन्द्ररी तेःसी जिन्बा मुबा।
 ३१जमाहेन्से पावलसे सिपाहीगदेला
 कप्तानदेन सिपाहीगदेदा “चु म्हिगदे
 चुरी आचिनी भिसम हाडनी सोबारी
 आखम” भिसी भिजी। ३२चु ताम थेःसी
 सिपाहीगदेसे पानी जहाजरी स्वीसी
 थान्बा दाँगाला छो थासी पुइजी।

३३रमरम रिमरिम तबा धुइरी
 पावलसे थेनीगदे जम्मादान दाहेन्से



मुल चेला २७:१-२८:१४

पावल रोम यहूदसारी थाबा पिन्बा समाचार थे:ना लबरी निबा

सोल्बा छ्योइबा लउ भिसी बिन्ती लजी। ओच्छे पावलसे थेनीगदेदा चुहङ्ग भिसी भिजी, “सुर्दा लसी हाङनीसे सोल्बा छ्योइबा आलबा तिनी च्युक ब्लि धिन तसी जिन्बा मुला। ^{३४}थेतबासेलमा दाहेन्से हाङनीसे तिगै सोल्बा छ्योइबा लउ। ओच्छे तिगै सोल्बा छ्योइबा लमाहेन्से हाङनीदा भङ खला, थालोङ्गो, खालैनोन आसि।” ^{३५}चुदे पाङ्सी जिन्माहेन्से पावलसे गेङ दुइसी जम्मालान ओन्छाङरी परमेश्वरदा धन्यवाद पिन्सी गेङ क्युइसी चबारी छ्याइजी। ^{३६}जमाहेन्से थेनीगदेसेनोन आँट याङ्सी तिगै चबा स्हेगदे चजी। ^{३७}पानी जहाजरी डनी जम्मान लसी ग्यार्जा न्हीसे बोगल सोमसे च्युक हु म्हि मुबा। ^{३८}थेनीगदेसे म्रेन्ना चमाहेन्से पानी जहाज याङ्ना लबारी पानी जहाजरी मुबा ग्वाएनोन भ्याङ्जी।

पानी जहाज नाश तबा

^{३९}यहाल तसैनोन थेनीगदेसे थे ग्ला डोआसेनी। तर थेरी थेनीगदेसे कुनी गिकरी बलौटे स म्राङ्जी। जमाहेन्से खम्तेथोना पानी जहाजदा थे कुनीरी भोर्गे भिसी थेनीगदेसे सल्लाह लजी। ^{४०}जमाहेन्से थेनीगदेसे फाइला अङ्कुसीगदे तेःसी समुन्द्ररी भ्याङ्जी, ओच्छे पानी जहाज चलब लबा क्याबादा खीबा छोगदेएनोन ब्लसी समुन्द्ररी पुइजी। जमाहेन्से

डाच्छापट्टिला पालदा तोर खेन्सी लाबापट्टि दोःसी पिन्जी, ओच्छे पानी जहाजदा कुनीपट्टि भोर्बारी छ्याइजी। ^{४१}तर क्युइ न्हङरी मुबा बालुवाला उमरी ठोकजी, ओच्छे पानी जहाजला डाच्छापट्टिला जो थेरीन भासब तसी चलब लबारीन आखम्नी। जमाहेन्से पानी जहाजला ग्यापपट्टिला जोरी समुन्द्रला छालसे टसी क्युइबारी छ्याइजी।

^{४२}थेहङ्ग तमाहेन्से थेरी मुबा भ्याल्खानरी भाङ्बा म्हिगदे समुन्द्ररी क्याल्सी यार्ला भिसी म्हन्सी सिपाहीगदेसे थेनीगदेदा साइगे भिसी सल्लाह लजी। ^{४३}तर सिपाहीगदेला कप्तानसे पावलदा जोगब लबा सेम लसी थेनीगदेदा थेहङ्ग लआपुङ्नी। ओच्छे क्याल्बारी खम्बागदे डाच्छा पानी जहाजग्याम छ्योङ्सी पाखारी थोन्गो भिसी सिपाहीगदेला कप्तानसे कुल्जी। ^{४४}ओच्छे क्याल्बारी आखम्बागदे चा फल्याकगदेदेन पानी जहाजला क्युइबा टोगलगदे चुङ्सी निउ भिसी भिजी। चुहङ्ग लसी जम्मान ज्यना लसी पाखारी थोन्जी।

पावल माल्टा भिबा ग्लारी धोबा

२८ डनी ज्यना लसी समुन्द्रला कुनीरी धोमाहेन्से थे ग्लाला मिन माल्टा चीम भिसी डन्से था याङ्जी। ^१जमा धुइरी नाम खसी ल्हानान खङ्बासे लमा थे ग्लाला

म्हिगदेसे ल्हानान दया लसी मे फुइसी
डनी जम्मादान मान लजी।

३ पावलसेनोन भम नाड सिङ हुप
लसी मेरी युजी। मेला लेप्से लमा
पुख्री गिक थोन्सी थेला यारी जीसीन
चिजी। ४ थे ग्लाला म्हिगदेसे पावलला
यारी पुख्रीसे जिबा म्राङ्सी, “चु म्हि
पक्कान म्हि साइबा म्हि चीम। चु
म्हि समुन्द्रग्यामसेम जोगब तसी
खजी। तर ल लुला निसाफग्याम चा
स्योर आम्याङ्नी” भिसी ह्वाङ ह्वाङ
न्हङरी पाङ्जी। ५ जमाहेन्से पावलसे
थे पुख्रीदा मेरी खर्सी पिन्जी। तर थेदा
चा तिगै आतनी। ६ जमाहेन्से थेरी मुबा
म्हिगदेसे पावलदा थे पुख्रीला बिखसे
टाङ्सी तिकखुरीन हिल्ली सिला
भिसी च्याबारी छ्याङ्जी। तसैनोन
ल्हानान धुइधोना थेदा तिगै आतबा
म्राङ्सी थेनीगदेसे डाच्छा म्हन्बा ताम
आहिन्बा चीम “तर चु मी ल चीम”
भिसी भिजी।

७ थे ग्लाला पब्लियस भिबा
मुल म्हिला बु वारी थे ग्लाला
डामरीन मुबा। थेसे डन्दा मान
लसी सोमरेधोना थेला दिमरी भोर्सी
क्योङ्जी। ८ थे धुइरी पब्लियसला
आबा मासी तसी छवा खसी आखम्बा
मुबा। पावल थेदा च्याबारी निजी,
ओच्छे थेथोरी या थान्सी प्रार्थना
लसी थेदा खम्ना लजी। ९ चुहङ् तबा
था याङ्माहेन्से थे ग्लाला जम्मान
आखम्बा म्हिगदेएनोन खजी, ओच्छे
थेनीगदेएनोन खम्जी। १० थेनीगदेसे

डन्दा ल्हानान मान लसी ल्हानान
स्हेगदे पिन्जी। ओच्छे पानी जहाजरी
क्रेःमाहेन्से डन्दा तोःबा अर्गु
स्हेगदेएनोन पानी जहाजरी भाङ्सी
पिन्जी।

पावल रोमरी धोखबा

११ ला सोम लिच्छा डनी
अलेक्जेन्ड्रिया भिबा ग्लाग्याम खबा
पानी जहाजरी क्रेःजी। चु पानी
जहाज सेखरी माल्टा भिबा ग्लारीन
मुबा। थे पानी जहाजला डाच्छापट्टि
जौल्या लला मूर्ति स्होसी थान्बा
मुबा। १२ जमाहेन्से सुराकुसाई भिबा
शहररी धोखसी डनी सोमरेधोना
थेरीन चिजी। १३ थेग्याम डनी कुनी
कुनी तसी रेगियन भिबा ग्लारी
धोखजी। न्हङगरदङ ल्होग्याम
लाबा खजी, ओच्छे रेनीदङ डनी
पटिओली भिबा ग्लारी धोखजी।
१४ थेरी डन्से प्रभु येशूदा विश्वास
लबा ज्योज्यो आले नाना आडागदेदा
स्याप्जी। थेनीगदेसे डन्दा थेरी
निसरेधोना चिउ भिसी भिजी। चुहङ्
लसी डनी रोमरी निजी। १५ डनी
खबान मुला भिबा ताम थेःसी रोमरी
मुबा विश्वासीगदे डन्दा हुप तबारी
अप्पियस भिबा बजारदेन तीन पाटी
भिबा शहरधोना खजी। थेनीगदेदा
म्राङ्सी पावल ताङ्सी परमेश्वरदा
धन्यवाद पिन्जी। १६ डनी रोमरी
धोखमाहेन्से पावलदा सिपाही
गिकला भररी थे गिकदा चिपुङ्जी।

पावलसे रोमरी थाबा पिन्बा समाचार थे:ना लबा

१७ थेरी धोखसी सोमरे लिच्छा पावलसे रोमला यहूदी गन्बागदेदा ड्योइजी। ओच्छे थेनीगदे खमाहेन्से पावलसे थेनीगदेदा चुहङ् भिसी भिजी, “ज्योज्यो आलेगदे, डाइ यहाडला यहूलला म्हिगदेदेन आखे म्हेमेला रिमठिमला बिरोधरी तिगै गे लबा आरेमुबा। तसैनोन यरूशलेमहेन्सेन भयाल्खानरी भाङ्सी डादा रोमीगदेला यारी जिम्मा पिन्बा मुला। १८ थेनीगदेसे ड्योइबा छाबा लमाहेन्से डादा साइतो:बा तिगै दोष आस्याम्माहेन्से डादा पुइबा सेम लमुबा। १९ तर यहूदीगदेसे बिरोध लबासे लमा डाइ रोमी ग्याल्बो कैसरदा डाला ताम पाङ्नोन तो:बा तजी। तसैनोन डाइ डाला यहूलला म्हिगदेदा बिरोध लसी दोष लतो:बा तिगै ताम आरेबा। २० थेतबासेलमा हाडनीदेन छ्याम हुप तसी ताम लबारी डाइ हाडनीदा ड्योइबा हिन्ना। तिगदा भिसम इस्राएलीगदेसे आश लबा ख्रीष्ट फेप्खजी भिसी डाइ विश्वास लबासे लमा डादा च्याल्दासे खीसी चुरी भबा हिन्ना।

२१ जमाहेन्से थेनीगदेसे पावलदा चुहङ् भिसी भिजी, “डन्से मी हाडला बारेरी यहूदियाग्याम तिगै खबर

याड्बा आरे। ओच्छे यहाडला खालै यहूदी ज्योज्यो आलेगदे खसी हाडला बिरोधरी तिगै आज्यबा तामएनोन पाङ्बा आरे। २२ तर डन्दा थे ताम हाडग्यामसेन ड्यान्बा सेम मुला। तिगदा भिसम चु समूहला^१ बारेरी जम्मान ग्लारी म्हिगदेसे बिरोध लबा ताम जे डन्दा था मुला।”

२३ थेतबासेलमा पावलला ताम ड्यान्बाला लागिरी थेनीगदेसे धिन तोगब लजी। थे धिनकुनु ल्हानान म्हिगदे पावल मुबा ग्लारी खजी। जमाहेन्से पावलसे थेनीगदेदा स्थोहेन्से ड्यसेधोनान मोशाला ठिमदेन अगमवक्तागदेला किताबग्याम परमेश्वरला यहुल्साला बारेरी जम्मान ताम घोना लसी येशूला बारेरी थेनीगदेदा विश्वास तना लबारी म्हाइजी। २४ पावलसे पाङ्बा तामरी कोइसे विश्वास लजी, कोइसे विश्वास आलनी। २५ जमाहेन्से थेनीगदे हाड हाड न्हडरी आढिकना फेसी भ्रबारी छ्याइमाहेन्से पावलसे थेनीगदेदा चुहङ् भिसी भिजी, “एनीगदेला आखे म्हेमेदा यशैया अगमवक्ताग्याम परमेश्वरला आत्मासे पाङ्मा ठीकनोन मुबा भिसी हाडला ताम जिन्ना लबान चुहङ् भिबारी छ्याइजी।

२६ चु म्हिगदे मुबा ग्लारी निसी पाङ्गो

२८:२२ चु समूहला म्हिगदे भिबा चा ख्रीष्टदा विश्वास लबा म्हिगदे हिन्ना।

एनीगदेसे थे:बाम थे:मुला, तर
खाइमै आघोमुला,
च्याबाम च्यामुला, तर खाइमै
आम्राङ्मुला।

२७ तिग्दा भिसम चु म्हिगदेला सेम
कोङ्बा मुला,
ओच्छे थेनीगदेला नाब्यङ
आथे:मुला,
ओच्छे थेनीगदेसे मी च्युम्बा
मुला,
आहिन्सम थेनीगदेसे म्राङ्सेला
मुबा,
ओच्छे थे:सेला मुबा, ओच्छे
घोसी सेम दो:सेला मुबा,
जमाहेन्से डाइ थेनीगदेदा खम्ना
लसेला मुबा।’*

२८ थेतबासेलमा चु ताम हाङनीदा था
तगै, दाहेन्से परमेश्वरसे पिन्बा चु
थार्बा अर्गु यहुलला म्हिगदे मुबा ग्लारी
पुइबा मुला, ओच्छे थेनीगदेसे चु ताम
ङ्यान्ना।”

२९ पावलसे चु ताम पाङ्सी
जिन्माहेन्से यहूदीगदे हाङ हाङ न्हडरी
ल्हानान छलफल लबान थेग्याम
फेजी।†

३० न्ही दिङधोना पावल रोमरी
हाङसेन खर्च लसी चिजी, ओच्छे थे
मुबा ग्लारी खबा जम्मान म्हिगदेदा मान
लजी। ३१ आलोङ्ना थेसे परमेश्वरला
यहुल्साला समाचार थे:ना लजी, चुहङ्
लसी प्रभु येसू ख्रीष्टला बारेरी लोप्मा
थेदा खालेसे रोकब आलनी।

२८:२६ चु पदला ताम ल्हाना हङ्बा ग्रीक बाइबलरी आरे।

२८:२७ यशै ६:६-१०